



~~OK.~~

J


N. 337

8336

~~Whist 692~~

ny Lia me







Ucalegon. iam proximus ardet  
Virgilius lib. 2. Aeneidos

UCALEGON  
GERMANIÆ, ITALIÆ  
ET  
POLONIÆ  
HVNGARIA,  
FLAMMA BELLI TVRCICI

~~Ardens.~~

~~Productus~~

~~à~~

M. THOMA JOANNE  
PESSINA de CZECHOROD,  
Decano Lithomissensi, &  
Marchionatûs Moraviæ  
Historiographo.

Editio secunda emendatio.



LITHOMISLII,  
Typis JOANNIS ARNOLTI.  
Anno 1664. G.



VIRGIL: AENEID:

lib: 2.

- - - jam proximus ardet  
Ucalegon..

19870.I

BIBLIOTHECA



VNIV. IAGELL.

CRACOVENSIS





Tunc tua res agitur (ait ille)  
paries dum proximus  
ardet.



Ardet ecce Hungaria, pa-  
ries hester, Germania,  
Italia & Polonia, proxi-  
mus, proximus à vobis  
Ucalegon: ad cuius in-  
cendium, quod jam altè nimis depascens,  
ima quoq; & ferè ultima serpit, extin-  
guendum, ni citò ac potenter accurreritis,  
actum est de illa: actum erit & de Mora-  
via tua, ô Germania, prima adversùs bar-  
baras gentes Marchia, quam flamma hu-  
jus mali jam magna satis attigit: actum  
& de nobilissima tui portione Austria,  
Styria & Carinthia: actum & de Clypeo  
tuo inclyto Bohemie Regno, ac Silesia;  
actum deniq; & de te ipsa. Si enim paries  
ille, qui hucusq; tibi pro antemurali fuit,  
corruat, si & Clypeus ille decidat, quid  
superest ultra, nisi ut tu quoq; ruas, deci-  
das, & incendio pari consummaris?

*Neg, o Italia à periculo tuta eris : de-  
 victâ enim Hungariâ, ac parte residuâ  
 Croatia, nihil est, eritq, Turcis indium :  
 Per Carnos & Forum Julij terrestribus  
 ejus copijs facilis ad te patebit transitus.  
 Similiter & Polonia quid tuti sperare po-  
 tes, si Turca Transylvaniam totam sibi in  
 Provinciam redigat ? si Hungariâ supe-  
 riore, si & Silesiâ potiatur ?*

*Agite ergo uniberſi, tam Germani belli-  
 cosissimi milites, quàm Itali & Poloni au-  
 dacissima pectora, & vicino suo Ucalegoni,  
 coadunatis viribus succurrite. Quod  
 quàm necesse sit, ut fiat, & citò fiat, pro  
 tenui mea rerum Politicarum scientia, in  
 presenti Discursu demonstrabo. Prius  
 tamen de Origine & progressu Turcarum,  
 aduſq, tempus præſens, aliquid dicere li-  
 ceat, quò magis ſequentia pateant  
 uniberſis.*





## P A R S I.

*De Origine gentis Turcarum, &  
progressu ejus.*



**T**urcæ, antiquis etiã,  
ut Plinio & Pomponio  
Melæ noti, Scythiæ sunt  
populi, de progenie  
Magog filij Japhet, filij  
Noë.

Prima eorum sedes erat ad latus Se-  
ptentrionale montis Caucaſi, qui velut  
in ramos brachiatus, continuis mon-  
tium jugis, & interruptarum vallium  
angustijs, complectitur Iberiam, Alba-  
niam, Colchidem & Chalybes, exten-  
sus ad Occidentem verſus Pontum Euxi-  
num, & Mœotiden paludem, ad Orien-  
tem verſus mare Caspium : ubi verò  
ceu dehiscens populis ſefe aperit, por-  
tarum nomina ab adaperitis, & quaſi  
diductis expansisque vallium hiatibus  
ſortitus eſt : quæ alibi Sarmaticæ, alibi  
Armenicæ, alibi Caspiæ vocantur. Et

4

has Alexandrum Magnū obstruxisse Historici tradunt, abditis ad fores trabibus ferratis, ne ita facilè feris gentibus Septentrionis pateret in Asiam transitus.

Hi itaq; populi, seu cœli clementioris desiderio adducti, seu nimia multitudo gentis excrecente coacti, tempore quo Constantinus Copronymus Græcis imperabat, Caspias egressi portas, Albanos primū, deinde Armenos invaserunt, occupantes in eorum regionibus loca quædam opportuna, quorum commoditate alios quoq; vicinos excursionibus non modicè vexaverunt, ita ut postremò & Persis & Saracenis cœperint esse graves.

Demum imperante apud Germanos Ludovico II. & apud Græcos Basilio Macedone, in subsidium vocati à Saracenis contra Persas, unà cum Saracenis Persas vicerunt, & occasione illâ capti amœnitate & fertilitate soli, ad mare Caspium versùs Austrum in terra Chorafenorum, quæ antiquitùs Sogdiana fuit, vel Hyrcania, ab Hyrcano mari, quod aliter Caspium dicitur, sic appellata, ibi confederunt, submittentes sese Caliphæ Babylonio, Imperij Saracenici Monar-



5

Monarchæ, qui à Mahomete pseu-  
propheta originem duxit, Religionis  
pariter & Imperij Dominus, cujus etiam  
Religionem susceperunt.

Quod factum Anno Christi 871. 2  
morte Mahometis 240.

Ab eo tempore rem primò pecuariam  
in loco ubere & fertili exerçuerunt :  
postmodum ubi inter Calipham & Sul-  
danos seu Præfectos Provinciarum, ex  
dominandi cupiditate & æmulatione,  
exortæ fuerunt dissensiones graves,  
Turcæ provocati à Mahomete Suldano  
Persidis & Mediæ, contra Calipham arma  
receperunt, & prostrato exercitu Cali-  
phæ, cum ipsis idem Suldanus pacta sti-  
pendia ex integro solvere nollet, mox in-  
citati hæc injuriâ arma in illum conver-  
terunt, victum è regno ejecerunt, atq; ita  
ipsimet Regnum Persidis ac Mediæ in  
suam potestatem redegerunt. Quâ ac-  
cessione usq; adeo aucta est eorum po-  
tentia, & adhuc sequentibus assiduis ir-  
ruptionibus in tantum viribus crevit, ut  
æquo Marte cum Saracenis, alijsq; fini-  
timis populis contendere de Imperij pos-  
sessione cœperint : neq; enim contenti  
eâ accessione Regni Persici, sed ulterius

progressi bello continuo incubuerunt, ita fortiter, ut incredibili successu, brevi tempore, maiorem Asiæ partem, intra Taurum montem & Pontum Euxinum sibi subegerint, ubi & peculiare Regnum inchoârunt.

Et tunc Principem illorum nomine Zador, coactus erat Calipha Babylo-  
nius creare Imperatorem Asiæ : quod factum Anno Christi 1051.

Zadori successit filius ejus Dogrissa : hic expugnatâ Edessâ (quæ est in Historia Tobiaë Rages, nunc Orpha dicta) obtinuit Mesopotamiam, aliâque multa in Asia minore Constantinopolitanis Imperatoribus ademit : quemadmodum & Caliphæ Babylonio Syriam. Dogrissam secutus est filius Aspasales : hic Sedem habebat in Perside, & per Suldanos tum Provincias cæteras regebat, tum finibus prolatis Regnum ampliabat : cœsus tamen à Romano Diogene Imperatore Græco, Alepum, Hierapolim, & aliquot Civitates in Syria amisit.

Illo fatis functo successit filius Melechias, cujus patruelis Solimannus adolescens strenuus accessit ad Hellepontum usque, & Nicæam Bithyniæ urbem,

Syno-

Synodi Nicænæ memoriâ celebrem vi expugnavit, fecitq; sedem bellî contra Græcos, ac demum summo præsidio tutabatur, Sultani Turciæ nomine gaudens : quæ tamen Anno 1097. 5. Idus Junij, post viginti sex dierum obsidionem, à Godefrido Bullionio, aliisque ejus socijs, qui sese sacræ militiæ & expeditioni in terram sanctam dicârunt, vi effracta captaq; est. Melechas reliquit filios duos, quorum natu maximus Belchiarocus Patri successit. Hic sedem Regni habuit in Perside, relictâ illâ parte Asiæ, à Tarso Ciliciæ ad Hellepontum usq; Sultano Solimanno.

Tenuerunt tunc Hierosolymam Saraceni, quam paulò antè Turcis pulsî receperant, cùm Turcæ Saracenis ademptam possedissent, annos octoginta octo. Nostri igitur cum Godefrido Duce, postquàm repulso exercitu Solimanni, multas Asiæ Provincias, ut Bythiniam, Lycaoniam, Ciliciam, Syriam, Mesopotamiam, Comagenam, trium annorum spatio, partim cœsis, partim fugatis inde Turcis, perdomuissent, Antiochiâmq; recepissent, ultimò Hierosolymam obsederunt, quam, die obsidionis trigessimâ

octavâ Idibus Quintilibus Anni 1099. feliciter obtinuerunt, cûm penè desperatis rebus essent revocati ad novam aggressionem ostento, quod ex Monte Oliveti præfulgidi clypei agitatione, fecerat spem victoriæ.

Ibi Regni sede constitutâ, Godefri-  
 dus, qui primus conscensis muris in Vr-  
 bem irruperat, omnibus consentientibus  
 Rex Hierosolymorum est renunciatus :  
 qui tamen aurea insignia regni accipere  
 renuit, indignum se ducens aureo diade-  
 mate in ea civitate, in qua Christus spi-  
 neam Coronam gestavit. Itaq; & ipsi  
 spinea, ad Domini sepulchrum in genua  
 provoluto, imposita est.

Post hunc felicem progressum Chri-  
 stianorum in Oriente, secuta est incli-  
 natio potentiæ Turcicæ & ruina ; nam  
 mortuo Belchiaroco, & fratre ejus Im-  
 perium occupante à Suldanis oppresso  
 & interfecto, cûm Suldani inter se de  
 novo Imperatore convenire non potuis-  
 sent, sed unus quisque Provincias quas  
 administrabat sibi asserebat, distractum  
 est Regnum Turcicum : quâ occasione  
 usi nostri, & vicini Armenij, Iberi atque  
 Alani, Turcos Regno Asiæ expulerunt,  
 quo-



quorum pars aliqua mansit penes Suldandum Hyrcaniæ, alij verò aliorum Ducum auspicia & factiones sunt secuti.

His in Oriente per aliquot annos actis, cum demum res Christianorum propter dissensiones Principum imminuerentur valdè, Turcæ resumpserunt vires: quorum operâ Saladinus (cujus antecessor Sarraco patriâ Hyrcanus, excusso Caliphâ Egypti Regnum occupavit) Hierosolymam oppugnatione unius mensis, ac postea deditioe cepit, anno postquam à Godefrido occupata fuit, octuagesimo octavo. Brevi tamen iterum succubère, quando Tartari gens quoque, Scythica, sub Duce Zingis Chano, ex Septentrione primò Persidem, deinde reliquas Asiæ Provincias involârunt tantis agminibus, ut locustarum instar omnia obruerint, atque compleverint: quod factum circa Annum 1210. Tunc ergo potentia Turcarum in Oriente denuò est attrita, qui dispersi per Armeniam, Capadociam, & aliàs Regiones versùs Pontum Euxinum, quietè sese continebant ferè per seculum.

Tandem circa Annum 1300. iterum frequentari cœpit eorum nomen & im-

perium, duce & authore Osmano seu Ottomano, qui non adeò magni inter suos nominis (quamvis Annales Turcici ipsum de Oguciorum Principum familia asserant) sed manu audax ac promptus, cùm alij Principes discordiarum furijs acti, sese invicem mutuis cœdibus laniassent, collectis undiq; & accitis qui rapinarum ac prædæ cupidissimi erant, non solum Græcos, aliósq; in vicina Cappadocia & Bythinia Christianos vexare, sed & suos infestis armis invadere, eósq; sub sua juga mittere cœpit. Oppida quàm plurima, inter quæ erant Nacolia & Ancyra in Phrygia, Sinope in Galatia, celebris ortu ac sepulturâ Mithridatis, & Sebastia Cappadociæ, partim vi, partim deditione, in potestatem suam redegit. His successibus terrorem ingentem Græcis intulit : apud suos verò tantum sibi nomen & dignitatem peperit, ut primus Turcarum omnium consensu Rex, quem illi Amyram vocant, creatus fuerit, influxeritq; ita in barbarorum animos, ut alium sui generis Amyram, quàm de progenie Ottomani, in hanc diem patiantur neminem.

Huic fato functo Anno 1327. successis

cessit Orchanes filius natu minimus, qui prudentiâ, calliditate, promptitudine consiliorum, disciplinâ militari, copijs, apparatu, & victoriarum cursu, patri nulla in re inferior, liberalitate illum & comitate superavit; quâ arte militum animos sibi mirificè devinxit, atque ita maximum exercitum undique comparavit. Mysiâ enim, Lydiâ, Lycaoniâ, Phrygiâ & Cariâ subactis, limites novi Regni ad Hellespontum usque & Euxini littora propagavit. Prusiam vetustam, Sedem Regum Bithyniæ, Nicæam item & Nicomediam expugnavit. Præfuit rebus Turcicis annis viginti duobus: de interitu ejus dissimiles narrantur opiniones: alij in oppugnatione Prusiæ sagittâ lethaliter ictum perijsse dicunt; alij in conflictu cum Tartaris occubuisse tradunt.

Post quem Amurathes filius regnavit, vir rei bellicæ peritiâ plurimum pol-  
lens, qui & ipse dominationem à Patre relictam in majus provexit: nam duobus in Græcia de Imperio decertantibus, ab altero in auxilium accersitus ex Asia primus transijt in Græciam, & bellum inter partes consultò protraxit, ut &

captaret occasiones experiundi vires Græcas, & bello exhaustos Græcos, viribusq; enervatos, & penitus fractos, ipse demum invaderet. Quod etsi non acciderit tunc, bello enim confecto ad loca propria, unde venerat, redire debuit : captus tamen ubertate & amœnitate soli, insuper tot occasionibus obtinendæ Regionis invitatus, trajecit secundò, cum multò majoribus copijs, quas traduxerunt per Hellespontum quæ Genuensium naves, accepto in singula militum capita aureo nummo, Anno 1363.

Atq; hæc initia fuerunt servitutis tristissimæ, quæ Constantinopolitanis Imperatoribus, præter inane nomen, aliud reliquit nihil : deinceps enim facti sunt Turcis vectigales. Inde quoq; initium extitit nostrorum, heu ! nunquam satis deplorandorum vulnorum. Mox enim ut in Græciam trajecit Amurathes, primò Chiridocastron, Gallio-polim, & alia vicina Hellesponti oppida, partim dolo, partim vi cœpit : deinde viribus confirmatis, ulteriora aggressus, Philippopolim occupâvit, & quæ supra Hebrum est, Adrianopolim, frustra Im-  
pera-



peratore Græco initum cum perfido  
hoste fædus, & res perditas deplorante.

Ultimò, ubi maximam Græciæ par-  
tem sibi subjugâisset, Marcum quoque  
Bulgarix, & Lazarum Servix in Mysia  
superiore Despotas, cum alijs Albanix  
in Dalmatia & Epiro Toparchis debel-  
lâisset, ad ipsum Græcorum Imperium  
sibi vendicandum, animum virêsq; tetas  
adjecit. Sed dum hæc moliretur,  
à Milosso Cobilichio, viro fortissimo,  
natione Triballo, Lazari milite, pugione  
transfossus est, anno 1374.

Hic duos reliquit filios, Jacuppum  
Zelevi, quem Solimannum aliqui no-  
minant, & Bajazetem. Sed Jacuppo  
extincto, res universa ad Bajazetem de-  
voluta est : qui positâ sede Imperij A-  
drianopoli, inde mox fines suos longè  
latêq; extendit, Thraciam penè totam  
perdomuit, Mysos oppressit ; in Mace-  
doniam irrupit ; Phocidem, Bœotiam,  
Atticam occupavit : Illyricos, Triballôs-  
que assiduâ excursionibus, ac repentinis  
de populationibus partim evertit, par-  
tim sub jugum misit. Tandem & ad  
ipsam Hungariam populabundus pene-  
travit, unde præter auri argentique vim,  
etiam

etiam ingentem captivorum multitudinem, nemine resistente abegit. Nec multò post Constantinopolim, caput & culmen Græci Imperij, vastato atq; direpto suburbano agro obsedit, & in tantum afflixit cives, ut de salute sua solliciti de deditioe cogitarent, absente Joanne Palæologo Imperatore, qui diffusus rebus suis ad imploranda Europæ auxilia, in Galliam usq; navigavit.

Præfuit eâ tempestate Regno Hungariæ Sigismundus Caroli IV. Imperatoris ac Regis Bohemiæ filius, qui ad Bajazetem Bulgariam tum igni ac ferro fadè populantem Legatos misit, & ut ab hostili infestatione Regni, in quod sibi uni jus esset, abstineret, monuit. Bajazetes introductis in atrium Legatis, & mandata exponentibus, arma quæ utrinq; ad parietes suspendi jusserat, acinaces, clypeos, loricas, galeas, arcus & pharetras, & quorum Turcis in prælio usus, digito commonstrans: Hoc, inquit, meum jus est, quo fretus, Provinciam hanc mihi vendico. Irritatus hoc responso Sigismundus, mox Regni sui vires contrahi, & alios adhuc per Bohemiam, Moraviam & Austriam con-

scribi

scribi jubet exercitus : quibus cū  
 Joannes Philippi Audacis Ducis Bur-  
 gundiæ filius, Caroli sexti Regis Gallo-  
 rum patrui sui impulsu, junxisset lectis-  
 simas equitum turmas, quas multi præ-  
 stantes viri, ex proceribus Suevicis, Ba-  
 varicis & Austriacis auxerant, directo  
 in hostem itinere, penetrârunt ad Nico-  
 polim usq; Mysiæ urbem : ubi tentatâ  
 oppugnatione urbis, spatium dederunt  
 Bajazeti ad cogendas copias, qui suâ  
 celeritate usus, cum ducentis millibus,  
 ipsis tantum octoginta millia habenti-  
 bus, sese objecit. Pugnatum deinde,  
 summâ nostrorum temeritate, Gallo-  
 rum præsertim, qui primi agminis decus  
 deposcentes, antequam aliæ regales co-  
 piæ, præcipuè Germanorum phalanges,  
 Hungarorum equitatus Bohemorumq;  
 & Moravorum auxilia convenirent,  
 è castris profilierunt, & pugnam cum  
 Turcis inierunt, à quibus lunatâ acie  
 circumventi, ex equis, prisco suo more  
 desilierunt, pedestremq; inière pugnam.  
 Inter hæc equi eorum soluti, totâ passim  
 acie discurrebant, quos supervenientes  
 Hungari sessoribus vacuos conspitari,  
 (nondum enim illorum bellandi usum  
 nove-

noverant) cœsos omnes crediderunt, mórque dissoluti in tumultus, semet omnes effuderunt in fugam : quo eorum turpi exemplo ducti alij, præcipites quoq; abierunt, reliquis aut cæsis, aut captis. Contigit hæc Christianorum clades Anno 1395. secundum alios Anno 1396. die 28. Septembris.

Sigismundus naviculam nactus, ægrè Constantinopolim, inde Rhodum evasit : ac postea Venetorum operâ appulit in Dalmatiam ; Joannes verò cum alijs viris in potestatem hostium devenit, cui suppliciter deprecanti Bajazetes vitam concessit, & alijs viginti duobus : reliquos captivos omnes in conspectu ejus in frustra concidi jussit. Demum præcepit Joannem & illos viginti duos Prusiam deduci, ibiq; custodiri : ac tandem redemptis ducentorum millium aureorum precio, reditum concessit.

Interea cum Bajazetes hæc in Thracia gereret, & omnibus formidini esset, Tomyr Chan Tartarorum, cognomento Tamerlanes, edomitjs ac subactis Sogdianis, Aracosijs, Bactrianis & Hyrcanis, ad totius Asiæ Imperium aspirabat, jamque in ditiones Bajazetis ferebatur pleno



pleno impetu : cui Bajazetes contracto quoq; valido exercitu occurrit intrepidus. Sed fortuna dolosa, quæ applaudens ei hucusq; arridere in cunctis videbatur, quantò altiùs illum antea extulerat, tantò fædiùs hîc dejecit, atque prostravit. Nam in Cappadocia non procul à Stella Monte, Pompeij Magni de Mithridate victoriâ celebri, ingenti clade victus, captusque est, secundo post Nicopolitanam cladem anno : insuper catenis aureis vinctus, cavæ ferreæ impositus, & ita à Tamerlane triumphante per Asiam circumductus, passimq; ostentatus. Imò sunt qui scribunt, quòd ascensurus equum Tamerlanes, ipsius dorso subdito quasi scabello usus sit ; ( exemplo fortasse Saporis Parthorum Regis, qui idem Valeriano Romanorum Imperatori fecit ) prandens autem, quasi canem sub mensa sua comedere jussit ; sicq; illum injurijs tantis exagitatum ad mortem eò citius adegit ; altero namque à captivitate anno his in miserijs contabuit.

Post cladem Bajazetis, filij ejus Celebinus, quem aliqui Cyriscelebem vocant, Moyse, Josua & Mustaphas in potestata-

testatem Græcorum venerunt : nam, cum capto Patre, periculum evasuri, ex Asia in Thraciam navigare contenderent, in naves Græcorum inciderunt, à quibus capti sunt ; alij verò ipsorum fratres in Asia delituerunt. Celebinus, seu astu suo, seu (quod verisimilius est) Græcorum nautarum avaritiâ adjutus, quòd fato vocaretur ad Imperium, evasit feliciter Adrianopolim : ubi collectis veteranis, qui è Scytharum manibus elapsi in Europam quoq; trajecerant, regnum, quassatum, & penè fractum, rursus firmavit, Bulgaros, Servios, & Macedonas, qui collectis copijs sua repetere volebant, ingenti clade affecit : Sigismundum quoq; Regem Hungariæ, qui ut cladem Nicopolitanam ulcisceretur, excitis Hungaris, Bohemis & Germanis, de novo arma in Turcas suscepit, ad Galambocum Rasciæ arcem, quam circumsederat, oppressit, ita ut vix ille parvo iterum navigio Danubium transiens hostiles manus evaserit : quod factum Anno 1409.

Post Celebini interitum, Orchanes filius, tenellâ ætate adolescentulus, quorundam Principum ductu & auspicio Regnum

gnum occupare conabatur : cui Moyſes Patruus, & ipſe à Græcis dimiſſus, infeſtis armis occurrit, & eo magis proditi-  
one, quàm pugnâ oppreſſo, Regnum occupavit.

Haud multò poſt Mahometes frater ejus, adjutus operâ Caramanni à Cilicia, ipſi capto guttur chordâ arcûs eliſit, uſitato genti barbaricæ ſupplicio, atque ita regnum univerſum obtinuit. Hic profeſtus in Aſiam, multa loca à Tamerlane occupata recepit, tum verò plurimos Turcicæ gentis Principes in Galatia, Ponto, Cappadocia, Cilicia, vi atque armis oppreſſos, aut regnis exuit, aut imperio ſuo ſubdidit.

Inde reverſus, primus Danubium trajecit, & VValachiam Moldaviâmq; invaſit. Mortuum tradunt Anno 1419. cui ſucceſſit filius Amurathes iſtius nominis ſecundus : qui per id temporis in Aſia manens, auditâ Patris morte, per Hellespontum in Thraciam conatus trajicere, Imperatoris Græcorum maritimo apparatu prohibitus eſt. Inſuper Muſtaphas natorum Bajazetis reliquus, ut rerum potiretur, à Græcis liberatus, & ſummâ vi adjutus fuit.

Sed

Sed Mustaphâ pugnâ superato, & simili, quo ante Moyſes frater ejus ſupplicio extincto, Amurathes Regnum obtinuit, móxq; belli vim omnem convertit in Græcos, & peragratâ Thraciâ, acceptisq; in deditionem urbibus, quæ Imperatori Græco supererant, poſteâ Theſſalonicam, quæ tunc in fide & poteſtate Venetorum erat, Civitatem illuſtram, celeberrimamq; expugnavit, & captam dirripuit, indéq; movens, omnem citra Pelopponesum regionem, uſq; ad ſinum Corinthiacum, incredibili celeritate perdomuit.

Convertit deinde ſigna in Macedoniam, quam cùm ſatis longo afflixiſſet bello, Joannes Caſtriotus Dux Epiri pacem ab illo coactus eâ lege impetravit, ut cederet Crojâ oppido non ignobili, & obſides daret filios tres, Conſtantinum, Repoſum, & Georgium, quos ille mox Mahometano ritu circumcidi, ac præcipuè Georgium, quem ob ejus eximias animi & corporis dotes ſummè adamavit, literis alijsq; exercitijs inſtrui juſſit: quem poſtmodum etiam propter ejus vim corporis proceri atque robuſti, quo ſuperabat cunctos æquales, Scanderbegum,

gum, id est, Alexandrum Dominum appellavit. Qui tamen deinde Tyranno maximo exitio fuit: nam cum insigni calliditate solertiâq; usus in Epirum evassisset, & Crojam, ac reliquos Epiri Albanâq; populos recepisset, coactis copijs non magnis, sed pronâ voluntate militantibus, fines sui Imperij adversus Ottomanicam vim, adeò strenuè ac fortiter tutatus est, ut non semel Amurathis & Mahometis penè invictos exercitus profligârit: nihilq; Turcis terribilius fuit, quàm Scanderbegi nomen.

Epiro sic in suam potestatem redactâ, ac Illyride & Bosnâ partim pervastatis, partim subactis, Amurathes in Serviam movit, ubi Georgium Despotam coëgit, ut sibi filiam Irenem (alijs Mariam) in matrimonium daret: verùm non curatâ affinitate, brevî, ut hostis redijt, ipsûmq; Regno expulit, capto filio seniore Stephano, quem barbarâ crudelitate admotâ pupillæ candenti æneâ pelvi, oculorum usu privavit.

Despota cum juniore filio Lazaro in Hungariam profugit. Rexerat tunc Hungariam Albertus Austriacus Romanorum Imperator ac Bohemiæ Rex, qui  
etfi



etsi arma pararet in Turcas, ut clades priores ulcisceretur, & depelleret hostes Regno imminentes, in ipso tamen apparatu, dissenteria correptus, ex peponum esu nimio, è vivis excessit.

Post quem Hungari elegerunt sibi in Regem VVladislaum Regem Poloniae, ut ita Polonorum societate vires Turcicae facilius infringi possent : qui ut de obsidione Albæ Græcæ seu Belgradi, Urbis ad confluentem Danubij & Savi in clivo sitæ, quam Amurathes summa vi oppugnarat, intellexit, mox Joannem Hunniadem Corvinum Transylvaniae Præfectum eò cum exercitu misit, quem postea cum majoribus copijs ipsemet est secutus. Magnam tunc perpeffus est Amurathes tribus vicibus cladem, cæso Mezite Anatoliæ Bafsâ suo affine, & Carambejo Phrygiæ Bafsâ capto, ita ut non solum ab obsidione Belgradi turpiter discedere, sed amissâ potiore parte Mysiæ, Serviæ & Rasciæ, pacem ultrò à VVladislao petere coactus fuerit, quam VVladislaus siquidem intestinis bellis domi agitabatur, in decem annos cum illo fecit, Hungaris in Evangelium Christi, Turcis in suum Alcoranum jurantibus.

Brevi

Brevi tamen VVladislaus facti hujus poenitentiâ ductus, instinctu Eugenij IV. Papæ, & Juliani Cardinalis, quasi non licuisset ipsi inconsultis alijs Principibus, ac præcipuè summo Pontifice, pacem aut foedus ullum facere cum hoste omnium communi, supradictas decennales inducias rupit, & collectis copijs tum rectè, quando Amurathes in Asia cum Caramanno Ciliciæ Principe bello intricatus erat, ditiones illius invasit, & Victor ubique, ad Varnam usq; in littore Ponti oppidum, quod antiquitus Dionysiopolis vocatum est, penetravit.

Amurathes ubi rem comperit, illicò re compositâ cum Caramanno, quantis potuit itineribus ad Hellespontum reversus, copias suas, aut elusis arte, aut corruptis pretio speculatoribus, qui littora servabant, in Europam transmisit, & cum socijs, qui non procul ab Isthmo Thracij Chersonesi, haud sanè memorabili numero paulò antè coierant, sese conjunxit.

Ad pugnam ubi ventum est, itum est ferocibus animis, certatúmque diu fortunâ ancipiti. Victoria tandem Turcis cecidit. VVladislaus cum usq; ad Jani-

czaros, seu Prætorianos, quos Amurathes primum instituit, & tunc corporis sui eustodes habuit, pugnando penetrasset, ab illis telorum multitudine non tam confossus est, quàm obrutus : cujus caput hastâ infixum, per Græciam atque Asiam, ceu trophæum victoriæ populis ostentatum. Accidit hæc luctuosa clades die 10. Novembris, Anno 1444.

Tantâ Victoriâ elatus Amurathes, rectâ Peloponnesum petijt, & muro expugnato in Isthmo Corinthiaco bipartito agmine regionem illam ingressus est : ubi oppida multa cepit, deripuitq; , ac totum illum murum, qui regioni promunimento erat, dissipavit, ut impofterum ubicunque liberet copijs pervagari posset, facilisq; in eam undecunq; pateret ingressus.

Annis demum sequentibus Scanderbeg ille, de quo suprâ, recuperatâ Crojâ Patriâ suâ, ac universâ Epiro, Turcarum res vehementer afflixit à parte una : à parte verò altera Hunniades, ita ut Amurathes, qui ex voto, quod in Victoriâ Varnensi voverat, in sodalitium Eremitarum legis suæ secesserat, filio Mahomete admodum juvene sibi surrogato, coactus

coactus fuerit reassumere administrati-  
onem Regni, & cum utroq; decertare :  
sed cum insigni virium suarum jactura.  
Unde ab hoc infelici rerum suarum cur-  
su, usq; adeò acerbum ex animi dolore  
morbum concepit, ut è castris quæ ad  
Crojam urbem habuit, Adrianopolim  
relatus, paucissimis diebus, deliranti ve-  
sanôq; similis, exspiravit. Græci apo-  
plexiâ extinctum scribunt Anno 1449.

Post interitum Amurathis, filius ejus  
natus major Mahomet II. successit, qui  
administrationem Regni à cœde fratris  
sui, quem in conspectu suo multâ vi  
aquæ obrutum suffocari jussit, auspica-  
tus est.

Primum bellicorum operum ejus &  
terribile maximè fuit, Constantinopo-  
lis terrâ marîq; expugnata Anno 1453.  
die 29. Maij ; quæ tunc fuerit captæ  
Urbis facies, vix cogitatione, ne dum  
verbis quisquam assequi posset. Con-  
stantinus Palæologus Imperator, dum  
fugere & ex Urbe foras erumpere cona-  
tur, in ipsa porta collisione multitudinis  
conculcatus interiit : cujus corpori in-  
vento, Mahometes caput demi, & conto

B 2 infixum;

infixum, per castra & urbem, ad terrorem & lubibrium circumferri jussit.

Constantinopoli expugnatâ, triennio post Belgradum obsedit, acerrimèq; oppugnavit : sed irritò conatu, Hunniade cum socio consiliorum & laborum sibi adjuncto Capistrano, quodam è Franciscanorum sodalitiò strictioris Observantiæ Monacho, strenuè Civitatem defendente, qui Mahometem tantâ affecit clade, ut ille amissis circiter quadraginta millibus hominum, & machinis bellicis ferè omnibus relictis, accepto etiam in pectore sub læva papilla (secundùm alios in oculo) vulnere, turpiter retrocedere, & fugam dare coactus fuerit. Quod factum die 6. Augusti, Anno 1456. in cujus rei memoriam festum Transfigurationis Christi, quod antea celebrabatur in Ecclesia Græca tantùm, institutum quoq; est in Ecclesia Latina, quotannis sexto Augusti celebrandum. Mahometes verò fugam illam suam turpem, tam graviter & cum tanta indignatione sensit, ut de morte sibi consciscenda cogitavit. Brèvi post bellum in Asiam transtulit, ubi subjugatâ Cappadociâ, & Paphlagoniâ, Trapezuntem alteram

Im-



Imperij Orientis sedem obsedit, eamq;  
terrâ mariq; infestissimè oppugnatam  
cepit, potitus ipso Imperatore Davide,  
filijsq; duobus, & Calo-Joanne Patruale,  
quos præmissos Byzantium ad trium-  
phum, deinceps crudelissimè interemit,  
excisâ cum his totâ Comnenorum stirpe,  
Anno Christi 1459. Et tunc subjugatis  
duobus Christianorum Imperijs, Con-  
stantinopolitano scilicet & Trapezunti-  
no, Imperatoris Turcarum nomen con-  
secutus est.

Trapezuntis Regno in formam Pro-  
vinciæ redacto, Caramanno quoq; Cili-  
ciæ Rege eodem victoriæ cursu debellato,  
Byzantium reversus est. Postea cum  
Venetis & Genuensibus navalibus copijs  
decertavit, & immissâ classe in mare  
Ægæum, Lemnum, Lesbum, & Eubæam  
insulas occupavit, Corinthum, Mytile-  
nen, Chalcidem, & alias nobilissimas  
urbes cepit, tantumq; terrorem alijs di-  
tionibus Venetorum incussit, ut pacem  
suppliciter petere, & annuo tributo sese  
obligare coacti fuerint; quo tempore  
Solymanus Balsa, etiam Tartaros Præ-  
copitas, ipsi tributarios fecit. Movit  
quoq; exercitum contra Draculam VVa-

lachorum Principem, à quo circumventus in tantum venit discrimen, ut per eundem ipsi & exercitui fuerit, nisi cum recentibus copijs maturè ipsi succurrisset Mahometes Bassa. Deinde superiorem Mysiam & Illyricum aggressus, Stephanum Bosniæ Regem Jaitzæ obsedit, quem postea subdolè ad colloquium evocatum, cute vivum exui iussit, sicq; non tantum Jaitzam Bosniæ Metropolim, sed & ipsum Regnum cum magna parte Rasciæ & Serviæ potestatis suæ fecit; paulò post tamen pleraque illa Matthias Corvinus Hungariæ Rex vi recepit, & Mahometem reversum ad novam Jaitzæ obsidionem solâ tantum famâ adventûs sui repulit: qui cum expectare non ausus, machinis in aquam demersis, citatum agmen in Thraciam abripuit magis, quàm reduxit.

Sequentibus annis, cum Principes Christiani mutuis inter se certâssent odijs, Mahometes Isabegum notæ crudelitatis hominem in Europam misit: qui non tantum maritimam Illyrici oram, sed Slavoniam quoq; ad Italiæ & Carinthiæ usq; fines pervagatus, multa hominum millia, nemine resistente, in miserrimam captivi-

ptivitatem abduxit. Misit etiam ad oppugnandam Rhodum Mesitem Bassam cum valida classe, & Achmetem Bassam in Italiam; ipsemet verò transijt in Asiam contra Soldanum Ægypti. Mesithes post multas & cruentas, sed irritas Rhodi oppugnationes, classem reducere coactus est, cum dedecore summo & detrimento. Achmet Hydrunto in Apulia expugnatâ, terrorem Italiæ tantum incussit, ut pleriq; è vicinis urbibus, etiam Româ fugientes, tutiora quæsiêrint.

Mahometes verò in Asiatica professione apud Nicomediam repentè dolore colico correptus, extremum vitæ diem triduo cruciatu festinatâ morte clausit, Anno 1481. die 3. Maij, magno Reipublicæ Christianæ commodo; nam aliàs redeunte Achmete, qui viginti quinq; millia Turcarum in Italiam adducebat, inchoatum victoriæ cursum prosecuturus, non modò de Apuliæ Regno, sed de tota Italia, actum fuisse credebatur: sed morte Mahometis, quâ auditâ, præsidia Turcica, quæ tenebant Hydruntum, salvâ vitâ, Alphonso Regi sese cum urbe tradidêre, Italia à periculo imminente liberata est.

Mortuo Mahomete filius ejus Bajazetes II. profligato fratre Zyzimo Imperij æmulo, Regnum avitum suscepit. Hic anno Regiminis sui tertio, partem VValachia & Moldavia subegit, nonnullis arcibus ad Istri ostia expugnatis, inter quas præcipui nominis Kyla recensetur. Postea in Asiam contra Suldanum, Ægypti bellum transtulit, infelici tamen eventu: nam bis profligatus, semel ad Adenam, secundò ad Tharsum, è centum millibus vix tertiam partem reduxit, captis duobus primis Bassis, Achmete & Mesiche. Quâ clade vix ullam majorem Turcæ pertulisse putantur.

Re compositâ cum Ægyptio, & morte Regis Hungarorum Matthiæ auditâ, Cadum Bassam cum exercitu ad infestandam Hungariam misit, qui prostratis copijs Slavonum & Croatarum, non procul à Savo, totum ferè Illyrium impunè depopulatus est. Inde Venetis bellum intulit, quòd Joannem Castriotum Scanderbegi filium, in repetitis, quæ eripuerat Mahomethes, contra pactas secum inducias adjuvissent, & Methone, Carrone, Dyrrachio, validissimis urbibus, aliisq; compluribus locis in potestatem

statem redactis, classéq; Venetorum disiectâ & fugatâ, Venetos totâ Achajâ & Ætoliâ, omniq; Peloponneso ejecit; ita ut Veneti hoc bello petiti, perculsiq; ad Hungariæ, Hispaniæ & Galliæ Reges, implorandorum auxiliorum gratiâ recurrere supplices coacti fuerint.

Bajazetes tot & tanta auxilia perpendens, insuper de novis in Asia motibus inaudiens, obtulit Venetis pacem, quam illi tædio infelicitis belli, atq; exhausti ærarij difficultate coacti, amplexi sunt. Et tunc quoq; VVladislaus Rex Hungariæ & Bohemiæ octennales inducias cum Bajazete pactus est: propter quod alij Principes Regi plurimùm obloquebantur, ejus vecordiam criminati.

Interea Ismael Sophus filius Harduellis Reguli Persici, qui Halim interpretem Mahometanæ Legis sequebatur, contrarium Homaro, quem Turcæ sequuntur, oppresso Jacuppo Rege Persarum, Regnum ipsemet occupavit, & occasione innovatæ in Mahometana secta Religionis, mirificè rem suam auxit, ita ut clientes ejus sectatorésq; sub duce Techille, qui erat discipulus Harduellis, ardore propagandæ Religionis accensi,



non tantum vicina Persidi Regna subegerint, sed in Cappadociam usq; & Lycaoniam felicibus armis penetrarint, Sultanum Corcut filium Bajazetis fugarint, & binos Bassas Caragyum & Halyum, geminosq; exercitus duobus duobus oppressis occisione deleverint, penè citius, quàm magnitudo periculi Bajazeti innotuerit.

In locum Haly Bassæ successit Junus Bassa, qui collectis majoribus copijs, Techillem tandem Asiâ minore ejecit. Porro ab illo tempore Persæ à Turcis in quibusdam legibus sectæ Mahometanæ dissentiant.

Post bellum Asiaticum, aliud intestinum Bajazeti tunc Adrianopoli habitanti, & dolore articulorum correpto, ambitione Selymi natu minoris filij exortum est. Quanto minùs ante prævisum, tantò sævitiâ ac sceleris atrocitate terribilius. Cum enim Bajazetes de successore deligendo cum Purpuratis deliberate cœpisset, & in Achmetem majorem natu filium propensioris animi esset : Selym re intellectâ per Mustapham Bassarum Principem, Patrem bello adortus est, habitis etiam auxiliaribus  
copijs

copijs à Tartaro Præcopite, cujus filiam in uxorem duxerat. Et cùm id non successisset, Patriq; reconciliatus esset, largitionibus egit, quibus tam Purpuratos, quàm Prætorianos seu Janiczaros corrupit, ab iisq; Imperator proclamatus est, ac statim Imperium à parricidio auspicatus, Patrem sibi Regno cedentem, & Dydimotichum ad natale solum, hortorum amœnitate & Coeli temperie ad capeffendam quietem opportunum secedere volentem, veneno pharmacis per Hammonem Judæum Medicum indito, è vivis sustulit, Anno 1512.

Patre sublato, mox etiam in fratres eorúmq; filios rabiem exprompsit, necatis quinq; adolescentibus, fratrum qui jam decesserant, filijs, fratribúsq; duobus, Achmete & Corchuto strangulatis. Nec pepercit Mustaphæ, cujus subnixu ad Imperium conscenderat, quem strangulatum prius, canibus deinde dilacerandum objecit. Supererant duo filij Achmetis, Amurathes & Aladinus, quorum hic ad Campsonem Ægypti Sultanum, ille ad Hismaëlem Sophum fugit. Unde novorum bellorum causa Selymo conflata, liberavit Orbem Christianum

stianum summo, quod ab illo impendebat, discrimine. Nam cum Persæ irrupissent in Cappadociam, coactus fuit Selym transire in Asiam, ubi coadunatis ad centum & quinquaginta armatorum millibus, in campis Caldæronis ad Choim Urbem, cum Persis prælium iniit, quod ultimo cedente ex acie Hyfmaele, propter vulnus sclopeti ictu in humerum inflicto, victoriâ Selymi diremptum est. Cruenta tamen nimis fuit illi hæc victoria : nam supra triginta millia hominum ex suis amisit. Postea convertit arma in Aladolum Regem, qui Regioni Montanæ, Turcis Dulgadir dictæ, Tauro & Antitæuro montibus circumdatæ, præfuit : contra quem Synanem Bassam cum exercitu misit, belloque victum cepit & occidit, atq; ita Regnum ipsius totum occupavit ; quod cum in tres præfecturas divisisset, contulit se Iconium in Lycaoniam, inde in Europam, limites sui Regni à parte Pannoniæ defensurus. Eo enim tempore Joannes Transylvaniæ Dux, contractis copijs, ad decem millia peditum equitumq;, bellum in Turcas suscepit, & arcem quandam æquali ferè intervallo,

vallo, inter Albam Græcam & Samandriam sitam, quæ Turcis & Thracibus Dalinatisq; Cavalla, Hungaris verò Samo vocatur, validâ obsidione cinxit: infelici tamen conatu, nam à Bali Bego Samandriæ Præfecto, castris exutus fugatusq; est. Quod factum Anno 1515. paucis diebus, antequàm fuerit Imperatoris Maximiliani, & Regum, VVladislai Hungariæ, & Sigismundi Poloniæ habitus Viennæ conventus.

Cùm postea Selym nihil prorsus moveri contra se ab Europeis Principibus advertisset, rediit in Asiam cum novo multoq; prioribus majore belli apparatu, non alio fine, quàm ut Campsonem Suldanum Ægypti tolleret, Imperiûmq; Mamalucorum sibi subjugaret. Quod & factum: nam præter spem & opinionem Campsonis, magnâ celeritate superatis Tauri jugis, pervenit in Camagenam, ubi cum Campsone acie congressus, eo eventu pugnavit, ut Cajerbego Præfecto Alepi & Comagenæ insigni perfidiâ Campsonem non modò deserente, sed quoque infestis persequente armis, Mamaluci fusi fuerint, & Campson ipse armis multoq; abdomine gravis, cadente

equo conculcatus interierit. Quo successu, totam Comagenam occupavit, & ducto in Syriam exercitu, primo statim ingressu urbes præcipuas, ut Hierapolim, Damascum, Tripolim, Berytum, Sidonem, Ptolemeidem, & alias in deditio-  
nem accepit, ac fuso iterum ad Gazam Urbem exercitu Arabum, Gazâq; occupatâ iter in Ægyptum sibi aperuit.

Interea Mamaluci Memphim seu Alcairum ex fuga delati, in Campsonis locum delegerunt Tomumbejum Circassum, qui Selymo obviam egressus ex urbe cum tota sua vi, ita quoq; infelicitè pugnam iniit, ut amissis illustrioribus Præfectis, & flore equitum vi tormentorum perturbato, intra urbem se recipere coactus fuerit, tanquam ibi ultimo jam de Imperio, de liberis, de vita decertaturus. Neque tunc Selym fortunæ suæ defuit, sed teleritate usus, magno ausu urbem aggressus est, quam die tertiâ perrupit, Mamalucis penè omnibus internecioni datis, ipsôq; Tomumbejo capto, quem diu in quæstione de thesauris acerbissimè tortum, ac tandem mulæ impositum, pérq; urbem circumductum, laqueo de collo pendente, & manibus à tergo re-

vin-



vinctis, victor Selym ad portam Syriæ unco ferreo suspendi iussit. Sic Regnum Mamalucorum in Ægypto, quod duravit annos circiter ducentos & quinquaginta, serie numeratâ à Turquenienio usq; ad Tomumbejum, demolitum est. Erant autem Mamaluci illi pleriq; Circassi de gente Heneta Christianis parentibus orti, ac postea abjurato Christo Mahometanis sacris initiati ac circumcisi : unde Mamaluchi, idem quod circumcisi, sonat. Selym Ægypto & Syriâ in Provinciam redactis, Byzantium redijt triumphabundus, ac postea brevi ulcere canceroso correptus, ultricibus furijs, eo ipso in loco, quo Bajazetem Patrem acie circumfusum opprimere conatus fuerat, extinctus est. Anno 1520. Septembri mense.

Successit ipsi filius unicus Solymanus, viginti circiter annorum ætate ex Præcopite Tartari Principis Alpij Sultani filia genitus, qui eodem ferè tempore & mense Constantinopolim ex Cappadocia advectus imperare coepit, quo Carolus V. Aquisgrani primâ Romani Imperij coronâ insignitus fuerat. Hic primo inaugurationis suæ anno, spretis novi Hungariz

garix Regis Ludovici juvenilibus annis,  
 & Proceribus de administratione Regni  
 discordantibus, Albam Græcam Hunga-  
 riæ repagulum adoritur, acerrimè oppu-  
 gnat, ac tandem capit, præfidiarijs contra  
 fidem datam omnibus trucidatis. Saba-  
 tium quoq; nobile ad Savum oppidum  
 adortus, vi in potestatem redegit. Quo  
 facto, & utroque præsidio validâ manu  
 munito, Adrianopolim redijt. Anno  
 verò sequenti Insulam Rhodum aggressus  
 est : quæ etsi à fortissimis Equitibus, seu  
 Crucigeris, eorúmque Principe, quem ipsi  
 magnum Magistrum vocant, Philippo  
 Villerio natione Gallo pertinacissimè  
 defenderetur : tamen post toleratas sex  
 mensium continuæ oppugnationis aspe-  
 ritates, nemine ex Principibus Christi-  
 anis in auxilium accurrente, eò quòd  
 ipsimet civilibus bellis implicati armis  
 inter se dimicarent, in manus Solymani  
 devenit : destituti enim Equites omni  
 ope humanâ divinâq; , ad deditionem  
 ejus, ipso Christi Dei Natali die, com-  
 pulsi sunt, pacti corporum & rerum sua-  
 rum incolumitatem, quam Turcæ ipsis  
 utcunq; præstiterunt. Eâdem summi  
 infortunij clade Insula Cos, Hippocratis  
 patria,

patria, ac cæteræ eorundem Equitum conditiones, quas in Caria, Halicarnasso, alijsq; Asiæ locis habebant, simul in hostium potestatem concesserunt.

Quarto anno post, Solymanus denuò in Hungariam expeditionem suscepit, & trajecto Savo, Varadinum Petri, oppidum in Danubij ripa præalta in rupe situm, obsedit, viq; expugnavit: quod & Villaco fecit, Hungaris tardè nimis ad arma sese disponentibus, quorum cum congregata fuissent viginti sex millia tantum, & adesset ipse quoque Rex, fatis ita urgentibus, antequam auxiliatrices copiæ ex Transylvania, Illyrico, Bohemia, Moravia & Silesia, quæ insignes fuerant, & jam propè aderant, convenissent, prælium non procul à Mohatio inierunt, in quo fusi fugatique omnes. Rex fugâ salutem quærens, in cœnosum quendam rivum, cum illum transire, & aggerem ripæ superare voluisset, reflexis habenis, resupinatôq; equo cecidit, ubi degravantium armorum pondere, & equi colluctatione oppressus, interiit. Periêre eo prælio partim in acie, partim in fuga, decem millia equitum, ac circiter duodecim millia

lia peditum ; è Nobilitate verò clari  
nominis ampliùs quingenti, Archiepi-  
scopi duo, Episcopi quinque. Contigit  
hæc memorabilis simul & miserabilis  
Mohaciana clades Anno 1526. die 29.  
Augusti

Inde hostis in populationem effusus,  
nullum crudelitatis genus prætermisit,  
omnia ad Balatonem usq; lacum ferro  
flammâq; devastando. Budam quoq;  
Regni caput omni præsidio nudatam,  
nullo negotio cepit, & diripuit. Inter-  
eà nunciatur ipsi de domesticis tumul-  
tibus à quodam Calendero Celebio in  
Asia excitatis : quare omnibus, quæ  
inter Danubium & Dravum occupave-  
rat, locis, atq; ipsâ etiam Arce & Civi-  
tate Budensi sine ullo præsidio relictis,  
Byzantium est reversus.

Anno postea tertio, cùm Ferdinandus  
Rex Bohemiæ, & Joannes Dux Transyl-  
vaniæ, uterq; à sua factione in Regem  
Hungariæ coronatus, de possessione  
Regni armis decertarent, denuò in Hun-  
gariam cum ducentis millibus redijt,  
à Joanne in auxilium vocatus : unde  
non tantùm in Hungariam, sed & in  
vicinas Imperij Romani Provincias, verè

Ilias

Ilias malorum redundavit. Nam Solymanus suscepto in clientelam suam Joanne, satis non habuit, quod ex omnibus ferè præsidijs Hungariæ militem Ferdinandum ejecerit, sed ad Viennam usq; progressus, Urbem totius Christiani Orbis propugnaculum arctissimâ obsidione cinxit, & per dies viginti duos acerrimè oppugnavit. Quam etsi non occupârit, divinâ magis ope, quàm humanâ, ut olim ab Assyrijs Hierosolymam, defensam, magnâ tamen clade affecit viciniam totam, devastando flammâ ac ferro universa, abductâ etiam ingenti multitudine hominum in crudelem servitutem.

Anno iterum tertio, multò numerosiore collecto milite Styriam invasit, & ad Græcium usq; penetravit: Cassanum verò unum è suis Ducibus cum Acangijs, qui sunt prædatorij equites, suo ære, sed quintâ prædæ parte Principi attribuendâ militantes, Lincium versûs, ad depopulandam vastandâmq; Austriam superiorem, misit. Sed cognitis Caroli Cæsaris ac Ferdinandi Regis viribus, qui cum millibus triginta equitum, & nonaginta peditum, adventum ejus in Austria

stria præstolabantur, Panico quodam terrore perculsus, sæpèque respectans, num ab illis à tergo, aut à fronte, aut à lateribus invaderetur, nullâ re memorabili peractâ, tumultuariè Styriâ discessit, & pro tutiori trajecto ad Marpurgum Dravo, quem transnatare debuit cum omnibus suis copijs (incolæ enim & pontem cum publicis disiecerant, & lintres ubiq; omnes cum pontonibus & navigijs cujusvis generis, ne hostibus usui esse possent, concremaverant) non sine multorum jactura, duro satis strictissimòq; inter Alpes & Dravum itinere, domum properavit. Cassanus verò à nostris inter devia & saltus exceptus, cum suis penè omnibus interiit. Pulchra tunc aderat occasio persequendi hostem, aut recuperandi saltem amissa : tantus enim fuit tunc Cæsaris ad Viennam exercitus, quantum ad eum usq; diem è Germaniæ finibus vix quisquam eductum meminerat; sed nihil amplius factum, Cæsare in Italiam ac inde in Hispaniam cum copijs recedente.

Variâ deinde fortunâ in Hungaria res actæ sunt : donec tandem transactione pacis ad hunc modum, ut Joannes usq;  
ad



ad obitum Regno potiretur, post obitum  
ejus Ferdinandus, aut unus è filijs suis  
succederet, factâ, quievisset. Interea  
Solymanus bellum in Asia profecutus est,  
ubi primo successu magnas Persis intulit  
clades, Tebriso, Babyloniâ, alijsq; per-  
amplis urbibus occupatis : postea ta-  
men gravi prælio cœsus, fugatusq; est.  
Quod contigit & Vezirio Barbarossæ,  
quem Cæsar cruento bello vicit, & Tu-  
neto recuperato, Affricâ eiecit.

Mortuo Joanne Rege Anno 1540. de-  
nuò funestum recrudit in Hungaria bel-  
lum. Nam paulò ante obitum filius ei  
natus fuerat Joannes Sigismundus, quem  
nonnulli Proceres, post sepulturam Pa-  
tris, in Regem Hungariæ coronârunt, in-  
dito ei Stephani nomine ; & cùm Ferdi-  
nandus Regnum repetijisset, à Solymano  
contra illum auxilium implorârunt :  
quorum temeritas & præcipitata in eam  
rem consilia vix non toti Regno quon-  
dam florentissimo supremam cladem  
atq; excidium attulisse visa sunt. Quippe  
Solymanus præmisso in Hungariam Ma-  
homete Bafsâ cum copijs, mox & ipse  
anno sequente cum Prætoriano exercitu,  
& duobus filijs suis Mechemete & Selymo  
acce-

accelerat, & positis ad Budam castris Mat-  
tri viduæ nunciat cupere se filium vi-  
dere, ut sibi eum in castra mittat. Quo  
facto, iterum significat, velle sibi Urbem  
tradi,, eò quòd ipsamet non haberet tan-  
tas vires, quibus eam contra hostes de-  
fendere posset. Interim fortissimis mi-  
litum datur negotium Urbis occupandæ,  
qui per simulationem visendæ urbis, u-  
nam portam post alteram tacitè, sine ul-  
lius rixæ tumultu, occupârunt, ut custo-  
des, & cives, ac alij vix factum animad-  
vertisse viderentur. Occupatâ Urbe re-  
mittitur ad Matrem filius, quem subse-  
quutus Solymanus, Matrem cum pupillo  
specie infauitissimæ clientelæ deceptam,  
sede Regiâ decedere, & in Transylvaniam  
migrare jubet.

Hoc modo Regina, ne vultu quidem  
testari dolorem ausa, tacitis solùm votis  
perfidiam Tyranni detestata, necessitati  
cedere, & Budâ in Transylvaniam exce-  
dere coacta est. Solymanus relicto Bu-  
dæ Pestiq; Præsidio, unâ cum Solymano  
Bassa natione Hungaro, reliquum exer-  
citus domum reduxit.

Vix duo anni exierant, cùm denuò  
expeditionem in Hungariam suscipit,  
suasu

suafu Regis Galliarum Francisci, quasi  
 jam de toto Regno cum Ferdinando,  
 (cui paulò antè magnæ copiæ è Germa-  
 nia, Duce Joachimo Brandeburgico,  
 Imperij Septemviro in auxilium vene-  
 rant) decertaturus. Mittit etiam, suafu  
 ejusdem, Hariadenum Bassam cum va-  
 lida classe, ad vexandas & depopulandas  
 Hispaniæ & Italiæ, Siciliæq; oras, ne  
 Cæsar & Ferdinandus bello petiti & di-  
 stracti, sibi invicem opem ferre possent.  
 Solymanus Hungariam ingressus, Val-  
 ponem, Soclosiam, Quinque Ecclesias,  
 aliâq; vicina oppida, partim vi, partim  
 deditione cepit: postea Strigonium,  
 Albam Regalem, & Tatam aggreditur,  
 & ijs quoq; occupatis, atq; ita potiore  
 parte Hungariæ in formam provinciæ  
 redactâ, cùm non fuerint sufficientes  
 nostri ut resisterent, triumphanti similis  
 Byzantium reversus est.

Anno subsequente, Cæsar & Ferdi-  
 nandus bello, quod postea contra Pro-  
 testantes gesserant, intenti, inducias ad  
 quinquennium cum Turca pacti sunt:  
 per quas Hungariæ residua pars è bar-  
 barorum incursionibus aliquantùm li-  
 berata fuit. His inducijs inclusi quoq;  
 Rex

Rex Galliarum Franciscus, & Senatus Venetus, Turcarum confœderati. Interea Solymanus vim omnem belli transtulit adversus Sechmam Regem Persarum, & Equites Melitenses, antea Rhodios dictos. In Persiam ipsemet transijt. Contra Melitenses Sinanum Bassam misit, ad oppugnandam Melitam cum valida classe. Utriusq; hujus expeditionis finis fuit, ut Sinan à Melita rejectus, Tripolim in Affrica, astu magis quàm vi, ceperit. Solymanus verò re modicâ cum Persis actâ, inglorius domum redijt.

Quinquennio elapso, cùm Ferdinandus Rex juxta conventionem cum vidua nomine pupilli factam, Transylvaniæ possessionem inijsset, Solymanus id graviter ferens, Mechmetem Beglerbegum, ac post illum Achmetem Bassam cum sexaginta millibus in Hungariam Transylvaniæ viciniorem misit, qui trajecto ad Saloncamenum seu falsum lapidem, Danubio, & Besquereco, Somlio, Chana-dio, Calyâ, Lyppâ, alijsq; compluribus Castellis occupatis, demùm etiam, post longam obsidionem Temesvario & Solnoko, magnâ clade nostros affecerunt.

Circa

Circa illud tempus Mustapha filius Solymani ex suspitione affectati Imperij, strangulatus est unà cum filio Mahomete : ac brevi pòst alter nomine Bajazetes cum quatuor nepotibus. Reliquus erat unus Selymus, cui etiam extrema minatus est crudelis pater, nì solus superesset.

Petierat tunc Ferdinandus à Solymano protrahi pacis inducias, sed ab illo præferocem ac superbum gerente spiritum, quem maximè causabat pax cum Persis facta, non potuit impetrare nisi semestres. Tandem ubi necessitate ita imperante Transylvaniam certis conditionibus Joanni Sigismundo tradidisset, seq; ad certum tributum quotannis pendendum Tyranno obligâisset anno 1561. pax ad octennium data, quam etiam Ferdinandus, quoad vixit, inviolatam servavit. Mortuo Ferdinando, Anno 1564. die 25. Julij, & Maximiliano filio successore relicto, cum res Pannonicæ, violatâ à Transylvano pace, iterum in apertum bellum exarsissent, Solymanus post tentatam irritò conatu Melitam, denuò vim belli omnem in Hungariam convertit, & cum tota mole copiarum,

quæ ad centum millia equitum, præter Janiceros & Asapos pedites, constituere ferebatur, ad Sigethum arcem munitissimam, inter Savum & Dravum cum oppido subjacente sitam, frustra antè ab Aly Eunucho bis oppugnatam, movit, quam obsidione arctissimâ, ac postea oppugnatione fortissimâ aggressus est, nostris tunc ad Jaurinum stantibus, neq; ulterius progredi audentibus.

Præerat ei loco cum Imperio Nicolaus Comes Zrinius, vir immortalis memoriâ dignissimus, qui adactis novo sacramento Tribunis, & militibus præfidiarijs, & se quoq; illis jurejurando obstricto, de non tradendo loco, sed ad extremum usque spiritum tuendo, ut aut libertas, salusq; omnium vindicanda esset, aut si fors ita ferret, honestissimâ morte pro Patria oppetendum, strenuè partes suas egit, ac per dies triginta duos animo imperterritito oppugnationem, sustinuit. Tandem expugnato ab hostibus novo & veteri oppido incensâq; arce, cum videret se atrocitate incendij, quod extingui nullo modo poterat, magis quàm hostium vi, in extremas angustias reductum, statuit cum suis in  
con-



confertissimos hostes erumpere, ut fortiter pugnando caderet potius, quam flammis hauriretur. Quare sermone prius ad milites habito, & eorum animis in pulchram mortem excitatis in hostem erupit, & obvia quæq; ferro sternendo, duobus è sclopeto ictibus trajectus concidit: tantòq; ardore tunc pugnatum est, ut è trecentis, vix quatuor vivi in hostium potestatem pervenerint. Atq; ita ultimò arx exusta à Turcis obtenta est, in cujus illà totà obsidione viginti millia Turcarum interierunt. Expugnationem illius tamen Solymanus non vidit, nam triduo antè morbis & senio gravatus, superveniente etiam alvi profluvio, è vivis excessit, Mechmete Vezyrio, donec Selynum de morte Patris certiolem redderet, usq; adeò obitum ejus occultante, & ut fama erat, etiam medico Judæo, qui curam ipsius egerat, arctioris silentij causa neci dato, ut nemo in castris extinctum illum etiam post captam arcem scire potuerit.

Selymus paterno Imperio potitus, mox in novos belli apparatus incubuit, quorum fama ita Cæsarem Maximili-

anum pereulit, ut pacem ab illo petere constituerit. Itaq; re in Comitijs Posonienſibus comprobata, Legatos Byzantium cum muneribus & pecunia miſit. Quibus eò delatis, pax non multò poſt, ad annos octo, ab anno 1568. incipiendo conficitur, ad eum modum, quo antea cum Solymano, hoc ſolùm addito, ut quisque ſibi retineret, quod eo bello cepiſſet. Erantq; Turcæ in his inducijs concedendis eò promptiores, quod jam tunc ſecretioribus conſilijs bellum in Venetos, pro Cypro Inſula eis adimenda, meditarentur. Quod brevi poſteà evenit: nam rupto derepentè fœdere pacis, Selymus Muſtapham, unum è purpuratis cum apparata claſſe ad oppugnandam Cyprum miſit, qui captâ primùm per deditiōem Nicofiâ, ac deinde Famaguſtanis poſt ſextum, obſidionis menſem ſeſe deditibus, & trucidatis contra datam fidem Venetorum ſtipendiarijs, ipſiq; Bragadino Duci crudelem in modum cute vivo detractâ, totam Inſulam in poteſtatem redegit, Anno 1571. Menſe Auguſto.

Sequenti verò Menſe, cùm Veneti junxiſſent claſſem ſuam cum claſſe Pontifi-

cis Pij V. & Philippi Hispaniarum Regis,  
 & cum Turcis ad Echinadas Corinthiaci  
 sinus Insulas prælium inijsent, Deo Op-  
 timo auspice, insignem atq; in omne æ-  
 vum memorabilem victoriam reportâ-  
 runt: devictâ partimq; profundo mersâ,  
 partim captâ hostium classe, ac cæso Aly  
 Basâ, ita ut præter ingentem navium &  
 tormentorum numerum amissum, & va-  
 lidissimæ classis jacturam, triginta am-  
 plius Turcarum millia ceciderint, qua-  
 tuordecim ferè millibus Christianorum,  
 qui ex varijs nationibus ad transtra re-  
 migium catenis constricti diram servitu-  
 tem serviebant, singulari Dei ope libe-  
 ratis: quorum magna pars ex Pannonijs  
 per varios casus interceptis constabat:  
 qui à victoribus domum remissi, post-  
 liminio læti redierunt.

Post eam victoriam conabantur Ve-  
 neti recuperare Cyprum, sed frustra, ali-  
 qua tantummodò oppida in Albania &  
 Dalmatia vicina mari de potestate Tur-  
 carum eripuerunt: nec multò post, præ-  
 posteris usi consilijs, nescio Pontifice,  
 nec Hispano Rege admonito, clam cum  
 Selymo, relictâ illi Cypro, pacem inie-  
 runt. Hoc factò Selym misit Synanem

Bassam in Africam cum ingenti classe, in qua centum quinquaginta triremes, ac triginta onerariæ naves numerabantur, contra Hispanos, qui Tunetum ceperant. Synan erepto Tuneto & Guleta munitissimo Oppido Castellóq; vi expugnatis, Hispanorumq; Ducibus partim captis, partim Africâ totâ ejectis, incolumem victricémq; classem reduxit. Sed Selymus non diu eâ victoriâ lætatus, in gravem lethalemq; morbum incidit, quem cum superare non potuisset, Idib: Decembris, Anno 1574. extinctus est.

Selymo successit filius Amurathes illius nominis III. qui simul ac sceptris potitus est, quinque Fratres natu minores, Mahometem, Aladinum, Giangirem, Abdulahem & Solymanum crudeli parricidio, ipsemet immotis oculis atrocitatem facinoris inspectans, strangulari iussit: ac deinde stabilito in præsens dominatu, & cum Cæsare pace in aliud octennium prolongatâ, bellum adversus Mehmetem cognomento Hodabendem Persarum Regem movit, quod continuò per quindecim annos variâ fortunâ, ac sibi semper adversa gessit. Etsi enim loca aliqua circa Caspium mare, ubi inte-

interior Sedes Persarum Regum erat, occupasset : extrema tamen & ferè incredibilis copiarum ipsius strages, aliquor prælijs & conflictibus edita est ; ejusq; exercitus, cui primùm Mustaphas, item Osmanes, deinde Synan, postremò Ferhates præfuerunt, non semel ad internecionem fusus, fugatusq;. Interim in Hungaria etsi inter nostros & Turcas fuissent firmatæ induciæ pacis : sinebant tamen utrisq; liberam excurrendi in hostiles fines facultatem, negato solum tormentorum in oppugnandis Arcibus usu & conatu. Unde fiebant excursiones utrinq; & cædes.

Et tum temporis Ugvarinum seu Novæ Arces, munitio præstans, à Friderico de Zierotin Barone Moravo, jussu Cæsaris ad Nitriam flumen, quò magis excursiones Turcarum in regionem Vagi cohiberi possent, ædificari cœpta, expensis ut plurimum Moravorum, Bohemorum & Silesiorum.

Ad finem anni 1583. induciæ iterum ad novem annos subsequentes, initio à Calendis Januarij ducto, prorogatæ sunt : quas tamen Turcæ non servârunt : nam iusto foedere cum Persis anno 1590. vim

belli totam contra Cæsarem fide indu-  
 ciarum illarum confisum, suadente ita  
 Synano purpuratorum Principe, & Ha-  
 sane Bosnæ Præfecto rem actu exequen-  
 te, nefariè transtulerunt. Et quia Mu-  
 phti summus superstitionis Mahome-  
 tanæ Antistes, in Divano, quo nomine  
 publicum à Turcis consilium vocatur,  
 potentissimis rationibus, longâq; oratio-  
 ne bellum tam iniquum cum amicis &  
 confederatis disuadebat, & ad pacem,  
 ut ea omnibus, quibus concessa est, in-  
 violata conservaretur, hortabatur, ad-  
 dens se, omnibus illis, qui aliter suase-  
 rint, & fecerint, communione & com-  
 mercio hominum & aquâ ac igni inter-  
 dicturum, animas verò diris cacodæmo-  
 nibus apud inferos æternis ignibus ex-  
 cruciandas, traditurum; Synan etsi id  
 graviter indignéq; tulisset, ceu Author  
 illius belli & concitator, profundâ ta-  
 men dissimulatione id intra se suppressit,  
 vocatôq; Muphti honoris gratiâ in con-  
 vivium, venenum inter epulas ei clâm  
 præbendum curavit, quo tabefactus, an-  
 tequam suasores & auctores belli excom-  
 municare posset, è medio tolleretur.  
 Illo autem extincto Amurathi persuasit,  
 nimio



nimio imbecillis senectæ vitio, ita repentè fuisse exanimatum.

Mox ergo in autumno Anni 1591. Hasanes collectis copijs cum quinque armatorum millibus, ac totidem tormentis, acerrimam ad Zagrabiam usq; irruptionem fecit. Cujus exemplo motus alter Hasanes cognomento Parvus, qui Sigethanam Provinciam obtinebat, in Hungariam quoq; excurrit, & arcem Conariam improvise impetu capit, & diripit; & hic quidem prospero successu: sed ille in reditu à nostris interceptus, non solum tormenta, sed potior rem quoq; partem prædæ, unà cum quadringentis Christianis promiscui sexûs, deferere coactus fuit. Quo casu irritatus, etsi arcem Sissicum obsederit, rem tamen vano conatu egit: imò cum secundò obsidionem aggressus fuisset, à nostris victoriâ solenni fugatus, in Culpa flumine, quem transnatare voluit, miserè periit: sicq; primus ex auctoribus violati fœderis, perfidiæ ac temeritatis, suæ pœnas fadâ morte persolvit.

Interea Cæsar nihil minùs, quàm quicquam adversùs fœdera & pacta admissum cupiens, munus quod à biennio

varijs de causis intermissum erat, sine ulla mora curari, & Comoram secundo Danubio mitti iussit, ac Adamum Galum de Lobkovitz, clarum in Bohemia virum, à quo illud Byzantium deferretur, Legatum constituit. Sed cùm advertisset, Synano medium quò minùs deferri posset impediante, tolli omnem spem pacis, revocavit illum, & pecuniam pro munere destinatam, in usum belli convertit.

Itaq; rebus manifestè ad arma deductis, bellum suscipitur, summâ belli à Cæsare Ekenbergo, ab Amurathe Synano commissâ. Brevi pòst Synan astu magis, quàm vi Sissicum occupat, inspectantibus penè nostris, qui numero longè inferiores, obsessis, licèt maximè velent, opem ferre non potuerunt. Occupat etiam Vesprinium & Palotam.

Tandem, ubi nostri collegissent omnes suas copias, ad quadraginta millia bellatorum, Albam Regalem aggreduuntur, Basámque Budensem, qui cum ingenti exercitu obsessis in auxilium venerat, gravi prælio cœdunt, ita ut peditum sex millia, equitum quatuor millia interierint, nostris solùm 40. de-

sidera-

fideratis : potuissētq; tunc Alba facili negotio recipi, sed cū hiems instaret, & com meatuum pulverisq; non esset sufficiens copia, placuit in hyberna militem deduci. Circa illud tempus etiam Tiffenbachius, qui Cassoviæ Pannoniæq; superiori imperabat, Sabatiam & Filetum, in quo Turcæ post Budam maximam fiduciam collocabant, cepit, & junctis suis copijs cum Battorio & Humanajo Hungaris, Turcas ad Seceniam fugavit : quo felici eventu, plures adhuc in vicinia arces, ut Plabenstein, Divinum, Zamoscium, &c. occupavit. Ita Dei beneficio vix menstrui spatio, non exigua Hungariæ pars, à Turcarum servitute liberata fuit.

Anno sequente, videlicet 1594. Mathias Archidux, cui Præfectura belli Pannonici à Cæsare fratre demandata erat, Novigradum obsedit, quo pertinaciter oppugnato, obsessorum animi ita ultimò concidēre, ut candidis protensis vexillis, pacem flagitarent. Transactum cum illis, & abeundi omnibus facultas concessa : cautum tamen, ne quid præter singulos enses auferre liceret. Strigonium deinde oppugnandum

Archidux sibi sumpsit, & quamvis unam urbis partem, Rascianorum qui in urbe erant, proditione occupâisset, ulterior tamen in primario oppido & arce occupanda irritus fuit conatus, eò quòd subsidia, quæ Budâ ferè quotidie submittebantur, excludi non potuerint. Insuper Synanem Bassam cum centum & quinquaginta millibus obsessis opitulatum adventare nunciatum est : quare ne castra opprimerentur, Archidux obsidionem solvit ; similiter Tiffenbachius, qui arcem Hatvan obsederat, cùm de adventu ingentis hostium multitudinis cognovisset, solutâ obsidione, Cassoviam reversus est. Synan verò ijs cognitis Jaurinum obsidere decernit, moxq; eo universas copias, occupatâ in itinere Tatâ, & arce S. Martini, admovet, nostris ad Ovarium usque, non sine confusione & clade retrocedentibus.

Præerat Urbi Ferdinandus Comes ab Hardek, qui primò utcunq; impetum hostium forti animo toleravit, postea tamen auro ( ut ferebatur ) à Synane corruptus, tam diu de urbe dedenda, cum hostibus egit, usq; dum paciscendo convenisset, ipsique propugnaculum, illud

illud totius Orbis Christiani munitissimum, cum omni apparatu bellico, & annona tradidisset. Jaurinum secuta est Papa, etiam ignaviâ præfidiariorum perdita. Tali victoria Synan, in ampliore spem erectus, exercitum ad Comoram obsidendam duxit, magnâq; vi oppugnationem est aggressus, sed inopinato adventu Archiducis, qui collecto insigni exercitu Comoram versùs festinabat, quem plenis passibus sequebantur 16. millia Bohemorum & Moravorum, Petro Rosembergio duce, terribus, vasis conclamatis castrisq; incensis, copias suas Jaurinum reduxit, ac inde milite in hyberna dimisso (quod fecerunt & nostri) Constantinopolim redijt ovans.

Non multò pòst, Amurathes Turcarum Princeps, magnis pleuritidis doloribus vitam Imperiùmq; finivit, Nonis Januarij 1595. Mors illius totos decem dies occultata est, quoad filius ejus maximus natus, Mahomet nomine, qui tum in Amasia erat, per celeres equos Constantinopolim accerseretur. Is cùm Paternum Solium occupâisset, fratres suos omnes numero undeviginti strangulari,

matrésq; eorum Novercas suas in mare proijci & suffocari jussit : sicq; Imperium parricidio auspicatus est.

Interea Sigismundus Bathori Transylvaniæ Dux irritatus Synanis postulationibus iniquissimis, à Turcarum societate recessit, & cum Cæsare fœdere percusso, quem secuti Valachiæ & Moldaviæ Principes, arma & vires conjunxit. Erat tum exercitui Cæsareo summo cum Imperio præpositus Carolus Mansfeldius, recenter titulo Principis à Cæsare ornatus, qui in finibus Austriæ contractis copijs, quarum summa militum millia sexaginta excedere ferebatur, & disciplinâ militari bene stabilitâ in Hungariam movit, itérq; ambiguum, quò minùs, quam in partem bellum facturus esset, hostes scire aut explorare possent, diu traxit, ac tandem Strigonium, nec opinantibus hostibus, obsidione cinxit, Bassamquè Budensem, qui cum triginta millibus ad ferendum obsessis auxilium veniebat, insigni ac verè memorabili clade, quâ cæsa aut capta ad quatuordecim millia hostium, affecit, fugavitq;. Sed brevi post morbo correptus, fato concessit : Princeps aliàs longiore vitâ dignus,



dignus, si fata indulgere voluissent. Posthac obsessi, capto oppido, & cæso iterum Bassâ Budensi cum alijs auxiliatoribus; duobusq; Præfectis, Ali Bego, & Janizarorum Agâ amissis, dedere se, arcemq; coacti sunt.

Occupato Strigonio, arx Vissegradensis in præalto monte ad Danubium sita, tentatur & capitur. Circa illud tempus Georgius Comes Zrinius Nicolai Sighetanâ obsidione clari filius, vir & ipse summæ virtutis & fortitudinis, cum Herbersteinio Babotiam, inter Canisam & Sigethum ad Dravum flumen sitam, occupat: item Petriniam, Rastoviciam, & Goram. Deniq; tantus tum per universam Hungariam Turcarum animos timor invaserat, ut quæ olim maximis laboribus multoq; sanguine expugnaverant, turpissimè etiam, ne viso quidem interdum hoste, deseruerint. Interea Synan Bassa Valachiam ingressus, primo quidem impetu oppida aliqua cepit, & diripuit; sed brevi post à Michaële Veivoda prælio victus, turpi fugâ vitæ suæ consulere debuit, quo in fugæ tumultu in quodam ponte, quem à Valachis ruptum Turcæ subitaneo opere restau-

restauraverant, in paludem delapsum, & equi colluctatione, præter vestes & ora fœdè maculatum, duobus etiam excussis dentibus, vix à suis periculo ereptum fuisse ferunt. Accessit deinde Michaëli in succursum, pro eo ac juxta pacta debebat, Transylvanus, cum viginti millibus equitum hastatorum, & triginta duobus millibus peditum, qui expugnatâ Tergovistâ, & Aly Bafsâ Trapezuntino capto, iterum Synanem in fugam egit multò deteriore ad Danubium usque, quem noctis beneficio scaphâ vix transnari licuit. Denique tertio rursus turpissimè fugit, Byzantiúmque reversus, seu morte ac senio confectus, seu dolore rei malè infelicitérque gestæ, migravit è vivis.

Ad initium Anni 1596. Mahomet, habito cum suis consilio in Divano publicè purpuratis suis & Janiczarorum Tribunis pollicitus est, se æstate proximâ in Pannoniam cum exercitu iturum: proinde ut hujus futuræ expeditionis memores, sese ad castra & bellum pararent, seriò edixit. Collectis deinde ad ducenta armatorum millia copijs, movit in Hungariam, & Agriam obsedit, quam

quam post acerrimas impressiones & op-  
 pugnationes, tribus ferè septimanis diu  
 noctuq; factas, turpi deditioe Vallo-  
 num & Germanorum peditum, frustra  
 reclamantibus Guilhelmo Treczko, &  
 Joanne VVchynsky, Bohemis, aliisq;  
 Præfectis, & positis etiam genibus ad  
 constantiam exhortantibus (cùm jam  
 Maximilianus Archidux magno cum  
 exercitu appropinquaret, & ut certò  
 referebatur, intra biduum, aut triduum  
 Mahometes obsidionem soluturus erat)  
 traditam accepit. Cautum erat in de-  
 ditionis legibus, ut Præfecti vivi com-  
 mutandis captivis traderentur, præsi-  
 diarij verò cum impedimentis omnibus,  
 gladijs tantùm armati, discederent; sed  
 non servavit illud Tyrannus: mox enim  
 præfidiarios arce egressos, omnes in la-  
 tissimo quodam campo crudelem in  
 modum concidi jussit; Duces primis  
 diebus comiter aliquantùm habiti, post-  
 eà verò compedibus vincti, Belgra-  
 dùmq; ducti fuère. Ex ijs Treczka &  
 Johan. Jacobus Comes Turrianus, squa-  
 lore carceris ad morbum accedente,  
 brevì vitam finierunt: VVchinsky verò  
 & Barcianus, è turri Belgradensi Neboi-  
 zana,

zana, postlímínio domum redierunt. Captâ Agriâ, vicinas etiam arces, diffugientibus præfidiarijs, Turcæ nullo negotio occupârunt.

Ad Maximilianum cùm fama amissæ Agriæ perlata esset, aliquid in recuperanda illa experiri decrevit, initóq; consilio cum Sigismundo Transylvaniæ Principe, mox copias omnes, quarum summa in unum collata, triginta quinque millia equitum, peditumque effecerat, ad Keresthium movit, ubi positis in conspectu Turcarum castris, primò excursionibus & velitationibus, deinde justo prælio rem aggressus est; quo etsi nostri magno impetu in Turcarum cuneos irruentes, disiectis ordinibus aciem eorum perruperint, fugientibusq; (ipso etiam Mahomete) machinas eripuerint, quia tamen prædæ magis quàm cursui victoriæ continuando intenti fuerant, Turcæ recollectis viribus in eos palambundos impetum fecerunt, & prædâ graves faciliè oppresserunt, atq; ita pulcherrimam ex ipsorum manibus victoriam extorserunt. Sex millia ex nostris eo in prælio perijsse dicebantur, inter quos non pauci clari Nominis Præfecti,

fra-

fratres duo, Ernestus & Augustus Hol-  
 satiae Duces, Venceslaus Popelius Baro  
 Bohemus, cum Joanne Pietipesky, Seba-  
 stianus Fargacz, Stephanus Esterhafi, &c.  
 ex hostium numero viginti millia prom-  
 ptissimorum occubuisse fama fuit. Hâc  
 partâ victoriâ Mahometes Belgradum  
 venit, nec ibi diu moratus, Byzantium  
 ad hyberna concessit.

Vere proximè sequente, Maximilia-  
 nus Archidux bellum adversus Turcas  
 redintegrat, Tatam beneficio Petardæ,  
 instrumenti bellici ceu tormenti, occu-  
 pat, ac brevi pòst etiam Papam, ubi in  
 cælorum Turcarum stomachis aurei in-  
 veniebantur. Deinde Jaurini oppu-  
 gnationem aggreditur: sed vano cona-  
 tu, & amissis duobus præcipui nominis  
 Præfectis, Joanne à Pernstein, & Rudol-  
 pho seniore VVchinsky; quorum ille,  
 dum aggeres & tormenta invisurus e-  
 quum conscendere vellet, ac nonnihil  
 incautiùs cunctaretur, ab hostibus è pro-  
 pugnaculo in eum veluti scopum colli-  
 neantibus, destinato prægrandis pilæ fer-  
 reæ ictu protinus discerptus interiit: hic  
 verò in suo tentorio eâdem die, nempe  
 tertio Calend. Octobr. pilâ quoq; ingenti

in incertum emissâ peccussus in vestigio  
 expiravit. Quo tempore, cùm Rex Per-  
 sarum ob mortem Heidaris pueri, à Per-  
 sis pro obside Turcis dati, qui incertum  
 morbo, an veneno extinctus fuerat, no-  
 vum adversus Turcas bellum moliri  
 nunciaretur: Mahometes non ausus ab-  
 esse procul domo, Bassam Satergin cum  
 nonnullis tantum ex Bosna & Illyrio  
 contractis copijs, in Hungariam misit,  
 qui Tatam, Vaciâmq; recepit. Ag-  
 gressus fuit & castra nostrorum, non  
 procul à Vacia, sed cum suorum insigni  
 clade.

Anno 1598. die 29. Martij, Jauri-  
 num Turcis ereptum ab Adolpho Co-  
 mite à Schwarczenberg, Avo moderni  
 Joannis Adolphi Comitis à Schwarczen-  
 berg, aurei Velleris Equitis, Sac: Cæs:  
 Maj: Consiliarij, & quondam Leopoldi  
 VVilhelmi Archiducis Supremi Aulæ  
 Præfecti, &c. & idcirco viro æternâ me-  
 moriâ digno, tali stratagemate: primò  
 subordinatis quinque Hufaris Turcicæ  
 linguæ peritis, qui de com meatibus, qui  
 apportarentur Budâ, se nuncium adferre,  
 & ad sponsam Aronis Agæ Budensis li-  
 teras quoq;, & alia nonnulla habere, di-  
 cerent,



cerent, pons demitti pro invehendo illo  
 commeatu rogatur : quo sine doli suspi-  
 cione per excubitores facto, nostri ap-  
 plicuerunt, clarâ aliâ nocte, sed tamen  
 (superis ita faventibus) nebulâ mox de-  
 volutâ, quæ ita Cœlum textit, ut custo-  
 dibus in muro stantibus, penè omnem  
 earum rerum quæ infra gererentur pro-  
 spectum, ademerit : accessit quoq; vis  
 magna perstreptentis venti. Admota,  
 deinde ad portam interiorem (exterior  
 enim, quod clausa quidem, sed non serâ,  
 neq; repagulo obstructa fuisset, ad pri-  
 mam manum nostrorum patuit) Petar-  
 da : cujus impulsu, ruptis intus veëtibus,  
 tota quanta dissiluit. Mox effusi nostri,  
 quorum erant quinque millia in urbem,  
 obvios quosq; sternunt, atque ita spatio  
 quinque horarum, cœsis mille quadrin-  
 gentis hostibus, & ducentis captis, eam  
 occupant. Hunc in modum admirabili  
 DEI beneficio Jaurinum manibus Chri-  
 stianorum restitutum est, non toto qua-  
 driennio à Turcis possessum. Sed nec no-  
 stris incruenta victoria cessit, cùm præ-  
 ter fauciatorum numerum, quingentos  
 & ampliùs desideratos fuisse satis con-  
 stitisset. Schwarzenbergo donativij  
 data

data centum millia aureorum, & oppidum Huſtopecium in Moravia.

Famâ tantæ tamq; inſperatæ victoriæ divulgatâ, ut noſtrorum animos erexit, ita Turcas vehementer terruit debilitavitque. Adultâ æſtate noſtri denuò Tatam è Turcarum poteſtate extorſerunt, ac brevi poſt, Veſprinium, Sambucum, Palottam, aliâq; caſtella.

Sed optimum hunc victoriarum curſum interturbârunt Sigismundi Tranſylvaniæ præcipitata conſilia. Is paulò antè, ſpe fortasſe tranquillioris vitæ ductus, Cæſari totam Tranſylvaniam ceſſit, certâ deſuper transactione factâ, & Ducatibus Oppolienſi & Ratiborienſi in Sileſia acceptatis. Cùm autem non multò poſt Oppolienſis Sedes, uti Tranſylvaniæ impar & inops, illi ſorderet, à nonnullis etiam Tranſylvanis incitatus, relictâ Sileſiâ Tranſylvaniam quàm occultifſimè repetijt, & Stephano Botſcajo duce Principatum ſibi iterum vendicavit. Et hæc ſemina fuerunt gravifſimi belli, quod poſteà Chriſtianorum vires nimum distraxit, & Turcis interea magnam attulit ſecuritatem. Autumni tempore, Omar Baſſa Chanadio, Arado & Na-

& Naglaw occupatis, Varadinum magnum obsedit: nostri verò aggressi Budam, non tantum eodem tempore, sed ipsâ fermè ejusdem diei horâ, & quod memoratu dignum est, post irritos triginta dierum conatus, utraq; iterum castra, tanto diffita intervallo, eodem die rebus infectis fuere soluta. Præerat Varadino Melchior Rederus Silesius, vir imperterriti cordis, qui excellenter cum æterna sui nominis laude munus suum adimplevit. Cùm deinde inter Persas & Turcas recrduisset bellum, Mahomet ad pacem cum Cæsare faciendam animum applicuit, deditque Ibrahim Bassarum Principi, suæq; sororis marito, quem in initio æstatis, Anno 1599. in Hungariam cum exercitu miserat, mandatum, ut animos nostrorum ea in reptentaret: sed quia in conventu postea habito, à neutra parte tolerabiles satîs conditiones proponebantur, Turcis Strigonium, Filecum & Jaurinum, nostris verò Agriam & Hatvanum sibi reddi petentibus, pax confici non potuit.

Mox Ibrahim exercitum omnem, unâ cum auxiliaribus Tartarorum copijs, trajecto Grano, ad subjectos Strigonio

cam-

campos duxit, ac inde validam Tartarorum manum ad utramq; Vagi ripam vastandam emisit. Ipse facto inter Novam Arcem & Levam itinere, populando ubiq; & urendo, ad oppidum Irmelium haud procul Nitrâ castra metatus est. Tota illa regio à Novogrado Trnaviam versùs, illinc verò usq; ad Bezconem & Trenczinium, ipsòsq; Moraviæ fines, crudeliter flammâ ac ferro pervastata erat, incolis partim cæsis, partim in servitutem abductis. Nostri è castris ad Jaurinum positis, fumantia procul tectorum culmina, & ignes longè latèq; collucentes, frustra prospiciebant. Adultiore autumno Ibrahim Pesthum versùs movit, divisaq; prædâ, & captivis decumatis, copias in hyberna dimisit : ipse verò Belgradum concessit.

Sequenti anno repetitâ expeditione in Hungariam, trajectòq; ad Esecum Dravo, Babociam nostrorum ignaviâ deditam occupavit, ac postea Canisam obsedit. Erat tunc Casarei exercitûs summus Dux Mercurianus, è Regia Galliæ Regum familiâ Valdemontiâ oriundus, qui obsessis succurrere volens, cum

XXV. millibus adversus hostes movit : quo intellecto ejus adventu Ibrahim, relictâ oppugnatione obviam illi profectus est, & colle quodam occupato, ipsius adventum præstolabatur. Sed cum nostri, potissimum Tilliani & Colonitschij, acri in ejus equitatum impetu irrupissent, ac nonnullos trucidâssent, relictis potestati nostrorum aliquot tormentis, sese in castra recepit, quibus se eâ nocte totâ, usq; ad meridiem sequentis diei continuit. Certatum deinde per aliquot dies, variâ utrinq; fortunâ, Turcis tamen magis semper adversa, sic ut octo circiter millia hostium, inter quæ erat mille Janiczerorum, desiderarentur.

Ultimò tamen nostri, cum eos summa rei frumentariæ inopia premeret, coacti exercitum reducunt : Ibrahim verò instauratis viribus oppugnationi Canisæ insistens, eam tandem per ultroneam deditionem cepit : Paradysius enim, qui civitati præfuit, discessu nostrorum exterritus, mox octavo post eorû discessum die, cum Ibrahim de deditione transegit.

Ita ergo, die 22. Octobris, locus totius Styriæ munitissimus in Turcarum,

D

deve-

devenit potestatem; præfidiarij cum suis fortunis dimissi, & ad Muram usq; fluvium incolumes perducti: Paradyfius autem non diu post, nimis intempestivæ deditiois reus convictus, cum quibusdam socijs, jussu Cæsaris capite pœnas persolvit. Interea in Asia Persarum Rex Abasus, bellum prospero successu adversus Turcas egit, recuperatâ Provinciâ Siruanâ à Solymano olim adempta. Misit quoq; Legatum suum ad Cæsarem, summis precibus orans, ut bellum in Turcas susceptum continuare vellet. Unde Ibrahim denuò induciarum mentionem fecit: accidit autem, quòd intra eum diem, qui colloquio de conditionibus pacis destinatus erat, Ibrahim pestilentia correptus, Belgradi è vivis excederet.

Sublatâ spe induciarum, cum Cæsari auxiliares copiae ex Italia & Hispania advenissent, Canisæ & Albæ Regalis oppugnatio instituitur: & ut nostri nihil, quod ad oppugnationem, ita Turcæ nihil, quod ad sui defensionem pertinebat, omiserunt. Canisæ obsidio cœpta ab initio Septembris, durabat ad diem 18. Novembris, cum ingenti Italorum clade;



de ; ultimò enim gravissimis cœli tempestatibus exagitati obsidionem solvere, ita tamen ut fugæ speciem recessus ille haberet, coacti fuerant, relictis quàm plurimis impedimentis, armis & comœatu. Melior fuit eorum, qui Albam Regalem obsederant, fortuna : undecimâ enim obsidionis die, non tantum de urbe capta, sed de cœsis quoq; ad quinq; millia Turcis, qui duce Hasane Basfâ obsessis in auxilium serò nimis venerant, feliciter triumphârunt. Quamvis brevè iterum urbs illa, nondum expleto à Christianis in ejus possessione integri anni spatium, barbaris cesserit, die 29. Mensis Sextilis, qui Divo Joanni Baptistæ decollato sacer est, ac ipsis, cum alijs, tum victoriâ Mohaczianâ faustus felixque. E contra nostri Pesthum è regione Budæ positum, acerrimo impetu aggressi capiunt, quo in potestatem redactò, Budam ipsam oppugnatione aggrediuntur, sed fugati ab Hasane, re infectâ inde discedere coguntur.

Anni sequentis, sc: 1603. initium multiplici hostium excursionem, ac infestis populationibus insigne fuit : nam Tartari magnâ manu collectâ, primò

pagos circa oppidum Papam, deinde regionem circa Muram fluvium, flammâ ac ferro impunè vestavêre, abductis in servitutem quàm plurimis colonis. Postremò adscitis in societatem Turcis, ita ut ad 16000. equitum constituerent, in Valeriam progressi, omnem illum tractum, qui secundùm Dravi citeriorem ripam à Caproniza fursum ad Vinicam usq; protenditur, crudeliter depopulati sunt, nostris, quos habuerunt obvios, partim cœsis, partim captis.

Post hæc sequuti fuêre in Transylvania rebellium motus: nonnulli enim potentiores ex incolis, novâ factâ conspiratione à Cæsare defecerunt, Moysemq; Siculum sibi in Principem elegerunt, qui ut rem suam eò potentiùs adversus Cæsarem stabiliret, Turcarum Principi se subdidit, à quo etiam clavam, acinacem & vexillum, missa quasi Imperij insignia, accepit. Unde ab eo tempore, Turcæ sibi jus in Transylvaniam vendicant. Brevi tamen hæc nefaria conspiratio suum sortita est finem, operâ Raduli VValachorum Ducis, qui primò, quasi viribus suis diffusus, Moyse & auxiliatoribus ejus Turcis atq; Tartaris castris suis cessit, quæ

quæ cùm illi statim occupâssent, & in ijs  
securè agerent, ille multò cum majori-  
bus copijs nihil tale metuentes, & semi-  
sopitos nocte intempestâ oppressit. Tur-  
cæ & Tartari tam subito pavore perculsi,  
relictis castris & impedimentis in præci-  
pitam fugam acti sunt, Duxq; illorum  
Bectes Bassa, abjectâ purpurâ ac Tygridis  
exuvijs, & vili penulâ sumptâ vix evasit :  
Moyse verò pugnando à VValachis in-  
terfectus est, cujus caput humeris ab-  
scissum, Coronostadij publicè omnibus  
ad terrorem spectaculo est propositum.

Conabatur deinde Bectes collectis re-  
liquijs fugati exercitus resumere vires,  
& Transylvaniam Imperio Ottomanico  
subdere ; sed cæsus iterum gravi prælio à  
Comite Dampirio & Ragocio, fugâ se-  
cundò salutem quærere debuit.

In Hungaria quoq; nostri insignem vi-  
ctoriam de Murathe Bassa Budinensi, in-  
ito cum illo inter Budam & Vaciam præ-  
lio, obtinuerunt, die 29. Septembris,  
adedò ut in universum circiter septem-  
millia hostium cecidisse memorentur ;  
inter quos Belgradensis & Samandrianus  
Præfecti, ac ex Janiczaris mille quingen-  
ti, præter eos qui aquis hausti sunt, Mu-  
rathe

rathe & Hafane Bassis vix se è Nadazdianorum manibus eripientibus. Postea victor exercitus Hatvanum movit, illudque deditione occupavit. Eodem tempore in Illyrico, Sigismundus Trauttmansdorffius, militum ejus regionis præfectus, cum Nicolao Zrinio Georgij filio Turcas itidem non mediocri clade affecit, ponte magni operis ad Camefcinum exusto, & castellis nonnullis, ad Dravum infra Baboçziam sitis, expugnatis.

Anno 1604. die 24. Januarij, Mahomet Turcarum Imperator ejus nominis tertius, in ipso ætatis flore è vivis excessit, statimq; in ejus locum & solium, Achmet major natu Byzantij Princeps est declaratus: qui cum nondum per ætatem liberis procreandis operam dare posset, & aliàs apud Turcas mos esset, primogenito fratrum Imperium auspicante, minoribus natu fauces laqueo elidi, decrevère purpurati ejus fratrem Mustapham (aliquibus Bajazetem) septimum agentem annum interea educandum esse, donec ille hæredis masculi Pater efficeretur.

Post Mahometis obitum, iterum fuit actum de bello sedando, Turcis ipsis, qui

qui in Asia à Persis, & in Affrica à Rege Mauritaniæ & Hispanis bello acri premebantur, pacem offerentibus; quia tamen, ut antè, Strigonium & Jaurinum repetebant, Transylvaniam quoque & Pesthum, pro his Agriam & Canisam tantùm nostris reddituri, re infectâ utrinq; discessum est. Non multò post Pragam ad Cæsarem venit alius à Rege Persarum Legatus, à Cæsare petens, ne pacem cum Turcis faceret, sed bello continuo eos persequeretur, exemplo sui Regis, qui jam ab ijs Vanum, Taurisium & Revanum, ac alia quædam loca magni momenti, amplâsq; Regiones, partim vi, partim deditione extorfisset.

Interea Vezir Bassa Hasanes, cum sexaginta millibus armatorum Belgrado movit in Hungariam, Pesthòq; & Hatvano recepto, quæ metu periculi temerè deseruerant nostri, Strigonium obsedit; verùm Bassa, exercitûs Cæsarei summus Dux, quotidianis cladibus ita Turcas afflixit, ut Hasanes post mensem, spe suâ delusus, recedere in hybernâ coactus fuerit.

Erant tunc vires Turcarum in Hungaria tenues valdè, sed per subsequentes

turbulentos & perniciosos motus, quos Stephanus Botscajus, religione hæreticus, iisdem ferè diebus, quibus Strigonijs obsidio soluta est, concitavit, excreverunt denuò in immensum. Constârat is è seditiosis quibusq; magnam manum, jussîtq; publicè proclamari, nullam aliam ob causam bellum à se susceptum, quàm Religionis, contra Barbianum Cæsaris in Transylvania Ministrum, Religionem omnem, quæcunq; Pontificia non sit, opprimentem : (ita sub prætextu sanctissimi operis nonnunquam maximè nefarij conatus velantur.) Quâ viâ, dici non potest, quàm brevi tempore hæc pestis non Transylvaniam tantum, sed etiam Hungariam pervaserit, adeò ut copiâ militum fretus Botscajus, palàm jam Transylvaniæ Principatum, cujus à Turcis quoq; facta ipsi spes erat, affectaret. Quare accepto à Turcis & Tartaris auxilio, & omnibus ferè tam Heydonibus, quàm etiam Viris illustrioribus ad eum confluentibus, Barbianum & Peczium prælio aggreditur, fundit, & hunc quidem graviter læsum capit, illum verò cum Dampiero Transylvaniâ eiicit : obtinuissêtq; tum statim



Statim Transylvaniam totam, ni Bacta  
citò ex Hungaria cum valido exercitu  
succurrisset, qui aliquantùm insolentiam  
ipsius repressit : quod factum ad  
finem anni 1604.

Initio anni sequentis, cùm & Hufari  
(equites Hungari) ad Botscajum defec-  
cissent, & loca plurima in Hungaria, ali-  
qua sponte, aliqua metu devenissent in  
ejus potestatem, in tantum potentia  
crevit, ut in publicis Comitij Serencij  
habitis, Princeps Transylvaniæ sit salu-  
tatus : ac id ipsum à Chaufio nomine,  
Turcarum Principis, præsumptione quâ-  
dam, traditâ ei clavâ, ense & vexillo,  
protinûs confirmatum.

Occupatâ deinde Cassoviâ, Fileciâ,  
Neosolio, aliisque plurimis oppidis &  
castellis, nostris verò ad Posonium usq;  
cedentibus, majora in dies sumebat in-  
crementa. Tandem Trnaviâ quoq; sibi  
deditâ, Denghelegium cum octo milli-  
bus Haydonum & Turcarum ad popu-  
landam Moraviam, facto per montem,  
quem Album vocant itinere, misit : qui  
Provinciam longè latèq; populati, cùm  
redeuntes onusti que prædâ in Mora-  
vorum terrestres copias, quas VVilhel-

mus Popelius, & Georgius Hodicius du-  
 ctabant, non procul Sacolciâ incidissent,  
 acre cum eis iniêre certamen, quo u-  
 trinq; multi, plures tamen ex hostibus,  
 ceciderunt. Neque cessabant deinceps  
 Moravis infesti esse duce eodem Hey-  
 dones & Turcæ, sed Beçtaſo Baſſâ Bu-  
 denſi inſtigante, denuò Moraviam vaſta-  
 bundi ingreſſi ſunt, & ad Brunam uſq;  
 & ultra pandebantur impunè, rapinis  
 & cœdibus ſanguinèq; & incendijs omnia  
 fœdiſſimè permiſcentes. Ex qua in eum  
 modum horribiliter deſœdata, ultra  
 quatuor hominum millia in miſerrimam  
 ſervitutem abduxerunt. Brevi tamen  
 idem Beçtes à noſtris ex inſidijs interfe-  
 ctus eſt: cujus interitus multùm incom-  
 modavit rebus Turcarum; erat enim  
 homo verſutiffimus, rerùmq; Hungari-  
 carum valdè peritus, ac præcipuus mo-  
 tum recentium auctor. Nec verò Hun-  
 gariæ & Moraviæ finibus tanta ſe cala-  
 mitas continuit, ſed proximas quoque  
 trans-Danubianas regiones eſt perva-  
 gata, Matthiâ Somogio in Austria, &  
 Gregorio Nemethio circa Arrabonem  
 & Leitam flumina, poſtea etiam in Sty-  
 ria, ac denuò in Austria flammâ ferròq;  
 graſ-

grassantibus, abducentibúsq; ingentem  
 populorum utriusq; sexús numerum.  
 Et quod fœdi res exempli est, tanta Hay-  
 donum Hungarorúmque rebellium fuit  
 feritas, ut Christianos homines aliqui  
 etiam propinquitate & sanguine sibi  
 junctos, captivarent, & barbaris præ-  
 senti pecuniâ pretiôque divenderent.  
 Contigit autem cuipiam Haydoni Chri-  
 stianos vendenti pueros, ex auro à Tar-  
 taris numerato cruorem manâsse, quo  
 impiæ manus abominandi hominis ma-  
 cularentur. Sopronium tunc ab Adamo  
 Trauttmanstorffio, & Christophoro Pu-  
 chaimio egregiè tutatum est.

Intereâ Vezir Bassa Mehmet hâc dis-  
 fidentium Hungarorum occasione arre-  
 ptâ, Strigonium obsidione cinxit, sum-  
 mîsq; viribus oppugnatum ad deditio-  
 nem coëgit, Hungaris serò deploranti-  
 bus infidam hanc cum Turcis societatem.  
 Postea quoque Novarum arcium muni-  
 mentum Botscajo cessit. His ita pera-  
 ctis, Botscajus vocatus à Vezirio Budam  
 profectus est, ubi illum Vezirius no-  
 mine Achmetis sui Principis Regem  
 Hungariæ appellavit, móxq; jussit pro-  
 ferri coronam & alia ornamenta; ac

primò ense auro & gemmis ornato, latus  
 ei ipsemet cinxit, deindè coronam ca-  
 piti imposuit. Ea esse dicitur rudioris  
 operis, intus quidem lignea, at supernè  
 laminis aureis tecta, & lapillis obsole-  
 tum in morem inditis elaborata, quam  
 etsi dicant Turcæ fuisse Diadema Impe-  
 ratorum Græcorum, aut Despotarum  
 Thraciæ, incertum tamen est, quanam  
 & unde sumpta sit. Multis adstantibus  
 ex Hungaris displicuit hæc profana, ad-  
 ulterina, ne dicam iniqua coronationis  
 solennitas; neque adeò sibi placere,  
 monstravit Botscajus, qui coronam il-  
 lam loco muneris, non ad usum aut re-  
 giæ dignitatis signum accepit, moxque  
 illam Georgio Secio servandam tradidit,  
 inquiens, non posse alterum Regem  
 Hungariæ esse, quàm diu prior ritè co-  
 ronatus in vivis supersit. Actum deinde  
 erat seriò de pace, quâ Viennæ conclusâ  
 cum Botscajo & Hungaris, & tabulis de-  
 super confectis, subscriptisq; sequutum  
 quoq; est fœdus cum Turcis ad annos  
 viginti, à Calendis Januarijs anni 1607.  
 inchoando, percussum. Non multò post  
 Botscajus lento & tabifico hydrope ex-  
 tinctus est, cum quinquagesimum ætatis  
 annum

annum excessisset, nullo hærede relicto :  
 quo mortuo, Sigismundus Ragocius à  
 Transylvanis Princeps renunciatur. Pa-  
 ce confectâ, ingens passim lætitia, non  
 solum apud Christianos, sed & Turcas  
 belli jam pertæsos, crebrâ tormentorum  
 displensione perceptum inde gaudium  
 prodidit ; Achmet verò de pace certior  
 factus, cum Purpuratis Prætorianisque  
 omnibus Constantinopoli templum in-  
 gressus, Deo & Mahometi suo solemnes  
 gratias egit, diémq; sequentem magna  
 cum festivitate traduxit, deinde totam  
 belli vim adversus Persas convertit.  
 Rex enim Persarum, exercitu Turcarum  
 in finibus Babylonis dissipato, & duo-  
 bus propugnaculis expugnatis, mirum  
 in modum vires suas per Asiam dilata-  
 vit : & quamvis Achmet pacem cum illo  
 quoq; facere Chami Tartarici operâ in-  
 interveniente, constituerit, proficere ta-  
 men nihil potuit, ex eo, quòd occupatas  
 hætenus Provincias, unâ cum Taurisio  
 civitate, à Persa sibi restitui voluerit,  
 quod ipse facere omninò recusavit, ar-  
 matâ sese manu, quæ jam possideret, ob-  
 tinuisse, & ex parte ad se antea perti-  
 nuisse dictitans. Et tunc in Asia quoq;

minore & Syria novi extitère adversus Imperium Ottomanicum motus, adeò ut Alepiensis Præfectus, commisso cruento prælio cum Vezirio Bassa, ad quinquaginta millia ipsi prostrârit, amissis quoq; viginti millibus ex suis. In Caramania similiter à paucis rebellibus per insidias fuit circumventus, fusúsq; insignis Turcarum exercitus; unde non sine causa Turcæ tantoperè lætabantur de pace cum Cæsare facta.

Quia tamen sunt genus hominum ut plurimum fluxæ fidei, ubi tantum occasionem augendæ suæ potentia vident, mox scissis etiam fœderibus pacta pacis transilire non erubescunt, ita evenit Anno à transactione facta, necdum planè sexto, quòd compositis in Asia rebus, audito quoque inter Cæsarem Rudolphum & fratrem ejus Matthiam Hungariæ Regem, dissidio, nihil magis egerint, tum fraude & astu, tum apertâ vi fines Regni excursionibus pervastando, castella hostiliter etiam admotis tormentis tentando, quàm, ut pacta pacis in cassum abirent, violarenturque. Etsi autem postea Rudolpho Cæsare fato functo, & Matthiâ in Cæsarem electo modicum.

qui-



quievisſent, rursus tamen anno post electionem Cæsaris sequente, turbulenta agitant consilia : quem in finem Achmet ingentem frumenti copiam per totam Hungariam jussit ab agricolis exigi & convehi, fortalitiorem mœnia restaurari, tormentorum machinis alióq; apparatu bellico instrui, ac præſidijs firmari : insuper multa novorum Turcarum & Tartarorum millia in regionem induxit ; quæ omnia reddebant nostris suspectam ejus fidem : & magis adhuc, cum per Chaustum primò, deinde per Bassam quendam absolutâ declaratione Matthiæ significâſſet, ne ulterius quidpiam de Transylvania cogitaret, sibi eam relinqueret, veluti propriam ac hereditariam titulo belli à majoribus acquisitam, suumq; peculium.

Sed nostrâ fortunâ consurrexerunt, iterum adversus illum novi in Asia motus : quare à bello Hungariæ inferendo, quod jam manifestè contra fas & æquum meditabatur, conatum avertere, & continuationem ietæ pacis ipsemet ambire coactus est. Restabat solum conditio quædam de pagis dedititijs, quam Legatus ipsius apud Cæsarem sæpius urſit ; eâ igitur

igitur complanatâ, elapsis jam tunc decem à priori pacis tempore annis, ad alios viginti annos fœdus extensum est. Quod quàm opportunè tum factum, paulò post palàm omnibus fuit : quandoquidem brevi subsequuto tempore, gravissimis seditionum procellis agitata Bohemia, à fide & Majestate Cæsaris, sumptis adversùs eum armis, descivit. Atq; etiam Hungariæ & Germaniæ populos, eadem seditionis rabies, ac dirarum novarum cupido invasit. Non multò post inducias pactas confirmatâsque Achmet moritur : quo extincto purpurati rejecerunt à successione Imperij Mustapham fratrem ejus ob ingenij imbecillitatem, prætuleruntq; illi Osmanem impuberem Achmetis primogenitum filium, cujus ut eò tranquillius esset regimen, Mustapham morti destinârunt, quam tamen ille Matris suæ præstigijs evasit : reliquos autem Achmetis filios, Amurathem & Ibrahimum, eo fine quo antea Mustapham, educandos curârunt : usq; dum Osmanes gauderet masculâ prole. Cùm autem novus Imperator tanto Regno administrando propter juveniles annos aptus non esset : illud à pur-

purpuratis, quorum Princeps Aly Bassa evaserat, aliquandiu gubernatum est.

Exortis in Bohemia & Austria contra Ferdinandum II. turbis, cùm & Bethlenius Gabor Transylvaniae Dux, occupato Regno Hungariae, cujus se Principem, mox & Regem constituit, in societatem armorum pellectus esset, Osmanes, qui tunc rectè gubernacula Imperij Ottomanici suscepit, ratus, quòd eà occasione rem suam in finitimis partibus Hungariae augere poterit, præcipuum quendam Janiczarorum Tribunum, seu Agam, Mechmetem nomine, ad Fridericum Palatinum à Bohemis in Regem assumptum misit, declarando se paratum ad auxiliares copias ei ferendas, modò ad se Legatos mittat. Aga emenso celeriter itinere, cùm Pragā ad initiū Julij venisset, exceptus est à primarijs Friderici Ministris honorificè, & mox die tertiā, quæ fuit 5. Julij, in Arce Pragenſi præſente Friderico auditus.

Quia verò jam antea publicis Comitibus mense Majo habitis, erat deſiſum, & Confœderatione Statuum Regni Bohemiae cum Statibus Regni Hungariae & Bethlenio initā cautum, ut Legati ad portam Ottomanicam quantocius mitterentur,

rentur, Agâ isto superveniente, magis hoc ratum fixumq; redditum est. Haud multò post tempore ministris Friderici consulentibus, Anhaltino potissimum, summâ quâ pollebat auctoritate, satagente, Aga muneribus magni pretij donatus, ac pridie antè à Comite Turriano rebellionis Principe solemnî epulo exceptus, domum remittitur cum literis à Friderico latino idiomate ad Osmanem 12. Julij datis, quibus magno animi affectu gratias illi egit, pro auxilio sibi adversus Ferdinandum promisso, séque, & salutem suam, fortunâsq; omnes commendando : addidit, brevi se missurum. Legatos, qui de ea amicitia stabilienda, de tributo, & de pretiosis muneribus singulis annis ad Portam ejus transmittendis, convenirent : atque ita vectigale seu tributarium Turcæ Regnum subdere conabatur, non sine merita suggillatione, nominis sui & totius Bohemæ gentis, ut tantum illud temerè nimis acceptatum, contra imminentes adversarios, & æmulos retinere posset : præfagiebat fortasse animo, se aliàs vix retenturum. Quod & factum : nam quarto postea Mense gravi prælio in Albo monte ad Pragâ

Pragam cœsus, non tantùm Regno fugatus, sed è Palatinatu quoq; ac tota Germania ejectus est; Princeps aliàs, si sibi potius, quàm alienis consilijs deditus fuisset, non malus. Et sic etiam acta cum Turcis pacta abiêre in cassum.

Per idem tempus Turcæ Tartaris juncti magnâ clade affecerunt Polonos; cùm enim Gratiano Moldaviæ Principi in auxilium venissent, repentè ruptâ cum Turcis pace, totam belli molem in se derivârunt. Dux Polonicæ militiæ Stanislaus Zolkevius numero ac viribus hostium victus, dum regressum in Poloniam meditatur, haud procul Tyrâ fluvio, qui Russiæ limes est, funditur fugatúrque, paucis admodum fugâ elapsis. Zolkevij caput à cervicibus recisum, & hastili oblongo infixum ante prætorium Vezirij Bassæ, ac dein Constantinopoli publico spectaculo fuit. Eâ victoriâ Osmanes adeò elatus fuit, ut relictâ Persis Babylone, vires omnes ad bellum Polonicum contraheret; mox etiam publicato edicto, totius Thraciæ & Illyrij copias, primo vere ad limites Poloniæ præsto esse jussit. Ipse deinde præeunte equitatu Asiatico, cum Prætoranis seu Janiczeris, quorum

quorum tunc ferebatur esse circiter quadraginta millia, Byzantio movit, & trajecto Istro, ad Tyram cum exercitu trecentorum millium armatorum contra Polonos, qui ad arcem Chocimum castra locârunt, & sexaginta millibus plures non erant, confedit. Ibi per aliquot dies velitationes utrinque vario eventu actæ sunt, Polonis in apertam aciem prodire nolentibus : tandem Osmanes moræ impatiens castra illorum acerrimâ oppugnatione aggressus est, sæpius iterato, semper tamen irritò, conatu.

Postremò, cùm & Cameniciam & Panovicium frustra tentâset, & hyems aspera appropinquaret, belli hujus peritæsus, conditiones pacis à Stanislao Lubomirio exercitûs Polonici Duce oblatas, acceptavit, & remensus Istrum cum copijs suis, laboribus, vigilijs, inediâ, cœli injurijs, continuis imbribus, ac rerum inopiâ lassis, fatigatisq; , & vix non enectis, per Bulgariam & Thraciam Byzantium inglorius est reversus. Ad sexaginta millia Turcarum periêre expeditione istâ ; è Polonis verò plures pestis quàm gladius consumpsit. Hæc facta Anno 1621. in Septembri & Octobri.

Ut

Ut autem erat prima, sic minùs secunda hæc Osmani expeditio: ne tamen duceretur sibi malo omni, totam hanc cladem Janiczarorum ignaviæ imputabat, quos idcirco velut protervos, & ad obtemperandum persæpè difficiles duræque cervicis, statuit è medio tollere, & legere in eorum locum novos ex Arabibus, quorum isto bello fortitudinem promptitudinémq; probaverat. Anno igitur sequente, indicit in mensem Majum profectionem in Syriam, simulatâ Religione visitandi sepulchrum Mahometis Prophetæ ipsorum; quò meliùs ac citra tumultum res succedat, jubétque Janiczaros suos, sine quorum comitatu Imperator nunquam proficiscitur, ad iter esse expeditos. Jamq; dies profectiioni destinata appropinquârat, dum Janiczari longi itineris laborem detestati, tum veriti, id quod res erat, ne Osmanes se viæ istius incommodis exhaustos, ad extremum perniciiei daret, primò supplices Præfectos suos adeunt, rogântq;, ut Imperatorem à tali consilio averterent. Cúm; nihil proficerent, viginti quatuor eorum millia, Palatium circumfident, ac denuò Mu-  
phtium,



phium, Sacrorum Turcicorum supremum Antistitem, & Dilaverium Vezirium, qui ultima sua postulata Imperatori deferant, mittunt, expectantes responsum. Quos ubi irritum quoque responso reversos constitit (nam Imperator dissuadentibus iter, indignatus responderat : sic volo) repente magno furore in palatium irruunt, & obvios quosq; familiares Imperatoris, maximè eos, qui Osmani protectionis istius auctores fuisse putabantur, nullo habito respectu crudeliter trucidant ; Osmanem verò è latebris extractum, & equo vili impositum, in carcerem ducunt. Moxque reversi, Mustapham Patrum ipsius è carcere, in quem illum Osmanes condiderat, extrahunt, eumq; trementem, & se ad necem quæri existimantem, Imperatorem consalutant. Hic igitur Mustapha, arreptis Imperij gubernaculis, Osmanem è gravi carcere educi, & alio septem Turrium dicto, qui locus ad Propontidis ostium situs est, vivum asservari præceperat : postea tamen instigante matre, & supremo Vezirio, fauces ipsi zonâ sericeâ elidi iussit. Cæterum Mustaphæ haud diuturnum Imperium fuit :

fuit : nam anno insequente, eâdem quâ assumptus fuerat levitate, dejectus est, atque in priorem carcerem reconditus, delato Imperio ad fratrem Osmani, Amurathem ejus nominis IV. juvenem annorum quatuordecim.

Quo tempore Comes Turrianus, è Bohemix Regno profugus, à Bethlenio ad Portam Ottomanicam missus erat, ut auxilia Turcica impetraret : qui cùm Constantinopolim pervenisset, primò omnium se in amicitiam familiaritatemq; supremi Vezirij, oblatiis quinque Talerorum millibus insinuavit, ita dextrè, ut ille munere hoc excultus, placatusq;, animo hilari causam Bethlenij promovendam susceperit, atque etiam operam & studium omne suum pollicitus sit. Exin purpuratis in Divano consultantibus, Bethlenio auxiliares copix decernuntur, & Turrianus duobus insignioribus equis donatus, ac convivio à Vezirio exceptus, domum lætus revertitur, quem brevè secuta fuit valida Turcarum manus, deinde etiam Tartarorum octo millia, quibus frater Bethlenij & Comes Turrianus præpositi Duces. Hunc in modum res Pannonicæ, quæ aliàs pace

cum

cum Transylvano ante sesquiannum pactâ, tranquillo in statu esse videbantur, puncto temporis, violato per summum nefas foedere, in apertum bellum exarsere. Bethlenius enim collecto ad sexaginta millia exercitu, improvisò in subjectas Cæsari ditiones irruit, ac Legionem Tiffenbachianam propè Trnaviam facili negotio oppressit : inde turbinis instar irruptione in Moraviam & Austriam cis Danubium factâ, rapinis, cœdibus & incendijs omnia complevit, Comitem de Monte Nigro & VValdsteinium tanto numero impares fudit, fusosque intra Hodoninum oppidum compulit, & coronâ arctissimâ cinxit, omniq̃ue ad ipsos aditu ita interclusit, ut sesquimenfis spatio, nihil prorsus de pabulo & annona ipsis submitti potuerit. Unde exorta inter obsessos fames tanta, ut miseri equinis carnibus ac felibus, & id genus, præter naturam cibarijs vesci cogerentur. Interea Tartari & Turcæ non cessabant à latrocinijs & populationibus, in devastanda illa parte Moraviæ ad Brunam usq; , abigendo, quicquid hominum, quicquid pecoris fuit, loca verò quævis obvia, insatiabili rabie flammis dando.

dando. Tandem cùm se Bethlenius Hodoninij mœnibus oppugnandis frustrâ hærere cerneret, obsessis vim omnem hostium fortiter sustinentibus, jâmque hyemis asperitate accedente, nec Turcæ in castro manere, legibus id permittentibus, ulterius vellent, solvere obsidionem, & cum Cæsarianis pacisci constituit.

Habent enim Turcæ omnes tam Prætoriani, quàm qui agris & latifundijs à Principe donati, suo sumptu militant, veterem ab Amurathe secundo concessam libertatem, quo tempore de VVladislao Pannoniæ & Poloniæ Rege in campis Varniensibus victo atque interfecto, insignem victoriam (de qua suprâ) reportavit, ne ultra diem D. Demetrio sacrum, qui ad 26. Octobris incidere solet, in castris durare cogantur : quem diem ipsi Cassonginum vocant. Is autem hîc ad obsidionem Hodoninensem longè præterierat, jâmque autumnales ultra dimidium Novembris dies, manifesta hyemis signa, frigidiorésque pluvias nivibus intermixtas afferebant. Turcæ igitur Tartariq; non expectato Bethlenij imperio castra deseruerunt ; Bethlenius autem discessu

E

eorum

corum impulsus, insuper de copijs Cæsareis ex Bohemia & Polonia, obsessis in auxilium venientibus certior factus, & ipse demùm ad inducias pertractus est.

Sed Turcis & Tartaris ab eo digressis, & in varia agmina dispersis, malè in via cessit; nam 26. Novembris, cùm unum ipsorum agmen ad Nitram fluvium venisset, & in quadam valle securum confedisset, Nicolaus Esterhásius Præfectus Novarum Arcium, auxilio Comarensium, & bis mille fidorum Hungarorum, illos invasit & dissipavit, potiori prædâ eum captivis receptâ. Quod fecit secundò alteri agmini die sequenti. Idem fecerunt Baro Reiffenberg Præfectus Comarræ, & Preunerus Jaurini, Turcis, qui Albam Regalem & Canisam revertébantur.

Non deerant tunc ex Hungaris viri illustres, militiâ clari, & bellicarum rerum peritiâ insignes, qui Cæsarem ad parandum suscipiendûmq; adversùs Turcas bellum, secretis apertisq; consiliorum rationibus inducere non dubitarent, eùm ipsimet Turcæ fœderibus aut inducijs minimè stare viderentur, Bethlenio toties rebeli assistendo, agros populando,

do, miserámq; plebem varijs excursio-  
nibus affligendo, non secùs, ac si nulla  
pax, nullum fœdus ictum esset. Sed  
alijs non rogatis tantùm, sed etiam sago  
clarissimis visum fuit, in præsentì rerum  
statu, non irritandum tam potentem ho-  
stem, qui exasperatus formidabilibus  
sumptis armis, humana divinis confun-  
dendo, omnia sursum atq; deorsum mi-  
sceret : standum potiùs ictæ paci, & su-  
spicaces purpuratorum animos, pacis &  
amicitiæ ostentatione leniendos.

Anno postea tertio, cùm iterum Be-  
thlenius à Cæsare deffecisset, seq; junxis-  
set Mansfeldio & Vinariensi rebellibus,  
Turcarum octo millia Hungariam inva-  
serunt, & pagos quàm plurimos diripue-  
runt. Deinde juncti Bethlenio, juve-  
runt obsidionem Novigradi; quos ta-  
men Valdsteinus brevè inde depulit cum  
insigni eorum clade. Iis ergo retroce-  
dentibus, Bethlenius quoq; relicto Mans-  
feldio in Transylvaniam concessit, ac  
tandem sincere pacem cum Cæsare con-  
clufit, quam etiam inviolatam ad mor-  
tem usq; servavit.

Mortuo illo Anno 1629. Mense No-  
vembri, cùm Georgius Ragocius favo-

re Turcarum in Transylvaniæ Principem evectus esset, & Cæsar missis Legatis Cassoviam, ditiones quasdam Bethlenio tantum ad dies vitæ concessas repetiisset, exurgere cœperunt denuò bellici motus in Hungaria, Turcis insultantibus; sed hi brevè sedati sunt, eò quòd Amurathes Asiatico adversus Persas & Armenios bello occuparetur.

Anno 1633. Turcæ à Moschis contra Polonos exciti, in fines Polonorum ex improvise irruerunt, & præmissâ Tartarorum manu, omnem circa Cameniciam agrum infestâ depopulatione divexârunt. Quod cùm intellexisset Stanislaus Koneczpolskius, earum partium Præfectus, qui Barij tunc morabatur, extemplò cum copiis suis accurrit, & intellecto jam fugâ elapsos, in mediam usq; Moldaviam, adsumptis tantum bis mille & quingentis Equitibus Quartianis, persequitur, ac tandem deprehendit, cœdit, fugat, dispergit, omni prædâ receptâ, captòq; inter cæteros Cantimirio genero Murzæ Principis Tartarorum. Porro crebrescente famâ de adventu Abatzij supremi Vezirij, cum quinquaginta armatorum millibus Danubium trans-

mit-



mittentis, Koneczpolskius nè à tanta  
 multitudine repentino impetu circum-  
 veniretur, tempestivè per Tyram in tu-  
 tiora se recepit, & accersitis ad se, quid-  
 quid in propinquo auxiliorum poterat,  
 retrò Cameniciam castra posuit, ibique  
 consedit. Interea Abatzius, ut cladem  
 suorum ulcisceretur, usque adeò citato  
 gradu properabat, ut pedites equitum  
 justis passibus incedentium progressum  
 æquare cogerentur; cùmque in conspe-  
 ctum Camenicie venisset, castra Polo-  
 norum vi adortus est, irritò tamen suc-  
 cessu, & cum insigni suorum clade.  
 Neque ultra quicquam tentare ausus, nisi  
 quòd pagos aliquot excinderet, eò unde  
 venerat, revertit.

Pace demum cum Moschis composità,  
 Turcarum quoque Imperator arma adver-  
 sùs Polonos temerè sumpta deposuit,  
 Abatzio, qui à Moschis pretio corruptus,  
 belli ejus præcipuus author fuerat, stran-  
 gulari jussu.

Post eam pacem induciæ quoque cum  
 Cæsare Ferdinando II. pactæ, in longius  
 sunt extensæ, Turcis ipsis id sollicitan-  
 tibus, qui tum in bellum Persicum in-  
 tenti, omnes eò vires contulerant.

Trecenta enim bellatorum millia tunc Amurathes adversum Persas in Armeniam eduxit, cæsoq; & profligato exercitu Persico, Revanum nobilem apud mare Caspium urbem, cum regione, amplissima in potestatem redegit. Cæterum, quia Turcis major in vincendo & capiendo gloriæ cupiditas, quam cura in conservando fuit, mox ut Amurathes Byzantium rediit, Persæ resumptis viribus, quicquid superiore expeditione amiserant, brevi compendio recuperavêre. Et sic denuò Amurathes cum Persis quod ageret, habuit satîs, ac brevi post tempore etiam cum Moschis, qui ipsi Assov celeberrimam ad ostia Tanais fluvij urbem eripuerant.

Initio anni trigesimi septimi mense Februario, Cæsar Ferdinandus II. ex hac vita excessit, anno ætatis LIX. Princeps omnibus regijs virtutibus ornatissimus, sed pietate ac religione nulli ante se Cæsarum secundus, cui filius natus major Ferdinandus III. in Imperio & Regnis successit, non paternarum modò ditiorum, sed virtutum etiam & gloriæ hæres. Ad illum post aliquot mensium intervallum Legatus Turcicus venit,  
lite-

litteras Amurathis adferens, quibus sibi Ferdinandi obitum gravem molestumq; accidisse significabat, precariq; , ut illius animam Deus Opt: Max: culpis remissis in æterno Paradiso collocet, tum se pacem cum illo iſtam ſervaturum pollicebatur, ſi ſecundùm conditiones illa à Ferdinando filio quoque obſervetur.

Poſteà bello acerrimo, jam cum Moſchis, jam cum Perſis vario eventu per quinquennium geſto, Amurathes quoque fatiſ concedit, nullâ relictâ ſobole, cùm paulò antè Babylone expugnata, Regéq; Perſarum ad pacem compulſo, gloriøſè Conſtantinopolim fuiſſet reverſus. Poſt illius obitum, delatum eſt Imperium ad fratrem ejus Ibrahi- mum viginti octo annos natum, qui eo ſine à Turcis in Amefia ſervabatur, quòd Amurathem minùs potentem ad genè- randam prolem adverterent.

Iſ ſtabilito in præſens dominatu, in- ducias quoq; cum Cæſare pactas, ratas habuit, maritimum adverſus Venetos bellum meditatus, quòd tum ſtatim eru- piſſet, ni Veneti tempeſtivè purpurato-

rum præcipuos pecuniâ & muneribus placâssent.

Gliscientibus tamen odijs, suspicio-  
nibûsq; utrinque, anno demum quadra-  
gesimo quinto erupit, ita celeriter à  
parte Turcarum, ut Veneti priùs arma  
hostium senserint, quàm præscierint.  
Nam Ibrahim, ut illos magis improvi-  
sus aggredi posset, eo toto apparatu bel-  
lico, quem ab anno instituerat, Melitam  
Insulam peti simulabat ( quoniam paulò  
antè Melitenses navigium Turcicum,  
quo una ex uxoribus ipsius cum filio  
parvulo vehebatur, interceperant ) quo  
fine etiam Oratorem Venetum, qui Con-  
stantinopoli degebat, arctâ custodiâ ob-  
servari iussit, nè per illum cœpta consi-  
lia emanarent.,

Tandem rebus omnibus dispositis,  
& classe navali quàm integerrimè in-  
structâ, Cretam Insulam, quæ Veneto-  
rum ditionis est, Turcæ aggrediuntur,  
expugnatóq; propugnaculo S. Theodori,  
quod est ad Borealem Insulæ plagam,  
Caneam portu & munitionibus cele-  
brem urbem, terrâ mariq; circumfident,  
ac post bimestrem obsidionem, ante-  
quam Venetis submissa auxilia à Ponti-  
fice,

fice, Hispano & Principibus Italiæ acce-  
lerâssent, occupant. Neq; satis fuit ma-  
ri Venetorum tentâsse vires, sed terre-  
stribus quoq; copijs infestam fecêre Tur-  
cæ in Dalmatiam excursionem, Novigra-  
do, seu panico terrore, seu proditione in-  
tercepto, ac penès numerosâ hominum  
multitudine, in abominandam servitu-  
tem à barbaris abductâ.

Haud multò post, Veneti auxiliorum  
ope Caneam magnâ virium contentione  
recuperare satagebant, sed in vanum,  
Turcis fortissimè se tenentibus.

Sequenti anno, ad initium veris, Tho-  
mas Molefini Venetæ classis in Ægeo  
Præfectus, deprehensis in freto Helle-  
spontiaco centum onerarijs Turcicis,  
quæ multo commeatu onustæ ex Apol-  
lonia & Alexandria Constantinopolim  
petebant, eas dispersit: atq; iterum men-  
se Julio cum classe Turcica congressus,  
eandem prælijs duobus profligavit, to-  
tòq; mari exegit, cæso supremo classis  
illius Præfecto, & reliquis in fugam aut  
servitutem datis.

Nihilominus Turcæ resumptis viri-  
bus, mense Octobri, cum majori classe  
ad Cretam Insulam reversi, Caneam,

quæ interim à Venetis obsidebatur, liberant, & necessariorum abundantiam communiunt. Inde Rethimnum oppidum septem à Canea miliaribus distitum, fuso exercitu Venetorum, vi atque armis ad deditionem cogunt. Reperta est ibidem ingens rerum omnium præda, & præter magnam copiam commeatum, tormenta bellica cum eorum apparatu supra centum, aliâq; instrumenta militaria, auri etiam atq; argenti, vestimentorum & mercimoniorum plusquam satis.

Conabatur tum Respublica Venetorum inducere in societatem armorum, VVladislaum ejus nominis IV. Poloniæ Regem, atq; etiam Alexium Michalovicz Moschoviæ Ducem; & res hæc successisset utique: jam enim VVladislaus viginti Germanorum millia habuit eo fine collecta, præter Polonorum & Litvanorum copiosissimas turmas, Cosacorumq; Phalanges; Moschus quoque & Basilus Moldaviæ Dux, sociâ sua arma spoponderant: sed obstitit huic intentioni Polona Nobilitas, quæ pacis fœdera cum Turca inviolabili tenore servanda suadebat, nec committendum, ut sine ulla  
causa

causa barbarus hostis, terrâ mariq; potens, irritandus, & ad arma concitandus esset. Timebant enim Poloni, nè si Veneti à fœdere desciscerent, & cum Turcis pacem clam inirent, sicut aliquando fecerant, totam belli molem in se provocarent : quare spectatores, quàm socij, aut adjutores esse maluêre.

Veneti tamen provolutas in se totius Imperij Ottomanici vires, hosti intrepidè occurrentes, forti animo sustinuerunt. Accidit autem illis in commo- dum, quòd exorto per Janiczaros & Spahoglanos Aulæ Equites tumultu Byzantij, primò magnus Vezirius, deinde ipse Imperator fuerit interfectus. Anno 1648.

Unde cùm ea de causa res Turcarum maximis in turbis versarentur domi, Veneti potentiores effecti, toto propè anno fauces Hellespontiacas obsederant, atq; ibi vicinum omne mare infestum reddebant, ut omnis ferè aditus exitusque in Ægeum pelagus, navigijs Turcicis præcluderetur.

Tandem Turcæ tumultu domestico utcumque sedato, & in locum Ibrahimi filio ejus Mahomete puero sex annorum substituto, classem Africanam, quam



anno superiore maximis sumptibus instruxerant, sibi in auxilium evocârunt : quo facto, cùm aliquot triremes è faucibus Hellesponti non animadvertentibus Venetis erupissent, conjunxerunt se navibus septem Africanis, & in portu Foggiano non procul Smyrnâ urbe confederunt.

Erat tunc classis Venetæ Præfectus Jacobus de Riva, qui exploratâ hostium statione, in ipso aditu portûs aciem instruxit, atq; ex omnibus navigijs suis in classem Turcarum fulminavit, tanto impetu, ut brevi spatio quinque naves in profundum demerserit. Inter hæc autem una longè maxima, pulvere nitrato & globis pyrobolarijs gravis ignem concepit : quod videntes Veneti, nonnulli ipsorum contempto mortis periculo, desilierunt in mare, & ardenti navigio per ignem & aquam adnatantes, funes anchorarios acri ascia interfecerunt. Quare navigium illud ardens vento & flammis impulsus, & in classem Turcarum illatum, proxima quæq; navigia eodem incendio involvit. Tota penè classis Turcarum tum deleta est, magna cum strage vectorum, quos  
aut

aut violentia ignis, aut dum illum fuggiunt, aqua absumpsit. Turcæ damnum illud ad vicies centena millia aureorum æstimârunt. Porro Respublica Veneta actis per omnia templa Deo solemnibus gratijs, sex millia aureorum inter pauperes distribuit.

Variâ deinde fortunâ utrinq; bellatum est, jam Venetis, jam iterum Turcis prævalentibus, usq; ad annum 1655. in cuius mense Majo Mahometes ejus Nominis IV. annorum tredecim & quatuor mensium adolescens, filius Ibrahim, Ottomanici Imperij insignia Constantinopoli suscepit, frameâ à Muphti sacrorum Turcicorum Præfide in templo accinctus, qui apud illos sanctissimus inaugurandi modus habetur. In Hungaria verò etsi induciæ pacis renovatæ fuerint, tamen ab excursionibus utrinq; limitaneus miles non cessabat.

Anno post Mahometis inaugurationem sequente ad finem Mensis Junij, classis Turcica trium ac centum navium, à Venetis & Melitenfibus in Hellesponti faucibus non procul à Dardanellis, ita dictis duobus munitissimis, uno in Europæ margine, altero Asiatica in ripa

ad passus tantum mille & quadringentos à se distantibus castellis, tridui pugna, disiecta fuit, cum ingenti Turcarum clade, ita ut è tanto navium numero, non nisi quatuordecim triremes fugiendo evaserint, cum una prætoria, cui Bassa præfuit : reliquæ omnes aut igni corruptæ, aut alias expugnatae, captæq; Christianorum non amplius trecentis desiderati sunt : è contra Turcarum aliquot millia, aut ferro absumpta, aut freto absorptæ, ceciderunt. Insuper Christiani nominis captivorum, qui ad remos damnati à Turcis fuerant, quatuor millia liberata.

Quarto post eam victoriam die, Veneti Tenedum versùs copias reduxerunt, & tertio Nonas Julias Insulam oppugnatione aggressi, spatio duarum hebdomadarum, obsessos ad deditionem coegerunt : quam tamen post annum iterum amiserunt.

Interea Mahometes Turcarum Princeps, offensus Georgio Ragocio Transylvaniæ Duci, quòd neglecto suo jussu Poloniam oppressum pro Svedis iverat, Principatu Septem - Castrensi abdicat, & primò Franciscum Redajum, deinde Acha-

Achatium Barchajum ejus loco Transylvaniam accipere jubet. Quia verò Ordines terræ cum Georgio sentiebant, multum ea res peperit turbarum, jecitq; radicem præsentis mali, quod initio quidem videbatur modicum, sed jam cunctis patet, in quantam atrocissimi funestiq; belli excreverit molem.

Menſe Julio Ragocius exercitum Turcarum, non procul ab arce Arad memorabili prælio fudit, cœſis ad tria millia hoſtibus : inter quos erat Aly Præfectus Vacienſis. Capti Baſſa Agri-enſis, Muſtapha Præfectus Strigonienſis, Aga Tribunus Janiczarorum, Aly Præfectus Budenſis, Haſanes Præfectus Lippenſis. Vezirius ipſe per Maronem fluvium evaſit, quem deinde Byzantium reducem, ob rem malè in Tranſylvania geſtam, Mahometes ſtrangulari juſſit.

Idem Turcarum Princeps Legatum Suediæ Regis, amicitiam conſœderationemq; æternam & inviolabilem cum Porta Ottomanica ambientis, re infectâ dimiſit, moxq; Byzantio Adrianopolim movit, ut à Dalmatia, quâ Venetos ejicere conabatur, propior eſſet ; & tunc à Rege Hungariæ Leopoldo, ſicut antè à  
Sacra-

Sacratissimo Cæsare Ferdinando III. per fines Croatiae in ditiones Venetorum, quas in Istria & Foro Julij possident, transitum petijt, qui tamen illi negatus est. Immisit etiam mari classem recenter instructam, ac post tentatum Sudæ fortalitium, Civitatem quoq; Candiam aggressus est, sed ab utroq; cum notabili suorum clade rejectus.

Post incolumem Sac: Cæs: Maj: Leopoldi Hungariae & Boëmiæ Regis à coronatione Imperiali reditum, Legationes ex varijs locis Viennam confluerant, inter alias etiam Turcica, quæ ei felicia novi Imperij auspicia apprecabatur.

Ad initium anni sequentis, Mahometes turbis domesticis, quæ illum sat diu exercuerant, sedatis, & Bafsâ Alepponensi, alijsq; earum barbarum authoribus strangulatis, eò fortiùs bello adversus Venetos & Ragocium promovendo incubuit. Sed adversus Venetos classis emissa sinistram experta fuit fortunam, tentatâ frustra Spinâ longâ & Candiâ urbe, acceptâ insuper clade insigni: meliorem habuit successum Aly Bassa contra Ragocium, quem penè totâ Transylvania

vana eiecit, ac demum mense Majo, anno 1660. commisso cum illo ad Claudio-  
 polim cruento prælio, lethaliter læsum  
 fudit, fugavitq; ; qui cum Varadinum se  
 recepisset, & ab inflictis vulneribus nullâ  
 arte sanari potuisset, decimâ sextâ à præ-  
 lio die obiit. Quo fato functo Aly Bas-  
 sa Varadinum obledit, moxq; omnia ma-  
 gna cum celeritate, quæ ad impressio-  
 nem faciendam requirebantur, peregit,  
 ac demum infestissimè oppugnavit.  
 Quamvis autem Præfidiarij Arcis unâ  
 cum civibus forti animo diu satis obli-  
 dionem tulissent, & tot oppugnationes  
 factas imperterriti excepissent; ultimò  
 tamen cæso Præfecto Arcis, & militibus  
 quàm plurimis è medio sublatis, cumq;  
 insuper nec instrumenta nec materia ad  
 restaurandum ea, quæ hostilium tormen-  
 torum vi erant convulsa, neq; annona ac  
 pulvis sufficerent, & subsidij spes nulla  
 affulgeret, in certas deditiois leges  
 cum Aly Bassa convenerunt. Eæ verò  
 erant, ut Præfidiarij omnes, cum omni-  
 bus fortunis, impedimentis & armis, sub  
 signis explicatis urbe & arce exirent, &  
 securi ac liberi Dobrzecinium deduce-  
 rentur.

Datis


Datis ergò ultro citroque obsidibus, Christiani 22. Augusti egressi, propugnaculum totius Orbis Christiani munitissimum, & harum partium clavim, immanissimo Christianorum hosti, cum tormentis & alio omni apparatu bellico tradiderunt.

Brevi postea Status Transylvaniae in Comitibus Regni celebratis, Achatium Barchajum à Gubernio Principatus amoverunt, & loco ejus Joannem Gemini, antea Ragociani exercitus Ducem, sibi in Principem elegerunt. Hic cum manifestè detestaretur Imperium Turcarum, neque eorum iniquissimis mandatis obedire vellet, occasione suae potius intentus, si quo modo Caesarianos ad facilius propulsandam barbarorum vim, in societatem armorum allicere posset; insuper cum Achatium quoque & fratrem ipsius Andream perduellionis infimulatos, capite plecti curasset; Turcas incitavit adeò, ut Byzantio novus Bassa cum exercitu adversus illum missus fuerit, nomine Ismaël, qui cum Aly & Hafane Bassis, atque Tartarorum quinque millibus junctus, Zathmariensemque regionem ingressus, tum statim initia Regimi-



giminis ejus non turbâisset tantùm, sed oppressisset etiam, ni Cæsareus miles ei in tutelam ac defensionem succurrisset.

Castella tamen aliqua partim vi, partim deditione occupavit, & Michaëlem Abassi, Prætoris Cibinensis filium: juvenem audacem, manûq; promptum, ipsi rivalem opposuit. Sicque tam diu gliscebant hostiliter utrinq; animi, donec cæso quoq; Gemenio, & Abassio in Principatu Transylvania confirmato, moles tandem totius belli, cujus apparatus diu antea cudebant vaferrimi hostes, erupisset in nos, ut improvisè (pacis spe paulè antè nobis objecta) ita noxiè, & cum tanta, heu ! non solùm Regni Hungarici, sed vicinarum quoq; Provinciarum, nunquam satis deploranda attritione & clade. Sed quæ motiva ad repellendam tam immanem vim esse possint, videamus.





## P A R S II.

Motiva ad succurrendum  
Hungariæ, & capeffendum uni-  
versale contra Turcas  
bellum.

## I. A Necessario.



**S**aliquando contra  
communem hostem u-  
nanimi consensu, & to-  
tis viribus arma fumen-  
da erant, jam sunt; jam  
institonandum universale Sacri Belli clas-  
sicum, instituendi quàm validissimi ar-  
morum apparatus, habendi quàm for-  
tissimorum delectus, exciendi sub signa  
bicipitis Aquilæ omnes Imperij Status,  
contrahendi exercitus, instruendæ acies,  
ac dirigendæ pleno passu adversus im-  
manem Orientis barbariem, diram ser-  
vitutem, & extrema quæq; Christianis  
in Europa gentibus minitantem.

Vide-

Videmus enim, quantâ rabie feratur in universum Orthodoxæ fidei nomen, quantâque truculentiâ ad evertendam Rempublicam Christianam, & subjungendum totius Romani Imperij decus, ut non justo belli odio, non veri hostis more, sed furore quodam, Eumenidum instar, antemurale nostrum, hostilem in modum aggrediatur, illúdque instanter premat, videaturque manifestè nil aliud meditari, quàm ut everso eo, in nos arma, totiúsque belli vim convertat, atque ita, quod cupit, Christianorum nomen conculcet, Orbisq; Imperium assequatur.

Non est contentus rabidus ille ac truculentissimus hostis, tam vasto jam antè in Asia, Africa & Europa dominatu; non satiatur duabus Imperij Sedibus, Constantinopoli & Trapezunte, nec possessione totius Græciæ, ac Regnorum florentissimorum quondam, ut Macedonia, Epiri, Dalmatiæ, Bulgariæ, Illyrij; nec non Insularum Rhodi, Cypri, Lesbi, Tenedi, Cycladúmque, & aliarum in Ægeo & Jonio mari: nec potiore Regni Hungariæ parte, nec Transylvaniâ, Moldaviâ & Valachiâ sibi vectigalibus;

bus ; & ut paucis omnia complectar, non est contentus iniquissimus prædo, duobus Imperijs, ac septuaginta septem Regnis, Provincijsq; innumeris, quæ omnia à Majoribus suis Christiano nomini per summum nefas erepta possidet : sed nunc quoq; ipsemet Romanum Imperium, tanquam hoc sibi relictum certamen evertere, atque de medio tollere intendit, ad idque properat, ut devictâ Hungariâ, & Transylvaniâ in provinciam redactâ, cætera quoque Europæ Regna, possessis terræ suæ plagis adijciat.

Et hanc diram rabiem evomisset in nos pridem, si suo furori atq; scelerato consilio modus adfuisset : sed pro vafritie sibi innata captabat tempus, quo tutior impunitiorq; nefandi voti compos existeret. Unde certior factus ante biennium de Cæsaris nostri bellico apparatu, ac postmodum de copijs tam pedestribus quàm equestribus ex Imperio in Hungariam affluentibus, egregiæque instructis, pacis firmandæ tractationem simulabat, ut ita nostros in spem pacis erectos segniores redderet, & se interea ad bellum eò fortius nobis infe-

rendum præpararet. Atq; utinam tum statim jacta fuisset belli alea, & obtemperatum gravissimis, prudentiæq; & experientiæ opinione clarissimis viris, qui multis adducti rationibus, bellum contra immanem Tyrannum, pro recuperando Regno Hungariæ, proque aris & focis suscipiendum censebant: præsertim cum eo tempore ipsimet hostes, non secus, ac si nulla pax, nullum foedus ictum esset, in superioribus citra Tibiscum Hungariæ partibus, agros urere & populari, miseram plebem quotidie ferè, varijs indignisq; modis ad dediti-  
nem compellere, arces finitimas, quarum præcipua erat Varadinum fortissimum illius regionis propugnaculum, & clavis harum Provinciarum, partim fraude & astu, partim apertâ vi invadere, expugnare, imperium per fas & nefas prolatare contenderint. Sed maluimus tunc (nescio quo fato!) ire in sententiam, extrema omnia alia prius, quàm bellum experiri consulentium. Et ecce in Charybdim seu voraginem & farraginem malorum, quam evitare volumus, incidimus, subdoli hostium consilij, & machinationibus, tandem

in nos ex improvîso erumpentibus. Jámq; primo advertimus, quæ habenda sit fides perfido ac sceleratissimo Mahometi, qui ut prætexeret sibi justum belli hujus titulum; datâ operâ tam iniquas pacis conditiones proposuit, quas ne victi quidem dignè tolerare potuissent. Sic omnia sibi licere statuit nefanda, impij hostis temeritas, ubi nostrorum animos vanâ spe pacis elanguisse videt.

Quousque ergo Christiani Principes tantam truculentissimi hostis violentiam passuri estis? an dum vobis in viscera ruat, vestrisque Penatibus vincula circumdet? extinguendi sunt citò extinguendi improbi illius conatus, nè sensim per ignaviam nostram crescat incendiû, & serum (quod ominari reformidat animus) remedium conqueramur: cùm à parvis initijs, à Majoribus nostris neglecta Tyrannis illa, funestum extulerit caput, & tam vastas auxerit vires. Prospicite ad impendens toti Hungariæ periculum, imò ad exortum jam atq; impetu pleno excitum malum, mox, nisi citò occurratur, Germaniam cæteraque Europæ Regna invasurum; ut meritò Hungaria præsentibus coarctata angustijs,

stij, tum Germaniæ, tum Italiæ & Poloniæ alijsq; Christianæ Reipublicæ Regnis occinere possit illud : Hodie mihi, cras vobis. Serpit enim in dies hoc virus magis ac magis, nunc una Provincia, una urbs, nunc alia deficit. Transylvania jam novissimè ferè tota occupata, uberrima Hungariæ terræ portio, ac plena insigni fortissimòque populo, futura successu temporis fatalis tam Germanicæ, quàm Sarmaticæ genti, ni in pristinum statum reduceatur. Dux gentis & omnis Status à jussu Turcarum totus pendet. Hungari etiam, qui hactenùs nobis muri loco fuère, magnâ affecti plagâ, obriguerunt toti, deletâ mox in limine belli trium, validissimorum Comitatum Nobilitate, unâ cum Germanorum è promptissimis selectâ cohorte : quam cladem sequuta Novarum Arcium infestissima obfidio, ac brevè post deditio deploranda serò nimis.

Emissa quoq; Tartarorum ferocissima gens, totius illius Regionis tractum inter Granum & Moravam crudelem in modum depopulata est, hominum ultrâ triginta millia, partim cruentâ cœde consumptis, partim abductis, ut jam in



illa paulò ante florentissima cis Danubina superiore parte Regni Hungarici, nihil sit videre nisi desertum quoddam, horribile, & fumantia latè incendia oppidorum atq; villarum, vera ac genuina hostis immanissimi vestigia. Succumbérq; tandem Hungaria attrita lassatáq; tot & tantis malis, ac impar hostium viribus. Quod si fiat, publicum privátumq; fatum quisq; sibi ante oculos proponat : nam quid in Austria & Moravia erit uspiam virium, quod inclinatam rem Christianorum sustinere, & elatum tantâ fortunâ hostem reprimere possit? præsertim in Moravia, cujus magnam partem hostilis crudelitas similem in modum, ut Hungariam, flammâ ac ferro exhaustit, oppidis & pagis compluribus cum annona penè tota incendio consumptis, & hominibus sexûs omnis ad decem milia partim cœsis, partim in captivitatem abductis. Si ergo firmaverit ille suas in Hungaria ab utraq; Danubij ripa vires (quod quàm facilè jam occupato Novarû Arcium munimento efficere potest?) considerate reliqui Europæ populi, quæ vos manent? non labori, non periculis, non impensis ille parceret, modò aliquid  
sem-

semper de Provincijs Reipubl: vestrae  
abradat, ac tandem sibi dudum optato  
super vos Imperio potiatur.

Quapropter non sine causa veteres  
Germaniae Italiaeque Principes, quemad-  
modum & Coronae Regni Bohemiae Sta-  
tus durante cum Turcis bello sub auspi-  
cijs Ferdinandi I. Maximiliani II. & Ru-  
dolphi II. Caesarum, tantam habuere Re-  
gni Hungarici curam, ut totis viribus in  
succursum non semel accelerarint, tan-  
tis in id ipsum collatis expensis, ut no-  
bis posteris vix credibile esse possit. So-  
la Bohemia cum Provincijs Coronae uni-  
tis, Moravia, Silesia, & utraq; Lusatia,  
supra septingentas Florenorum Rhena-  
norum Myriades, postremo illo quinde-  
cennali bello, ut ex Actis Comitiorum  
patet, contribuit; praeter ea, quae in ex-  
structionem fortificationemque Comaro-  
nij & Vgvarini, seu Novarum Arcium,  
contulit. Praesciebant enim solertissi-  
me, si vinceretur Hungaria, aut coacta  
jungeretur Turcis, non fore Bohemiam,  
neq; Germaniam, neq; Italiam in tuto.  
Quantum non incussit aliquando terro-  
rem toti Germaniae Jaurinum à Turcis  
captum? Canisa quoque perdita, & pote-

stati hostium data, quem non intulit Italiae metum ? at nunc cum sint multò in deteriore periculosiorèq; res Hungarorum statu, quàm fuerint unquam ; considerandum est, ac seriò perpendendum, ne superveniant in nos ea, quæ extimescebant Majores nostri, ac nè tandem vicini obruantur crudeli hostium jugo, illudque malum nè in nos devolvatur. Quid enim obstare potest, ut ij, qui adhuc supersunt, non ad unum pereant sub hostili acinace omnes, nisi citò potens exercitûs nostri auxilium adsit oppressis.

Quare omninò præveniendum est citò, accelerandûmq; ijs viribus, quibus impetus hostis, si non ex toto tolli, saltem frangi possit : dandum & afferendum quantocyùs tale auxilium, quo amoveri & extinguì queat fax funestissimi belli, antequàm conflagremus universi.

Neq; enim, si verum fateri volumus, multis antè seculis periculosior erat, quàm modò Patriæ nostræ status. Retroactis namq; temporibus foris, hoc est, in alienis terris, cœsi fuimus : nunc verò imminet vulnera nobis in Patria,  
& in

& in domo propria, ab hostibus infligenda, sumpto mali hujus initio à Moravia, ecce jam à membro vestro Germani & Bohemi, à vestra Marchia, cujus huc usq; ab effuso civium sanguine fumant latè patentes campi. Considerate igitur, quantum momenti sit, in tam periculoso rerum nostrarum statu, ut tempestivè obvietur hosti. Quare tollenda est omnis mora, abijciendæ omnes illæ consultationes, quas bellī necessitas & periculum præsens expectare non potest, peragendæ omnes Provinciæ, edictum proponendum, percensenda capita, exercitus impigrè cogendus, nè cùm hostis in interiora nostra irruerit, minitabundus extrema cervicibus nostris, nos tum primò fera bellī consilia quæramus. Consurgite tempestivè universi, & patriam, uxores, liberos, fortunâsq; vestras per summam gloriam vobis vindicate, defendite, & ad veram libertatis tranquillitatem reducite, sicq; Germanici nominis heroas vos, omni deinceps futuræ ætati ostendite. Consurgetis aliàs vel invitī, cùm hostem impatientem, ac fortunâ suâ elatum, libertatem atq; imperia

vestra evertentem, & valido cruentóq;  
 ore, pollutis atque sacrilegis manibus,  
 ad sanguinem vestrum hauriendum  
 proruentem videritis. Sed nunc nunc  
 vires viribus, arma armis conferentes  
 accelerate, non expectando ut irruat  
 ille prius in viscera nostra, sed in eum  
 ultrò irruamus : ad quod vos hostis  
 ipsemet admonet, quem jam jam in  
 conspectu habetis. Prædam ille poscit,  
 regnandiq; solâ cupiditate in vos ruit :  
 vos ne præda sitis, & ut cives patriæ de-  
 bitum exsolvatis, cujus pietas omnem  
 superat pietatem, & pro qua nunquam  
 nimis sanguinis datum videri debet, **o**  
**m**nia fortitudinis signa demonstrate,  
 conjunctisq; viribus audacter prædonem  
 illum aggredimini : qui cùm ita con-  
 junctos & animatos viderit, certè poeni-  
 tebit eum consilij sui, vel si ire pergat,  
 sceleratam dominandi cupiditatem ma-  
 lo suo est depositurus. Nihil enim  
 magis, quàm conjuncta Christianorum  
 arma formidat.

Et quid ulterius abhortatione opus,  
 pro ea causa, quæ defensa salutem & li-  
 bertatem : omissa (ominari horreo) quæ  
 ferat. Habemus ante oculos Hungarici  
 Regni

Regni ruinæ, aliorumq; Orientalium, haud leve documentum, quo satis admonemur, ni nobis melius providerimus, quanto in periculo sit quoq; status rerum nostrarum futurus.

Pro victoria olim & pro decore nominis cum Turca dimicâstis, Germani & Bohemi : at nunc, pro salute, libertate, pro aris & focis, est vobis pugnandum. Orientis ille adeptus imperium, ad Occidentale festinat : novam ex vobis erigere Monarchiam conatur, uni Ottomanorum imperio, uni Mahometanæ legi cuncta submittere studet.

Et primus quidem barbari impetus irruet in vos Austriaci, Moravi, Bohemi & Silesij, ut inde velut superatis claustris imperij in Germaniam perrumpat. Vos post Hungaros belli ejus primitiæ manent. Vos proinde (si residet quicquam in pectore virtutis antiquæ, si & viget in vobis viris fortibus vincere doctus animus) conemini contrà quàm audacissimi ire, superbas hostis vires conterere, ac feroces frangere ejus spiritus : à vobis & timoris & spei initium sumpturus est Mahometes. Quod si ita animatos offenderit, ut vos nunc validissi-

mo conatu ad resistendum disponitis, majorem ubiq; vim periculi timebit, & documentum eo ipso feret abstinendi ab ulterioribus. Vos verò Austriæ ac Bohemiæ vicini, cùm res quoq; agatur vestra, succurrite socijs, neq; patiamini ut succumbant, & vos pariter in discrimen trahant. Meritò enim debet vos, Bava-ri, Saxones, & Pomerani pulsare pavor timórq;, nè, si tam immanis hostis Hungariam & Bohemiam absorbeat, eodem quoq; calamitatis tenore, sumptis velut inde victoriæ auspicijs, & ferociæ alimentis, vestram fortunam trahat : maximè si iniquo aliquo sydere Silesiâ quoq; atrox Tyranni animus compos fiat. Inde enim quâ datâ portâ in Lusatiam ruet, neque solùm in Marchia Brandenburgici tutum erit, sed anterior quoq; Pomerania & Saxonia, omnisq; illa ad Albim usque regio, pulcherrima Germanici Imperij portio, in summo periculo constituetur. Date ergo & afferte auxiliatrices copias, quibus amoveri commodè tantum periculum possit, antequàm eo involvamini universi. Satis se quisq; defensum, patriósq; Lares tutos existimet, si defensos nunc vicinos socios à præsentis periculi vasti-



vastitate, præstabitis : nam ab his certè tum publicè tum privatim, incolumitas omnium vestrum, & quietissima possessio rerum fortunarúmque vestrarum, tum Provinciarum securitas, secunda quoque Germanici nominis gloria, dependet : ijs oppressis, & vos semper in periculo eritis : ijs servatis, & vosmet ipsos à periculo præservabitis, sicq; optimè paci & tranquillitati vestræ consulatis. Neq; diutiùs in tardis consultationibus terite tempus, cùm maxima vis periculi hic sit, in minima mora ; satis jam satis consultationibus, satis & ignavo dolori datum est.

Proinde sumenda sunt arma vobis, non eo passu, velut in domesticos aliòsque hostes consuevistis, sed majori longè celeritate, & majori irâ indignationeq; , tanquàm in barbaros, non tantùm opes vestras, sed sanguinem quoq; sitientes.

Non timent hæc fortasse Germani qui Rhenum, Visurgim, Mosam & Mosellam accolunt, neq; Galli, neq; Hollandi, tot aquis & fluminibus circumfusi. At idcircone, quia illi tutiora tenent, nos velut piacula quædam luendis omnium periculis hosti obijciendi sumus ? non mo-

vebit illos miserabilis rerum nostrarum status, non imminens gravissima sub crudelissimo jugo servitus? non fœda vincula, non mœstissimæ opem implorantium jam jamq; labantium voces, nec Christiani nominis pietas; sed ita derelictos, & quasi jam perditos ab immani rabie hostium dilacerandos nos finent? Heu perijmus jam omnes, dum quisq; sibi se tantum natum existimat? conflagravimus jam omnes, dum nemo incendium ad se putat trajecturum? fuit undique noster cruor, deficimus in dies, nec sentimus? Proh dolor! incidimus in ea tempora, ut vilior jam apud Turcas Christianorum, quàm jumentorum futurus sit sanguis; eveniétque certò, si hæc diutiùs hostium pestis, nostra ignaviâ invaleseat, ut triginta ex nobis vix uno obulo liceant hostes: quod in captivitate illa Hierosolymitana de Judæis Scriptores referunt. Atque utinam falsus sim Vates, & dira hæc, quæ horrens præagitur animus, Deus immortalis à diebus nostris longè amoveat: sed tamen quin evenire possint, pro incredibile rerum humanarum inconstantia, & pro ea, quâ laboramus

Chri-

Christiani omnes, ignavia, haud facile  
quis abnuerit.

Nolite ergò nolite, vos omnes cis &  
trans Rhenani populi, idcirco, quia à  
barbaro hoste longius dissiati estis, ster-  
tere, & permittere nos socios vestros,  
membra vestra, ejusdémque Religionis  
fratres, rapi in vincula, in cœdes, atque  
in deplorandam servitutem: sed afferte  
quàm citissimè opem, afferte auxilium,  
ac seriò perpendite, an salvis adhuc &  
integris utcunque nobis, an postea ex  
toto fractis atq; oppressis id agere ma-  
gis expediat? Perpendite quoq; an non  
melius, si virtus vestra, cum hoste illo  
immanissimo, extra potiùs, quàm intra  
patriam confligat? Enimverò non sine  
causa prudentes, hujúsque omnes Rei-  
publicæ Gubernatores, bellum foris  
quàm domi maluère, & ita remotissi-  
mam semper laudavère militiam: ipsa  
námque ratio Statûs id exigit ac svadet,  
faciendi sedem belli in alieno potius,  
quàm domestico solo; foris enim, si  
quæ accepta sit calamitas, emendari  
potest: at quæ domi excipiuntur clades,  
exitiales habentur: perniciofa & fu-

nesta sunt , quæcunq; gerimus in nostris  
Laribus bella.

Romanis Orbis domitoribus nulla  
suscepta calamitas durior, quàm in Italia  
fuit : nec illi Hannibalem felicius quàm  
in Africa vicerunt. Hinc ille eo expe-  
rimento doctus, cùm deinde exul esset,  
& Regi Syriæ Antiocho, adversus Ro-  
manos bellum suaderet, non in Asia neq;  
in Græcia, sed in Italia pugnandum esse  
dicebat. Et vos ergo Germani, sic  
agite, imitamini hac in re non Romanos  
tantum, qui sociorum tutelam semper  
suam salutem ducebant, ac foris quàm  
domi pugnare malebant : sed & Majo-  
res vestros, qui remota semper à domo  
bella gerere, ac vicinorum fines, non  
minùs quàm suos tueri consueverunt.

Denique si vobis per summum ocium  
dissimulantibus, sub hostile jugum de-  
veniat Hungaria, & Bohemia, cum ad-  
jacenti nobilissimarum Terrarum tra-  
ctu, Austria, Moravia, Silesia, ( taceo  
jam hìc de Transylvania ) pensitate,  
quantas non inde vires assumet potentia  
Ottomannica, an non aliquando formi-  
dandas toti vestro Imperio ? non erit  
imposterum necesse hosti, ut Asiaticas  
copi-

copias huc semper evocet, cum tanta  
 longissimi itineris difficultate, impen-  
 sâsq; , habebit jam de subjugato hîc po-  
 pulo sufficiens ac regionibus auræ assue-  
 tum ad invadendos vos robur : præfer-  
 tim Hungari, si coacti jungantur Turcis,  
 irritabuntur eâ contumeliâ, quòd à vo-  
 bis derelicti sint, tantòque odio & irâ  
 effervescent in vos, ut ferrum in hostium  
 perniciem destinatum, in vos ipsos con-  
 vertant, atq; illud vestro, & Conjugum,  
 fratrum, liberorúmque & necessariorum  
 vestrorum cruore cædèque commacu-  
 lent : & tunc extimescendum est, ne  
 redeant illa tempora, quibus olim Hun-  
 gari, priusquàm Christum colerent, à  
 finibus suis digressi, non tantùm Au-  
 striam & Bavariam, sed Sueviam quoq; ,  
 Franconiam, Saxoniam, & utramque  
 Rheni ripam, imò & remotiorem Gal-  
 liam & Hispaniam percurrerunt afflix-  
 eruntq; crudeliter. Potuère id Hungari  
 soli : & quid non poterunt Turcæ, tam  
 vastæ potentiæ hostes, Hungaris aliisq;  
 Vectigalibus suis populis conjuncti.  
 At, sunt fortasse nonnulli vestrum, qui  
 suis diebus non videri similia, nec fieri  
 posse confidunt : atq; utinam hæc à vo-

bis transeant. Vereor tamen ego, ne in hac parte folia recitem Sibyllæ. Venient, venient Turcæ, nisi obviam iveritis, & auferent vobis locum, & gentem.

Scio equidem ob stare, quo minùs succurratur labanti Hungariæ, domesticam Principum Christianorum æmulationem, Religionisque dissidium: quod, an non sit justè deplorandum? ita enim intestinis bellorum turbis, assiduisque seditionibus, & factionibus, quibus nos Christiani continuò ferè agitamur, fovemus & augemus hostis nostri immanissimi potentiam: ita dum nova civilia bella meditamur, ægrè tolerando unius & de Ecclesia & de Imperio bene meritæ familiæ continuatam felicitatem, superaddimus illi audaciam, virésq; tantas, ut ecce audeat prior totis nos armis impetere, & apertè ignaviam diffensionemq; nostram arguere. Omnes præesse, omnes imperare volumus, parere nemo. Tanta inter nos animorum diversitas, multi inter nos Reges, multi Imperatores: quilibet tantùm in consilia sua pro libitu voluntatis fertur, suo ingenio unusquisq; sapit, furit suo quis-

quisque facto, suo quisque more vadit. Nullus, aut rarò quis, commune bonum & commodum procurat, ambitiosi omnes, cupidi omnes, odia inter nos maxima, consensus nullus, obedientia nusquam; verbo, nihil eorum, in quibus aliàs tota vis Imperij versatur, in bello præsertim. Intereà quantum crescant, assurgantq; in dies Turcarum vires, difficile dictu est, auditu miserum.

Proinde videte Christiani Principes, & attendite, ne in vobis, ranæ murisq; fabula impleatur, qui dum invicem se morderent, præda Milvi facti sunt. Nullum enim tam potens validumq; imperium, quod non corruat quandoque, atq; dilabatur, ubi mutuis odijs & dissidijs præbetur locus, ubi privata utilitas, propriumq; commodum publico bono anteponitur.

Exemplo vobis sit Constantinopolis urbs magnificentissima, imò tota Græcia, Imperium olim florentissimum, cujus res ancipiti fortunâ agitabantur, enatis discordijs propter Regnum, inter avum & nepotem Andronici, ad usque interitum. Ubi etiam Bosna, quam Mahometes



metes II. dum Hungari cum Austriacis, ob Ladislaum bellum gesserunt, ingressus est? Vastata quoq; Istria, Carnia, Valeria, dum Matthias æmulos virtutis suæ, ad societatem belli contra Turcas gerendi adducere non potuit. Perditum Belgradum Ludovico Rege juvene existente, & Hungaris de Regni administratione discordantibus. Amissa Buda cum innumeris damnis illatis, Joanne & filio ejus cum Ferdinando & Maximiliano de possessione Regni belligerantibus. Et superioribus abhinc annis quodocunq; discordia civilis in eodem Regno exorta fuit, non nisi in lugubres desijt Tragædias: quas, & illas, quæ in præsentia aguntur, horrescit animus referre, nec pro magnitudine damnorum potest. Quis enim innumeras cœdes, incendia, captivitates, & his similia commemoret, quæ ad domestica vulnera & calamitates, Turca in rem suam intentus adjecit? nostris bellis suam ille potentiam, nostrâ jacturâ suum commodum amplificavit, & stabilivit, ut probatissimum sit, nunquam Ottomannicum Imperium majores progressus fecisse, quàm dissidentibus Christianis: neq; tantos animos ad-

ver-

versus populum DEI sumeret, nisi in eo disparitate animorum visâ animaretur.

Utinam jam tandem saperet Christianitas, & sedatis civilibus bellis iniret commune foedus, adversus communem fidei hostem, atque ita post DEUM in concordiae studio praesidium suum adversus illum collocaret, non jaceret profectò diutiùs in eo squallore Europa, sed eò citiùs faciliùsq; potens illa bestia, ad ruinam inclinaret, & unitâ virtute conficeretur. Nihil enim ubiq; Terrarum, & tutiùs armisq; omnibus firmiùs in vita humana inveniri potest, quàm Concordia.

Eam itaq; Christiani Principes unanimi consensu inite, non ampliùs vos intestini aut domestici motus detineant, sed unâ conjuncti expellite priùs communem hostem, qui minatur crudele jugum cervicibus vestris, & quem jam in conspectu habetis pleno impetu in vos ruentem: & postea, si pacem tenere nequitis, de terra, de Dominio, aut etiam de Imperio pugnate, quod non Turcis, sed vestris filijs relinquere valeatis.

Vos praesertim Galli, Christianissima simul

simul ac nobilissima ex Europæis natio, compatiamini Matri Ecclesiæ, quæ ecce super contritionem populi sui, stat mœsta dolens & gemens, neq; est qui consoletur eam. Considerate, quò redactum sit Christiani nominis decus, quantúmq; in Oriente, quantum in Meridie, eheu diminutum ! & jam quoq; Occidentem, versùs, quo in periculo versetur miserabilis ejus status, perpendite.

In angulum Orbis redigitur Christianorum res, jámq; de nobis verè dici potest propheticum illud : *Facti sumus opprobrium vicinis nostris, subsannatio & illusio his, qui in circuitu nostro sunt.* Quotidie carpitur, quotidie aliquid de nobis surripitur, aut opprimitur, ut vel saxeo cordi posset aliquid elicere lachrymarum.

Et vos Christianissimi, vos filij Ecclesiæ primogeniti, impunè sinetis ista ? permittetis ut conculcetur Evangelium, sacra nostra ut prorsus abijciantur, Christianum nomen funditùs ut eradicetur ?

O si viveret nunc Ludovicus IX. tuus Ludovice XIV. sanctissimus antecessor ! si quoq; adesset Hugo ille magnus, Raymondus Tolosanus, Robertus, & unà cum illis

illis Godefridus, Baldevinus, Eustachius, Bullionei fratres, qui quondam Hierosolymam per medias Turcarum acies penetrantes, armis recuperârunt, non finerent profectò rem Christianam his in angustijs, sed justissimo armati zelo, pro decore ejus, pro amplitudine ejus, & pro libertate ejus, ad ultimum usq; spiritum quàm promptissimè decertarent. O felicia illa corpora! (liceat exclamare hoc loco paululúm; digredi) ô verendos mihi semper Manes, qui præclaro fidei servandæ & propagandæ studio, aurum, argentum, ferrúm; , & quicquid vel cupit, vel timet misera mortalium conditio, perinde contempsêre! Et vos itaq; , si cui Christiani nominis pietas, si cui sua virtus, si & cui Natalium splendor, aliquid incitamenti possint subdere, facite revivisci in vobis priscum gentis zelum, assumite seriam Religionis vestræ curam, induite fortes animos, defendite Matrem Ecclesiam, & totis viribus occurrите inimicis Christi. Et si recentiora vos movere debeant, sumite exemplum ab inclyta Italarum gente, ac præcipuè à Serenissima Inviçtissimâque Venetorum Republica, quæ jam ab annis

no-

novemdecim provolutas in se hostis immanissimi vires, pro re Christiana, propè ex æquo, ut neq; victrix, neq; victa, ad hoc usq; temporum, Turcis non nisi de duobus vel tribus oppidis triumphantibus, sustinet. Ex ea, inquam, imaginem virtutis sumite : neq; sitis hac in parte ultimi, quos Christianissimi nominis dignitas jubet exire priores.

Quod Religionis dissidium attinet, scitote A catholicis omnes, communem illum hostem non observare, quid quis credat. Religionis respectus est apud illum prorsus nullus; unde si eum progredi ad vos usq; sinatis, quærendum non erit, in quo statu, vel in qua fide vivere, sed an vivere debeatis. Nec obijciatis, quòd jam recenter Hungaris vectigalibus concefferit largam tam vitæ quàm Religionis libertatem. Visco huic *ne credite Teucris, latet angvis in herba, ignis sub cinere dolofo* : suspecta enim est hæc iniquissimi hostis beneficentia, quâ nil aliud prætendit, quàm ut eâ concessæ libertatis utriusque specie plures sibi alliciat, & sub jugum mittat, ac tandem ex improvviso omnes liberis, fortunis, religione, & vitâ exuat.

Sed

Sed nunc meus ad Polonos convertatur sermo, quos ut etiam ad bellum hoc evocem, tum virtus ipsorum, audacésq; animi imprimis cogniti suadent, tum rerum omnium nostrarum, & illorum periculum discriminéque cogit. Et, ut brevibus absolvam, certum vobis sit Poloniæ Proceres, quòd Mahometes non nisi perfidiâ atque simulatione ductus pacis perpetuæ, ut ille dicit, confirmationem vobiscum non ita pridem inierit, ut quamprimùm alios vicinos Reges & Principes Christiani nominis sibi subijceret, propagatis dehinc viribus & Imperio suo, in vos arma retorqueret. Novistis jam Ottomanorum fraudes, novistis dolos & insidias, quibus omnia sua disponunt, expediunt, & maxima, quæque perficiunt. Novistis, qualiter & quàm perfidè Osmanis atque iterum Amurathis IV. tempore vobiscum, ruptis per summum nefas fœderibus, actum fuerit; & licèt tunc impij hostes, Deo Opt: Max: qui ruptores fœderum ut plurimùm aversatur, irato, à fortuna deserti, amissâ potiore parte exercitûs, meritas pœnas luerint: inde tamen justè ominari potestis, quàm tuta sit.

ha.

Sed

habenda barbaræ genti fides. Quippe nihil aliud gens illa molitur, nihil aliud mente agitar & expetit, quàm nos sejunctos & ab invicem distinctos opprimere, de medio tollere, Regna verò & Imperia nostra arripere, sibiq; vendicare; tantòque nobis & vobis formidabilior esse debet, quantò ipsâ belli assuetudine fortior reddita est ac ferocior: dum insuper sub ductu & auspicijs Imperatoris juvenis, bellicosi, crudelis, & nomini Christiano inprimis infensi, nihil aliud spirat, quàm quomodo Pomæria sui Imperij longè latèque dilatare possit. Et hoc pro indubitata veritate supponendum est, Turcis nec intentionem, nec prætexus deesse opprimendæ Poloniæ, & illam quam præ se ferunt pacem & amicitiam, non diutiùs certò duraturam, quàm, dum occasio affulserit illius tutò violandæ.

Itaque devota libertati pectora, pendite benè hanc in dies magis ac magis crescentis, & fines vestros in longum latumq; nimis ambientis, Ottomanicæ rei magnitudinem, & videte, an unà nobiscum non sit quoque in periculo rerum vestrarum Status? Non patiamini  
ergò



ergò hanc in præfenti jacturam Ucalegonti veftro imminentem, quæ olim & vos pariter cum omni Imperio exhauriat. Non expectate, donec vobis in ima, ad cubiculum & pulvinar ipfum, irrepferit ignis, fed dum adhuc extra parietem domesticum per vicina ferpit, ad extinguendum accurrite. Cavete vobis, cavete libertati & Regno cum possitis, priusquàm vos majora pericula obruant, & tunc velletis, & non poteritis. Ideòq; longè meliùs eft prævenire, quàm præveniri, faciliùsq; fi antea profpexeritis, quàm post illatum fufceptumque vulnus remedium & medelam quærere velitis. Agite ergo, & dum tempus agit rem, nobis, vobisq; confultite: nè post nos etiam vos hostis arripiat, & non fit, qui eripiat.

Exiftimant fortaffe veftvum aliqui, Turcarum Principem obtentâ Tranfylvaniâ & aliquâ parte fuperioris Hungariæ, deinceps quieturum, neq; tantoperè feftinandum cenfent, nè irritatus ille & exasperatus formidabilibus fumptis armis, totam deinde belli molem in vos convertat. Atqui hoc ipfum eft, quod fi fapitis, impedire debetis, ne ille Tranfylvaniam

vaniam occupet, & constituto ibi aliquo è Purpuratis suis Præfecto, sibi in Beglerbegatum seu Provinciam redigat. Paries illa est vobis proximus, quo ardente, quàm facilè est, ut vestri quoque Lares flammam concipiant. Successu namq; temporis, quando volent hostes, per Russiæ latè patentès campos, per Ukrainam & Podoliam, impunè illis volitare licebit: præsertim, cùm ad ostia Borysthenis, & ad Bogum flumen, nova fortalitia recenter erecta habeant, in quæ se recipiant: quæ, quòd erigi in fundo Reipub: Vestræ passi fueritis, non potest id demirari satis totus Orbis Christianus.

Neq; solùm Russia, sed minor quoque Polonia, atq; imprimis Scepusiensis ditio, in summo discrimine constituentur. Nihil enim Tyranni viciniâ pejus, nihil tetrius, nihil formidabilius. Videtè igitur, nè ista negligentia vestra, ne dicam ignavia, in summam Patriæ vestræ perniciem aliquando erumpat.

Possētis equidem tolerare adhuc ista & meliora sperare, si finis malorum esset, & non majora imminerent pericula: sed quo pacto præstolari quietem ab illa gente possumus, quæ cœcâ quâdam ra-  
bie

bie ad hauriendum sanguinem nostrum fertur? quæ occupatâ potiore parte, Hungariæ, jam quoq; in viscera nostra gladium adegit. Juvenis est adversarius noster, ætate floridâ, robusto corpore, animo vasto, tumidus cursu fortunæ, quæ hucusq; illi in singulis nimium arrisit. Vanus est, deceptus est, si quis arbitratur adolescentem quieturum esse, magna semper atque difficilia appetentem, & ad exequendum perficiendumq; ea promptum, audacem, & belli percupidum. Ponite hanc spem; non deponet ille arma, nisi aut victus, aut omnium victor extiterit. Proxima illi quæq; victoria, gradus erit alterius: sicque fiet, ut cum singulis semper gentibus pugnaturus, omnes tandem opprimat, subactisq; Occidentalibus Regnis & Provinciis, sublato quoq; ac deleta Christi Evangelio, Mahometicam Legem ubiq; gentium inferat. Ecce quietem, quam sperare potestis Poloni Nobiles! nolite confidere, nolite differre. Consulite vobis ipsis, & utilitati libertatiq; vestræ, dum tempus habetis. Quærendus aliquando, quærendus pertinaciter hostis, non semper expectandus.

Sed dicitis , quomodo bellum foris geremus, qui domi necdum benè quievimus? recuperanda sunt priùs , & è potestate Moschorum vendicanda, viq; recipienda, ea quæ superiore bello amissimus. Ita quidem , sed Moschi de ijs omnibus cupiunt vobiscum amicabilem inire transactionem, quæ si videatur vobis sine integra restitutione amissorum adeò difficilis, ut neq; ad interpositionem Sacratissimi Cæsaris, & aliorum Romani Imperij Principum, eam admittere possitis, inducias saltem icite ; certum enim est, tempore magis geri bella, quàm armis, & satiùs longè aliquam corporis partem detegere, ut alias magis injuriæ obnoxias tegas : satiùs quoque & consultiùs tranquillitatem domesticam in eum modum procurare, quàm post tot calamitates & innoxia plebis, quas jam ferè à quindecim annis assiduis bellorum procellis jactata pertulit, nova iterum intra parietes domesticos bella ex bellis ferere.

Agite ergo , & depositis cum Moschis discordijs , si non abjectis , saltèm intermissis, nos in communi hoste communibus viribus propulsando juvate. Quo facto , etiam Moschorum Imperator à nobis

nobis in societatem armorum cōfacilius  
allicietur, qui si cum valido gentis suæ  
exercitu bellum Turcis intulerit, ad re-  
cuperanda ea loca circa Tanaim & Mœ-  
otidem, quæ aliquando amisit, multum  
præfectò rebus Turcicis obesse, nobis  
verò prodesse poterit.

Et si nulla sit consilij hujus ratio, non-  
ne vos satius movere, vestrosque animos  
sollicitare debeat miserabilis aspectus  
vicinorum populorum, ut *Homoglottum*  
fratrum ac gentilium vestrorum, Slavo-  
rum, Croatarum, Moravorum, Silesio-  
rum, Bohemorum, &c. an pudorem  
vobis non excitent, tot in dies cædes,  
tot vincula, & fumantia latè incendia  
villarum, ultorem eo ipso poscentia?  
crudeles estis, si non succurritis: impij,  
si nos veluti piacula quædam hosti dila-  
cerandos finitis; verendumque est ac  
feriò expavescendum, ne tandem hæc  
inclinatione rerum *Magog sit* (juxta ser-  
monem Domini apud Ezechiel: ) *Prin-*  
*ceps capitis Mosoch*; Princeps scilicet  
(ô Dij meliora!) universæ Henetæ seu  
Slavonicæ gentis: de qua jam antè qua-  
draginta circiter populos in Asia & Eu-  
ropa sub jugum misit.

Proh ! pudeat nos fortunæ nostræ, turpe tum nobis, tum universo Sarmatico nomini turpissimum, eos (ita memala nostra dicere cogunt) Dominos ferre ac revereri, quos ante pauca sæcula, infamis ille Scythiæ vicus, vix servos perferre potuit, & qui latrocinij tantum ac rapto vivere assueti, eò creverunt hodie, ut nobis extrema quæque audeant minitari. Proinde necessario subeunda nobis est, quantalibet belli hujus contra tam immanem hostem, magnitudo, ut in tuto nos, quasi reliquæ gentis, vivere possimus : sumenda libenter & properè arma, ut præcis tandem tam diutini metus nexibus, fugatq; ex vestibulis hoste, tutiorem post hanc, feliciorémq; degamus vitam, & in perpetuum libertate fruamur.

Deniq; Christiani Principes omnes, hîc animis adeste, & si pulchrum ducitis vos vitamq; ipsam, si & Patriam fortunâsq; vestras contra Ottomanicam rabiem servare cupitis, arma capefite ; nam si aliquando, jam unâ libertas, jam servitus perpetua, jam totius rei summa versatur, jam omnia hæc in alea posita.


Agite ergo, ac tempestivè malo ob-  
viâ

viàm ite: semel aut fortiter moriendum, aut arripienda possessio tranquillioris vitæ, pariter & liberratis; si hucusque impediêre vos aliqua rerum momenta, nunc nè ignavia aut inanis pavor vos impediat, enitendum est. Nolite terreri, ne hostibus magis atq; magis audacia crescat, sed unà omnes ut par est, consilijs non tumultuosis & turbidis, sed sedatis & quietis, rem tantam capessite, vestrosq; cogitatus resolutione heroicâ confirmate.

Moveat vos commune vinculum, & impendens nobis omnibus extremum malum, ad quod avertendum audacter arma sumite, ac strenuè adversus Capitales hostes cum æterna nominis vestri gloria pugnate.

Meminisse hic oportet vos, ac potissimum Germaniæ Principes, illius famosi sed infausti vaticinij: *Germaniam Turcarum prædam futuram, corporis & scelerum mole hanc nobilissimam Europæ plagam oneratueros Mahometanos, nisi in tempore præveniantur, Coloniâq; Agrippinam, miseriarum theatrum futuram.* Quod longè superi avertant.





## MOTIVUM II.

*Ab equo & justo.*



Vandoquidem illud maxime in rebus omnibus agendis, ac præcipue in assumendis armis, torquet mortalium ingenia, & sollicitudinem exaggerat militarem, priusquam gladij cominus in hostem stringantur, scire, unde justior esset causa: operæ pretium video, ut hic omnino justam æquè ac honestam præsentis belli rationem demonstrem: quæ etsi justissima eo ipso sit, quia ad repellendam tam immanem hostium vim necessaria, tamen ut melius cunctis pateat illius æquitas, elucidandam hic paulò clariùs censeo, quò demum ipsa virtus vestra, Christiani Principes, felixq; eventus justiore ostendat.

Bellum quod pro gloria Dei, pro tuenda Religione, pro salvanda Patria gereretur, nemo unquam veterum injustum reputavit. Hinc Moyse, hinc Josue, hinc Saulis, hinc Davidis, hinc Macha-  
bro-

bæorum prælia commendantur. Hinc  
 illi Demosthenis clamores, quibus ple-  
 num exultabat apud Athenas theatrum,  
 in Marathone, in Arthemisio, in Salami-  
 na pro Patria defunctos commendantis.  
 Hinc ex Romanis Horatij, Decij, Fabij &  
 alij penè innumerabiles celebrantur, qui  
 pro salute suorum civium se devovêre.  
 Hinc & apud Germanos, Caroli, Rolandi,  
 Conradi, Ottones, Henrici, Friderici :  
 apud Bohemos VVratislai, Przemislai,  
 Caroli, Ferdinandi : apud Polonos Bo-  
 leslai, Casimiri, VVladislai, Sigismundi  
 æternis præconijs extolluntur, qui pro  
 tutandis Christianorum finibus maxima  
 quæq; aggressi sunt.

Et nobis adest honestissima simul ac  
 justissima belligerandi causa adversus  
 illum hostem, qui Deum nostrum bla-  
 sphemat, Ecclesias nostras diruit, Sacra  
 polluit, patriam pessumdat, & omne  
 Christianum nomen stirpitùs evellere,  
 satagit, nullâ prorsùs à nobis irritatus  
 injuriâ, sed rabie quâdam horribili suc-  
 census in nos fertur, quâ cuperet, si  
 nobis omnibus unicum caput esset, illud  
 uno momento perdere, sicq; omnia no-  
 stra sibi per summum scelus vendicare.

Injurias videamus, quas ille ipsâ crudelitate saviore nobis intulit, vulnera, quæ Christianæ Reipub: summa cum oppressione Orthodoxæ Fidei, inflixit, perpendamus : sic enim & injuriæ magnitudo notior, & belli præsentis justitia manifestior erit.

Atq; ut exordiar à Terra sancta, in qua primi nostræ fidei flores apparuere, Terra illa nobilis, terra lacte & melle fluens, an tota quanta sub immani hostium jugo non sterilefcit ? Heu pudor, heu dolor, fons & origo nostræ salutis Sion ad hostes defecit ! Templum illud Salomonis famâ sacræ Scripturæ clarum ac celebre, in quo Dominus toties prædicavit, Bethleem in qua natus est, Jordanem in quo baptizatus est, Thabor in quo transfiguratus, Calvariam in qua Crucifixus, ipsius Crucis possident inimici ! Sepulchrum quoq; Domini gloriosum, lectumq; illum veneratu dignissimum, in quo propter nos & vitam nostram positus erat Redemptor, impuræ manus Turcarum attrectant : loca illa sancta, loca benedicta, loca pretiosa, & Agni immaculati purpurata cruore, hostes fidei nostræ conculcant. Taceo.  
Ale-

Alexandriam, Thebas, Memphim, ac  
 omnem Ægyptum : taceo Damascum,  
 Tyrum & Sidonem : taceo Antiochiam,  
 in qua primum Christianorum nomen  
 est auditum : taceo Ephesum, & alias  
 Apostolicas Sedes in Asia perditas : ta-  
 ceo septem Ecclesias Joanni Apostolo  
 & Evangelistæ perquam familiares : &  
 quid Hierosolyma novi ac veteris testa-  
 menti Mater, an sola illa non est satis  
 deploranda ? Porro transeat omnis Asia,  
 omnisq; Affrica : Europam inspiciamus,  
 an parum hic perditum sit ? Constanti-  
 nopolis Orientalis Imperij caput, & to-  
 tius Græciæ columnen, hosti in sedem  
 Imperij cessit, capta nobilissima urbs,  
 quam Pausanias primus condidit, Con-  
 stantinus magnus instauravit, & in æmu-  
 lationem antiquæ Romæ amplificavit.  
 In ea gentis Imperator & ipse Constan-  
 tinus nomine interemptus est, capite  
 ejus in lanceam affixo, & omnibus spe-  
 ctaculo dato ; turba ingens trucidata,  
 templa DEI magni polluta, præcipuè  
 verò illud nobile opus Justiniani Sanctæ  
 Sophiæ vocatum, tetro Mahometis ritu  
 fœdatum : Beatæ Virginis Matris Do-  
 mini & aliorum Sanctorum imagines

deletæ, altaria disructa, reliquiæ Martyrum porcis objectæ, Sacerdotes occisi, matronæ & puellæ ipsæq; sacræ Virgines ad libidinem raptæ: Nobiles urbis inter vina & epulas ipsius Turcarum Principis jugulati, omnia luctu, cœde, cruore, cadaveribûsq; plena erat cernere.

Salvatoris quoq; nostri in cruce pendentis simulachrum in derisionem & contemptum præcedentibus qui clamarent: *Hic est Christianorum Deus*, in castra fuit delatum, sputo, luto atq; omni fœditate jactatum, ac postea in cœno relictum. O nefas inexpiandum! ô ignominiam Christianæ gentis! ô dedecus nostri nominis sempiternum! sed quis cladem illius urbis, *quis funera fando Explicet, aut possit lachrymis æquare dolores!* horret animus eorum meminisse.

Pari scelere oppressæ sunt & aliæ quàm plurimæ olim famâ rebûsq; potentes in Græcia urbes: nam ubi nunc Thebæ, ubi Athenæ, ubi Mycenæ, ubi Larissa, ubi Lacedæmon, ubi Corinthus, ubi alia memoranda oppida, quorum si muros quæras, nec ruinas invenies! imò aliquorum neque solum in quo jacuerunt, potest

osten-

ostendi, ut neque jam Græciam in ipsa  
Græcia videre sit.

Cladem Græciæ sequuta est jactura,  
aliorum quoq; Regnorum, ut Macedo-  
niæ, Albanæ, Bulgariæ, Cypri, Serviæ,  
Bosniæ, Dalmatiæ, Slavoniæ, (heu quàm  
magna Christianitatis portio!) Et quid  
dicam de Hungaria? Regnum olim flo-  
rentissimum, duorum Archiepiscopa-  
tuum, & quindecim Episcopatumum Basi-  
licis celebre, tôtq; Ecclesijs Collegiatis,  
& Monasterijs quàm opulentissimis cla-  
rum, jam sub crudeli jugo hostium gemit  
ferè totum, oppressâ Orthodoxa Fide,  
conculcatâ nostrâ Religione, & Christi  
nomine undique eliminato, ac dato lu-  
dibrio.

Nova sunt hæc & aliqua sub oculis no-  
stris gesta, quæ commemorare, velut  
vulnera quædam attingere tædet: si mo-  
dò oblivisci unquam pateretur animus,  
vel silentio tegendæ forent tot fidelium  
populorum calamitates, & tot crudelis-  
sima gentis scelera.

Quid ergo in tanto damno, in tanta  
injuria dicemus? an de justitia belli ad-  
versus hæc monstra hominum dubita-  
bimus, qui meram barbariem atq; tru-

culentiam Ipirant, qui sanguinem nostrum sitiunt, qui cæco furore in nos ruunt, qui cædibus saturari non possunt, qui sacra Dei nostri omnia polluant & exterminant !

Itanè impunè hosti cedit violentè acta in nos Tyrannis ? impunè tot ab eo inflicta Christianitati vulnera ? impunè tot direpta vicinarum Provinciarum oppida ? impunè tantæ hominum utriusq; sexûs cædes, agrorum devastationes, incendia ? profectò nimis obtusi cordis sumus, si hisce non movemur ; cum virulis marinis, cum Druso dormimus, Lechargum patimur, si tot tantisque malis agitati è somno surgere, & arma ad repellendam hostis sceleratissimi vim capessere nolumus. Væ nobis omnibus, væ nobis ; ut qui nati sumus videre oppressionem sociorum nostrorum, contritionem populi DEI, & exterminium sacræ Religionis ! videmus fratres nostros in manus inimicorum rapi, diversis excarnificari supplicijs, & non movemur : videmus indies Christianorum Provincias ab infidelibus invadi, & non angimur, & quasi nostrî nihil interesset, per



per summum otium omnia dissimulando  
toleramus.

Quot ecce jam Regna ab Evangelio  
sunt aliena? quot fideles populi sub jugum  
infidelium dati? quæ gens jam non hære-  
ditavit terram Domini, & non obtinuit  
spolia ejus? sive Orientem respicimus,  
sive Meridiem, sive in Arcton vertimus  
oculos, omnis Ecclesiæ composito abla-  
ta est; Ancillam videmus, quæ fuit li-  
bera & Domina gentium.

Ecce sancta nostra, & pulchritudo no-  
stra, & claritas nostra magna ex parte de-  
solata! coinquinaverunt eam fædissimæ  
ac spurcissimæ gentes. Et quomodo di-  
gnè possumus vivere, nisi cogitemus de  
tanta infamia surgere, ac pristinum recu-  
perare decorem? Nihil enim est turpius  
viro forti, nihil magis contra decorem  
nominis Christiani, quàm per ignaviam  
pati jura sua, & sacra sua à barbaris pro-  
fanisque gentibus occupari, pollui, &  
quasi compressis (ut ajunt) manibus se-  
dere, ubi jus omne in vi armisq; videas.  
Nam quid aliud Turcæ suâ illâ vi nefariâ  
intendunt, nisi ut Imperio Ottomanico,  
& uni Mahometæ legi cuncta submit-  
tant? Si potestis hoc ferre Principes ac

Populi Christiani, manete domi, nec jam de subvertenda formidabili Turcarum potentia cogitate. At, si servile jugum horretis, si contumeliam Dei tolerare nequitis, si pudet à semiviris Asiaticis opprimi, aliter vobis consulite.

Deniq;, si cor virile vobis est, cor nobile, cor altum, cor Christianum, arma plenis manibus arripite, & tam immanem vim, adversùs quam non publicis nos tantùm, sed privatis quoq; singulorum odijs armatos esse oportet, vi etiam, eaq; justissimâ repellite : ira vestra recidat in ipsa iræ instrumenta, sicq; vos dignos Christiani nominis Heroas, strenuos tum Religionis tum libertatis Zeotas, justosque tot scelerum ab impia gente patratorum Vindices demonstrate. Videtis enim, quòd non de rebus levioribus sit hoc bellum, sed est pro Patria, pro liberis, pro socijs, pro libertate, pro vita, pro fide, pro Religione, pro SS. Martyribus, pro magnis Apostolis, pro gloriosa Matre DEI Advocata nostra Regina Cœli MARIA, pro Filio DEI, pro Redemptore, pro Salvatore, pro Spiritu Sancto, pro Patre Æterno, pro divinissima Trinitate, quam impiissimus

simus ille Mahometes persequitur, committendum est prælium.

Cogitate ergo, quid Deo & Patriæ debeatis : mementote professionis vestræ, quam in Baptismate subiistis : perpendite, quantum maximè Deo tenemini, atq; ita reddite vicem pro susceptis beneficijs. Estote grati altissimo, qui vos creavit ex nihilo, nec animalia bruta aut lapides, sed homines rationales esse voluit. Et cum primi Parentis culpâ damnati essetis, ac mancipia facta dæmonum, misit Filium suum in similitudinem carnis peccati, qui morte suâ mortem vestram deleret.

Stupenda & inæstimabilis charitas, ut servum redimeret, filio suo non pepercit. Dominus J E S U S in cruce pro nobis inter latrones pependit : innocens Agnus, imò ipsa innocentia, ipsa justitia inter facinorosos deputata est. Speciosus formâ præ filijs hominum, everberatus, laceratus ab impijs, deformis apparuit. *A planta pedis usq; ad verticem, non erat in eo sanitas, nec species, neque decor.* Sic placuit Patri, qui propter peccata nostra tradidit illum ; *propitiatorem enim proposuit eum per fidem in* san-

*sanguine suo : iniquitates nostras ipse portabit, & libore ejus sanati sumus : quicum inimici essemus, reconciliati sumus DEO, per mortem filij ejus.*

O crudeles nos Christiani, ô ingrati ! ô durissimi tardissimiq; cordis ! possumusne ista audire, & non animo commoveri ? non cupere pro illo laborare, aut etiam pro illo mori, qui pro nobis mortuus est ? De honore illius agitur, qui nos de Diabolica servitute pretiosissimo sanguine suo redemit ; de Christi nomine disceptatur, de Fide orthodoxa, de Religione nostra, de sacrosancto Evangelio : adversus hæc Turcæ militant, hæc evertere ac prorsus delere omni vi conantur.

Quamvis autem his obscurari non possit Divina Majestas, nec ipsius gloria minui ; decet tamen nos servos illius, nos Christianos, ea quæ in contumeliam ejus sunt, totis conatibus avertere atq; ulcisci.

Non tulit Phinees adulterantem Zambri, sed zelo incensus Domini, Madianiticum scortum, & illum interfecit. Vidit Matathias sacrificantem idolis Hebræum, & doluit, & contremuerunt renes

renes ejus, & accensus est furor ejus,  
secundum judicium legis, & infiliens  
trucidavit eum super aram.

Ecquis igitur nostrum, nisi Deo pa-  
riter & hominibus invisus, etiam hinc  
justo indui zelo recusaret? quis non ad  
persequendum DEI inimicos animum  
erigeret? quis non arma libens sume-  
ret, & in apertum etiam rueret discri-  
men, pro Deo, & pro gloria nominis  
ejus, pro qua mori, vah! quàm dulce  
mori!

Proinde, adest nunc adest Christiani  
Principas, Deo agente, qui vos usq; in  
hæc difficillima tempora Christianæ  
Reipub: servavit, magna vobis insignis  
gloriæ materia. Adest occasio nobilis  
pro gloria DEI, ac juxta pro libertate  
Fidei, & pro tuenda patria adversus im-  
pios hostes quæq; maxima subeundi, &  
omnes tam veteres, quàm novas vestras  
vestrorumq; injurias ulciscendi, nec pri-  
vatas istas tantum, sed & publica id  
genus mala, atq; tot oppressæ, nè dicam  
multis in locis extinctæ fidei ludibria: si  
cum robore Provinciarum vestrarum,  
nondum plenè desperatis rebus adesse  
velitis. Et hoc à vobis requirit justus  
hono-


honoris Dei zelus, requirit ipsa Christiani nominis pietas, requirit & ipsa justissimi belli ratio, & quod curam Patriæ attinet, exposcunt id omnium consilia atque desideria singulorum & publica vota: maximè verò hoc à vobis efflagitant omnes Hungariæ, Croatiæ, Austriæ, Styriæ, item Bohemiæ, Moraviæ ac Silesiæ Status, armis solidè instructi, & jam non nisi communi expeditioni erectis animis intenti, nihil præter vestra signa expectantes.

Miserandam sociorum, & innoxij Christianorum sanguinis vicem considerate, neque illos victimam offerri hosti patiatur generosus vester animus. Benè postmodum ostendet omnia, an probè vel improbè facta, eventus belli justus judex.

Neq; dubitandum ullatenus de victoria: Deus enim, cujus providentiâ cuncta reguntur, & qui nemini vim inferri, nec injustè quemquam vexari patitur, & cujus causa hic præcipuè agitur, ipse hostes in conspectu nostro conteret, nobisque de cælo victoriam mittet. Dextera ejus, quæ hucusq; semper in singulis electos suos egregiè est comitata & secuta, pugna-

pugnabit miraculis, ubi nos viderit accinctos gladijs.

Atque ita nemo retorquenda miretur arma in Turcas, quæ ipsimet nobis in manus tradiderunt, quæ & ipsa æquitas & natura ad propulsandam eorum immanem vim requirit; justè enim bellat, qui bellat, ut vim sibi illatam repellat.



## MOTIVUM III.

### *Ab Vtili.*



Atet, ut arbitror, sacri hujus belli, cujus classicum cano, non tantum præ foribus urgens necessitas, verum etiam ipsa justitia & æquitatis ratio. Nunc ex eo, quæ sequatur utilitas, breviter exponendum est; cur enim se bello quisquam immisceat, nisi & bello se juvet? Nos utilitatem maximam exinde consequemur, si bello hoc præsentī cuncta illa mala, quæ cervicibus nostris imminēt, & extremam minantur perniciem, à nobis forti animo propulsabimus. Vide-  
mus



mus enim manifestè, quòd hìc una libertas, hìc servitus perpetua, hìc totius rei summa versetur; hìc patriam, imperium, fortunásque nostras, & quidquid amabile homini Christiano est, omnia ceu in alea posita videmus: quæ si integra inviolatâq; servaverimus, quantum non inde emolumenti capiemus? tum imminens à nobis Mahometis procul excutiemus jugum, tum paci tranquillitâq; perpetuæ consulemus.

Accedent opima spolia, arma, equi, vestes, argentum, aurum, servi & alia hujusmodi, quæ præsens expeditio repromittit, & quæ honestissimi hujus belli victores adipiscemini, sunt enim & hæc more gentium expetenda: nequæ meliora quæsière olim Romani majoresque nostri Sarmatæ ac Germani beligerantes.

Nunc ergo reintegrandi ampliandâq; fortunas nostras spes & occasio adest, ut qui hucusq; domesticis seditionibus bellisq; civilibus Penates nostros ad summum exhausimus, jam denuò illos justissimis barbarorum spolijs, & opulentissimâ gentibus Orientis detractâ prædâ ditare possumus. Præsertim vobis

vobis Germani, quibus Imperij dignitas credita est, pulcherrima jam servit occasio pomœria Imperij vestri Orientem versùs dilatandi, ac de potestate hostium vindicandi tot populosissimas urbes, tot felices Terras, tot nobilissima Regna. Quod à vobis exigit, tum Imperij dignitas, tum virtus vestra, tum quoq; exemplum Majorum vestrorum, quibus nil magis gloriosum fuit, nilque magis in ardentibus desiderijs, quàm ut Imperij sui fines longè latèq; extendere possent: & quod in votis habuerunt, hoc & actu cum æterna amplissimi nominis sui gloria præstiterunt.

Antiquæ Germaniæ fines, ut Veteres tradunt, ab Oriente Vistula, vel potius secundùm quosdam, Odera fluvius, Sarmatici seu Sudeti montes, qui Bohemiam à plaga Septentrionali cingunt, & Pannoniæ superioris limes fuère: ab Occidente Rhenus: à Meridie Danubius: ab Aquilone mare Balthicum & Oceanus. At successu temporis quantum extra hos terminos se protendit? tracto enim Rheno, Germani veteres, omnem illam regionem, quam olim Hædui, Sequani, Mediomatrici, Treviri, Van-

Vangiones, Menapij, Belgæ incolebant, suæ potestatis fecerunt ; Danubio quoque superato Rhetiam, Vindelicam, Noricum, superiorem Pannoniam & partem Illyrij : fines item Helvetiorum, ejectis inde Gallis, occupârunt. Nec Sarmatis, eorûmq; vicinis Boijs & Osires integra mansit, sed Boijs totaliter ejectis, Osires verò & Sarmatis ad Carpathi juga usque depulsis, totum illum nobilissimarum terrarum tractum, quo jam continentur Bohemia, Silesia, Moravia, & pars cis-Danubianæ Austriæ & Hungariæ, imperio suo adjunxerunt, & quò magis ijs noviter adjectis finibus tuti essent, adversùs Osios ferocissimam tunc de Pannonibus gentem, & Sarmatas, fortissimos quosq; è medio sui proutuendis ijsdem finibus selegerunt, quos Marcòmannos, id est limitaneos nominârunt ; & hi eam portionem terræ obtinebant, quæ antea Osiorum fuerat.

Longum esset hîc referre alia Germanorum verè gloriosa in dilatandis Imperij sui finibus gesta, quemadmodum & illas, quas aliquando Romanæ Reipublicæ intulerunt clades & molestias : qui etsi demum annis subsequētib; Romanorum

norum fortunæ primò, deinde Hunnorum, ac tandem Henetorum ferociæ cedere coacti fuerint : postea tamen & ipsi de Romanis, de Hunnis, atq; etiam de Henetis, deq; alijs diversis gentibus, sæpenumero triumphârunt, in eamq; gloriam denuò redierunt, ut ex omnibus totius Europæ gentibus, soli illi Majestate Imperiali digni efficerentur.

Et vos igitur magni, vos inclyti Germani, vos genuina tantorum Heroum soboles, pares animos non tantum in conservanda, sed quoq; dilatanda ac propaganda Imperij excellentia assumite. Mementote Majorum vestrorum, qui ecce omnes vicinos, ac longè positos populos, armorû gloriâ superârunt, qui timentes nullos, omnibus terrori fuerunt; qui etiam, ut dixi, speciali quâdam prærogativâ, præ alijs cunctis gentibus Imperium hæreditârunt, quorum intuentes æterni nominis gloriam, imitemini & acta : præsertim cùm omnibus his rebus abunderis, quæ necessitas belli requirit, vobis enim sunt fortissimi milites, peritissimi Duces, vobis arma in copia, vobis nervus belli sufficiens pecunia, ut dicere ausim, nullam nationem tam grandem

ac potentem esse sub cœlo, quæ posset meliùs uti suis viribus ad propulsandum communem hostem, & vindicandam ex servitute in libertatem Græciam, sibi quæ vendicandam, sicut estis vos : modò sedatis intestinis motibus, junctisq; signis & manibus, id tam nobile facinus aggreddiamini, toti futuræ posteritati cum admiratione memorandum.

Fatalis enim est Germania Imperio Ottomannico, si composita domi, arma & robur adversùs illud convertat, nîlq; magis reformidant Turcæ, quàm concordēs Germaniæ populos, habere hostes ; ut idcirco Muphtis, qui est summus superstitionis Mahometanæ Antistes, cùm nuper in Divano, seu publico consilio, de summa præsentis belli deliberaretur, censuerit à bello Hungarico abstinendum, neque irritandum Romanum Cæsarem, ne bellicosissimi Germaniæ populi, in societatem armorum asciti, rem Turcicam in Hungaria & vicinis Provincijs cogant in apertum discrimen. Pacem potiùs cum Cæsare servandam, cùm amicitiam colere & imperata facere non abnuat, temerarium sanè, & præter omnem maturi consilij ratio.

rationem videri, quæ sitis ultrò belli caussis, eos laceffere, à quibus habeas, quod timeas. Et si autem in hanc illius sententiam itum non fuerit, prævalente apud Mahometem supremo Purpuratorum Principe, Hungarici belli cupidine supra modum accenso : patet tamen Germanos vel maximè Turcis esse formidini.

Agite ergo Germani, viri fortes, ipsaque virtute majores, patrias recolligite cum selectissimo robore vires, generosos assumite Spiritus, audaces excitate animorum motus, & quod in vobis exhorrescunt barbari, manu forti id ipsum ostendite, idq; eo impetu, quem justissima ira excutere potest, in scelerata capita eorum actu egerite.

Invitant vos ecce ipsimet hostes, qui nullius magis quàm vestra expavescunt arma : invitat & pulcherrima occasio, non tantum recuperandi amissa, sed ulciscendi quoq; omnia nova & vetera in nos aliquando acta hostium delicta. Accedit : cum Romani Imperij hæredes sitis, æquum & justum est, ut Romaniam quoq; cum amplissima Sede Constantinopoli, à potestate hostium vindicetis, suiq; juris faciatis.

Qua in re utinam quoq; Poloni hanc oblatam ultrò à Deo immortali occasionem arriperent, & spe recuperandæ Moldaviæ, Valachix, & Bessarabiæ, quas Provincias in clientela Regum ipsorum fuisse aliquando constat, nobiscum arma conjungerent, debellari possent penitùs (palam id omnes affirmant) expelliq; Turcæ, & à tam diuturna Orientalium in Europa partium possessione deturbari. Facilis enim ductu est terrestribus Polonorum copijs via in Thraciam, cùm nulla obstacula, nullæ arces, nulla montium juga sint obvia, ita ut trajecto in Valachix finibus Istro, per apertos & planos Bulgariæ campos, ad usque Imperij Sedem Constantinopolim, irrumpere, ac ferro & igne terrorem incutere possent. Quod facerent & Russi, quorum maritima arma singulis ferè annis omnia Euxini maris infestant littora, intercipiunt navigia, urbes diripiunt, eò sæpiùs deductâ re, ut dum vicina Constantinopoleos oppida, eorum gemunt cœdibus, & collucent incendijs, ille tam formidandus toti Orbi Tyrannus, à consternata urbe hostiles ignes impunè aspicere cogatur.



Et quamvis ad reprimendas has excursions novum quoddam fortalitium ad Tyram fluvium ante biennium extrui jussit, jamq; opus cœptum fuerit, destinatis ad hoc septem millibus partim operariorum, partim armatorum, qui operarios si quæ ingrueret vis, tuerentur: perfici tamen non potuit, propter Kosacos, quorum valida manus collecta sub Duce Syrko, novos istos Colonos ingenti ausu aggressa fuit, fudit, fugavit, molémq; erectam disjecit; ac solo æquavit. Quod utinam & ad ostia Borysthenis Bogúm; fecissent.

Quis igitur non possit incuti Turcis terror, & quæ utilitas inde non sperari, si ab Occidente Germania, à Septentrione Sarmatia, tot fortissimi ac potentissimi populi coadunatis viribus adversus illos consurgerent? neq; deessent occasione suæ Veneti & Melitenses: hi, ut Rhodum, illi Cyprû & alia vi sibi quondam erepta recuperarent: sicq; necesse foret & à Meridie, cogi in summum discrimen res Turcarum, ut Mahometi etiam in amplissima Sede Byzantina angustum esset. Si enim Parens hujus Ibrahim, audito VVladislai IV. Polonorum

Regis contra se bellico apparatu, trépîdârit, ac de transferenda ocysus in Asiam Regiâ Sede seriò cum suis purpuratis se-cretiora agitârit consilia : quæ etiam ad effectum deduxisset, nisi piæ intentioni optimi juxta ac bellicosissimi Regis, qui medius inter arma Christianitatis mori constituerat, Polona tunc contradixisset Nobilitas : quid non faciet iste, si à tribus partibus, à tot potentissimis gentibus, à robore totius Christianitatis se premi viderit ? in tutiora Asiæ convasatis malè partis thesauris secedere cogetur, Europæ Regna vobis Christiani Principes in prædam, aut malim dicere in possessionem relicturus. Ita impius Tyrannus, dum spolijs nostris inhiat, spoliū ipse erit, & nobis latum præbebit malè apud se conceptæ victoriæ documentum : augebit, ampliabit rem Imperiūque nostrum, dum vel maximè absorbere cupit. Proinde emolumentum quàm magnum, quàm & ingentis nominis gloriam afferre vobis potest præsens hoc, si illud junctis viribus contra communem hostem suscipiatis, sacrum bellum : nisi planè fortuna immitis, vel immotus fatorum ordo, vel supplicio quidem propior apud

Supe-

Superos sordium Christianorum indignitas aliquem obicem iniiceret, ad ea omnia impedienda, turbandâque, & ad postremam fortasse cladem nomini Christiano infligendam. Quod tamen avertat DEUS.


Porro, si alicui vestrûm perfectioris spiritûs, videatur pusilli esse animi lucris tantûm inhiare terrenis, ac temporaneæ vani nominis gloriæ; si mens generosa altiora affectet præmia, & cœlestes aspiraret in thesauros: & talia cum uberrimo fœnore vobis sacra ista expeditio repromittit. Et ut id citò explicem, Regni cœlestis possessio Christi; hæreditas vobis offertur, & quidem non solum vincentibus, verum etiam fortiter occumbentibus. Nam si omnibus, ut inquit Orator, qui Patriam juverint, auxerint, defenderint, sit in cœlo definitus locus, in quo beati ævo sempiterno fruantur: veriùs & certiùs hoc illis promittitur, qui honorem Dei, qui Religionem Christianam, qui Orthodoxam fidem tuebuntur, & adversus impiam gentem, invictis animis bellum gerent.

O igitur nobile bellum! ô felix præmium! ô expectabilem pugnam! ex qua

five vincimus, five vincimur, hæredes  
 vitæ æternæ evadimus. Majoribus no-  
 stris, cum essent adhuc gentiles, nullum  
 fuit grave bellum, quod pro patria su-  
 scipissent: nullam illi mortem miseram  
 putavêre, quæ pro Republica subiretur.  
 Sed quæ Respublica major, melior, aut  
 præstantior, quàm nostra Christiana!  
 quæ Patria dulcior aut nobilior, quàm  
 nostra illa cœlestis, ad quam cuncti  
 aspiramus, formosa Hierusalem! illi  
 cum pro Patria morerentur, tamen ma-  
 ximè exulabant: nos cum morimur,  
 tum finimus exilium, tum Patriam in-  
 gredimur. Festinemus igitur ad hoc  
 bellum, in quo morientes, veram inve-  
 niemus vitam: nam hæc, quam vivi-  
 mus vita, non verè vita est, sed potius  
 mors, aut si quid aliud, non nisi labor  
 & dolor. Et esto Nestoreos quis vivat  
 annos, aut Mathusalem impleat ætatem,  
 quid illi tandem, postquam cursus per-  
 actus est? breve est, quidquid finitur,  
 & vanitas supra vanitatem in his spem  
 ponere, quæ prætereunt. Alia igitur  
 quærenda est vita, quæ nos immortales  
 æternúmque felices reddat: ad quam etsi  
 sint multæ viæ, hoc tamen tempore,  
 nul-

nullum iter certius, nullum securius,  
 nullum expeditius, nullum gloriosius  
 est, quàm si contra hostes fidei arma-  
 sumentes, puris & constantibus animis  
 bellum geramus. Hæc gloria, hæc im-  
 mortalis vita, ac penes ineffabilia gau-  
 dia præmiâque æterna eos manent, qui  
 egregiè ac strenuè, pro Deo, pro Reli-  
 gione, proq; cœlesti patria dimicando  
 ceciderint. Ad perpetuam felicitatem,  
 & incessabilem tranquillitatem cuncti  
 transmigrabunt: ubi æterni Regis aspe-  
 ctu, laurea Martyrij decorati, perpetuo  
 ac sempiterno ævo perfruentur: Hi quæ  
 cœleste melos, quàm suavissimos con-  
 centus & hymnos, inter Choros Ange-  
 lorum immortalitatis decore vestiti glo-  
 riosè referent, hostesque suos impiissi-  
 mos, in æternæ calamitatis abyssu dila-  
 niatos & extortos contemplabuntur.

O felix mors, quæ vitam perimit tem-  
 poralem, concedit æternam! ô faustum  
 ac desiderabile bellum, in quo si vincis  
 in terra, si verò vinceris, in cœlo  
 triumphas!



## MOTIVUM IV.

## A Facili.



Mnis Senatus, omnisq; populus, cui de bello gerendo consultatio est, ista diligenter ac rigide, & pressè discutere debet, ne quid agat, cujus deinde pœnitudo sequatur: turpe est enim, ut Scipionis proverbium fuit, postquàm erratum est, dicere: *Non putàram.* Bellum ergò gesturus, primò quærat, an justum sit ac necessarium? deinde an utile? tandem an facile? nisi enim hæc omnia concurrant, non est cur providis atque prudentibus viris belligerandum sit. Ego monstravi jam sacri hujus belli non justitiam tantum, verum etiam necessitatem; explicui quoque & ostendi ejus utilitatem. Nunc, quod est ultimum, de facilitate gerendi belli pauca subnectam: frustra enim justum bellum, frustra necessarium, frustra utile ac commodosum probaverim, nisi etiam factu facile demonstrarem. In quo illud vel  
maxi-

maximè animadvertendum est, nè major hostibus quàm nobis sit scientia rei militaris, nè frequentior usus, nè pecunia copiosior, nè potentia superior, nè Deus ipse faventior: quinimò, neque si pares utrinq; vires fuerint, bellum suasserim. Nam teste Octaviano Cæsare, qui prælium sine certa prærogativa committit, similis est ei, qui hamo piscatur aureo: facilè namq; plus amittere, quàm lucrari potest.

At mihi, seu vestram Germani virtutem mente perpendam, seu vestros Itali ac Poloni audacissimos Martémq; ipsum spirantes vultus considerem, multò vos præ cunctis Ottomanici Imperij gentibus bello aptiores, multò expeditiores, peritiores, audentiorésq; video. Vobis enim homines, vobis equi, vobis arma, vobis pecuniæ abundè suppetunt: & ubi obsecro tot clarissimi Principes? tot generosi Proceres, tot fortissimi equites, tot potentes civitates, tot divitiæ, tót auri, tot argenti, tot ferri mineræ? ubi tanta hominum multitudo, tanta Juventus, tantum animi, tantúmque roboris? non est profectò ulla manus Turcica, etiam si totum robur Græciæ & Asiæ



unà sumatur, tam valida ac potens, quæ fortitudini vestræ æquiparari possit. Nostis, quanti faciat Asianos Romulus ille Virgilianus, cujus sunt ad eos verba: *Sinite arma viris, & cedite ferro.* quasi non essent armis tractandis digni, neq; ad pugnandum habiles, ac idonei.

Unde non sine causa Veteres Asiana bella muliebria putaverunt. Alexander magni Alexandri propinquus, cum bellum gereret in Italia, *Frater meus*, inquit, *in Asia cum fœminis pugnat, mihi verò cum viris certamen est.* Julius Cæsar cum de Ponticis gentibus triumpharet, quæ Asiam incolunt, in curru suo hæc verba jussit scribi: *Veni, vidi, vici*; ac si solo aspectu superatos dicere Asianos. Godefridus ille quoq; Bullioneus, & alij, qui secum in Asia militârunt, parvâ sæpè manu ingentes Turcarum exercitus deleverunt. Similiter Græci, illustres quondam animæ, nequaquam vigorem antiquum retinent: degeneraverunt ferè omnes, qui Turcis parent, neq; amplius in armis pristinum referunt spiritum: ceciderunt omnia cum Imperio; neq; mirum, non possunt enim simul stare fortia pectora & servitus.

Quod

Quó igitur merito, aut quo titulo vos Viros fortissimos simul ac bellicosissimos, Asiatici illi molles, & Græci eorum similes, antecellere possent, qui nec dignè conferri valent? vos nati ad arma, illi vix extracti: vos armis solidè instructi, illorum pleriq; inermes: vos lorice thoracésq; protegunt, illos culcitra tegit: vos balistas tenditis, illi arcus trahunt: vos equos regitis, illi ab equis reguntur. Vos deniq; non tantum nati, sed nutriti quoq; in armis, illi copias suas, exceptis Janiczaris, Afappijs, & Spaholanis, quos expeditissimos habent, & quorum summa vix aliquando quadraginta millia excedit, ex agris petunt. Vobis (ut loquar cum Romulo suprà dicto) *Flectere ludus equos, & tendere spicula cornu*: vos omne ævum ferro teritis: vestra juvenus torneamentis intenta est, aut quatit oppida bello: nec tarda senectus vestras vires debilitat, mutatq; vigorem: caniciem galeâ premitis, sempérq; recentes bellorum habere causas cupitis, & vivere in armis. Illis picta croco, & fulgenti murice vestis, desidiæq; cordi sunt: inexperti, timidi, ac plerumq; inviti coactique contra vos bellandi necessitatem

omnem subeunt. Invitus verò atq; timidus animus, quid magni gerere possit, dicat quisq; strenuus miles.

Sed arbitratur fortasse aliquis meliores & ad bellandum aptiores hodie Turcas esse, devictâ potiore parte Regni Hungariæ, unâ cum adjacentibus Regnis & Provincijs, quàm olim fuerint. At quales sint in conflictibus & prælijs adversus nostros, unus nobis exemplo sat est, Nicolaus Zrinius Comes, Banus seu Præfectus Croatiae, strenuus & armis & consilio vir, ac multis nostrâ ætate contra Barbaros gestis bellorum titulis insignis, qui sæpè cum parva manu, ingentes Turcarum exercitus fudit & prostravit, ac sæpius Victor cum paucis evasit, quàm cum pluribus alij excessere: tantòq; Turcis defacto terrori est, ut fulgentium armorum illius conspectum, nunquam rectâ acie perferre possint: fugâ sibi salutem quærunt, mox ubi de illo cum turmis adventante famâ percipiunt. Unde vix aliquid unquam à se justo prælio partum gloriari possunt, dolis tantùm & insidijs, aut ubi nulla vel exigua nimis obstitit vis, prout modò in Hungaria triumphant, sicque magna adipiscuntur Imperia,

ria, majora in dies adepturi, nî citò à vestro robore contraponatur eorum temeritati obex. Nam omnia sibi licere statuit hostium ferox audacia, quando semel rerum secundarum incremento declinitus est animus. Sed si vos, Christiani principes, unà conjunctos esse viderint, arma vestra profectò formidabunt, vires perhorrescent : vel si instare maluerint, omninò victi confusiq; abibunt. Cum his ergò vobis pugnandum est, qui non nisi fugientes vincunt, cum his qui neq; ferire, neq; feriri nisi in terga sciunt.

Et si autem contemnendus hostis non sit unquam, ne fortasse nimîa hostis contemnendi licentiâ langueant militum vires, evanescant animi, & ingenia ab ea belli cura laxentur avertanturq; : quippe cùm sæpè contemptus hostis ancipitem fecerit victoriam, & cruentum ediderit certamen ; unde non sine gravi causa, ita cum fiducia sui, ut sine contemptu alterius sit, gerenda esse bella, præceptum primum antiquæ militiæ conditores statuerunt : tamen quis non contemneret illud perditissimum hominum genus, quos & antehac ferociter æquè ac feliciter Majores nostri con-

tempsère ? aut quis non detestetur pariterq; abominetur eam vilissimam gentem, quæ omnis est ex servorum colluvie collecta, furtis & latrocinijis potius, quàm veris assueta prælijs.

Sed multitudine nos superant Turcæ : esto. nonne pauciores Christiani persæpè maximam belli laudem ex hoste numerosissimo tulerunt ? indignatur eo modo vincere præclarus miles, ubi nec singulorum virtus spectari, nec privatæ multum laudis domum afferri potest. Quid præterea momenti in majoribus eorum copijs ! quibus sicut diversa lingua, & alius armorum usus, ita nec idem habitus animorum : confectus est enim eorum exercitus ex multarum gentium colluvione, Asiatici diversarum partium, Græci, Epirotæ, Illyrici, Hungari, Tartari, Valachi, Transylvani ; ibi vario ritu eadem ignari signa sequuntur : neq; adhuc gravioris armaturæ usum bene didicere : rarò loricas, rariores thoraces induunt, nec galeas more nostro lucentes ostendunt : rarò teguntur corpora ferro : acinace tantum pleriq; utuntur & arcu : parmâ se protegent, & galeris pilosâ quâdam materiâ durâq; contextis.

tis. Quòd si in vestras Germani inciderint acies, rigentes chalybe, in cataphractus equos, in rhomphæas, in tormenta & horribili sonitu mugientes ballistas, intelligent cum mulieribus se hæcenus pugnâsse, nunc cum viris esse certandum.

Non est ergo quòd multitudinem Turcarum admiremini aut formidetis, neq; idcirco insuperabiles putetis: nam plus nominis semper, quàm virium ad bellum afferre solent; potior quoq; eorum pars est inerimis, ignava & deses. Cùm res ad conflictum venerit, primi cadent & medij, ultimorum vix aliqua pars ad suos tutum receptum habebit. Primus barbarorum impetus acer ac repentinus est, post quem citò mollescunt, & enervati in fugam conertuntur.

Quare agite, & audaci manu, ad fugam quàm ad pugnam paratiores impellite, dissipate, & renovate hoc præsentì bello tot contra barbaros victoriarum à Majoribus vestris quondam obtentarum speciosam memoriam: neque, ut iterum dicam, eo usq; expavescenda est eorum multitudo, ut dum nimis multum defertur illis, proprij decoris obliviscatur animus. Nam quò numerosior hostis, eò  
spe-

speciosior laus vestra, eò quoq; graviores  
spolijs hostilibus domum reversuri.

De fortuna nihil est, quod timeatis  
vel dubitetis, Viri fortissimi, hanc enim  
incitabit Virtus vestra, & virtutem adju-  
vabit illa, & quod maximè in hoc genere  
rerum gerendarum desideratur, consilia,  
conatúsque vestros celeritate æquabit :  
quamvis pudeat aliquam fortunam fa-  
teri, quam non in manu atq; ense posi-  
tam habeatis. Dij namq; ibi esse con-  
sueverunt, ubi ipsa quoq; stat æquitas.  
Vestrum est igitur, ut conceptam om-  
nium spem de virtute vestra factis æ-  
quetis : nihil enim debet fortem virum  
tardare, per aquam (ut ajunt) per ignem,  
per invia quæq; permeabile iter habere  
consuevit virtus.

Sed timet adhuc forsan quispiam ve-  
strum, & in ancipiti sententia nutat ani-  
mus, non unum, neq; debilem adversus  
nos Mahometem exercitum missurum,  
sed & plures & validissimos : vel ipsum  
foran venturum, ad continuandum in  
Hungaria victoriarum cursum, siquidem  
in Oriente pacata habet omnia, ipsiq;  
Persæ ne hiscere ipsi audent, ab una  
parte magni Mogor amici Turcæ clausi.

Impe-



Imperio, ab altera ipsius Turcæ ditionibus, & fortissimis limitaneorum copijs.

Fateor ista quidem alia tamen præfagit animus : quamvis non deberem spondere quippiam incertis animis, cùm futura in occulto sint, & omnis lateat eventus. Nihilominus, quod ad humanum ingenium & consilium attinet, promptum vobis rerum omnium remedium ostendam : quippe cùm nihil tam difficile sit, quod non hominis consilio expediri possit. Ingeniosa est ad suam tutelam natura, & quicquid justè geritur, felices sortiri solet eventus. Sed quid hoc pacto difficultatem augeo ? adsit Tyrannus cum sua tota prætoriana cohorte : adsit & Asiaticus & Europæus equitatus : adsint Bassæ & Beglerbei cum omnibus suis Spahis, Ulufagis, Carpicijs & Isaaris : adsit deniq; Asia tota, & omnis illa quæ Turcico paret Imperio latè patens Europæa ditio. Vos autem Germani, Itali ac Poloni, decimum tantum seligite virum, & contrà emittite, quem incutietis hostibus terrorem, experiemini ovantes ; Neq; erit, quod de victoria dubitetis ; virtus enim vestra spectanda magis quàm hostium uume-

rus :

rus : neq; consistit in multitudine exercitûs victoria belli, sed in virtute pugnantium. Et quàm validi sint ad pugnam Asiatici, quàm fortes Græci, ostendi suprà satis. Non putet Mahometes in his Provincijs esse Græcos, Tryballos aut Myfos, quos magis etiam quàm homines decet, fati sui ignaros, bonâ fide sibi traditos, aut internecioni dederunt, aut luminibus privatos, cæterisque membris mutilatos deformârunt, pessimi progenitores ejus. Neq; existimet hîc bellum geri, prout cum Hungaris & Transylvanis : fortiùs desudandum illi est, si prævalere, si victoriâ frui, si & sua salva habere velit. Movenda itaq; impigrè signa, & induendi ubiq; vincentium animi adversùs impium hostem, qui præ foribus & in limine adest, qui festinat, & ad nos opprimendos totis viribus accelerat : neq; ulterius toleranda est in Europa hæc pestis, hæc dira contagio, cui nisi celerius occurramus, totam inficiet profectò atque contaminabit.

Et hujus sacræ dudúm; optatæ expeditionis sit tantùm initium, non pugnabitis vos soli Textones, Itali & Poloni;  
sed

sed exemplo vestro ducti, multi ex alijs  
 Regnis & Provincijs concurrent ; nec  
 Sueci deerunt, neq; Dani fortissimæ gen-  
 tes. Transylvani, Valachi, Moldavi, Ra-  
 sciani, Bulgari, Bosnenses, Epirotæ & Il-  
 lyrici sumptâ occasione consurgent.  
 Moschi quoq; initâ vobiscum Poloni pa-  
 ce, dabunt manus : neq; deerit sibi Asia  
 ad excutiendum Tyranni jugum. Hi-  
 beri, qui & Georgiani vocantur, Arme-  
 niq; Christum colunt, nec cunctabuntur  
 arma sumere, si vos viderint audentes.  
 Deniq; & Persæ, quamvis pacem cum  
 Turcis habeant, erunt occasione suæ in-  
 tenti, si quo modo clades sibi non ita  
 pridem illatas ulcisci, & Babyloniam ur-  
 bem famosissimam recuperare possent.  
 Coacti inierunt pacem : at, quod homi-  
 nes inviti ac necessariò faciunt, durable  
 non est. Neq; magnus Mogor est tantus  
 Turcarum amicus, ut crescenti eorum  
 potentia non invidet. Vos tantum con-  
 surgite, bellumq; præsens capeffite, mo-  
 tu vestro excietur ad arma Oriens totus.

Estendum quoq; est indubitanter il-  
 lud, atq; pro certo habendum, Ottoman-  
 nicum Imperium, quod vi, insidijs & pes-  
 simis artibus exortum atque auctum est,  
 & di-

& divinis humanisq; obrutum sceleribus, citò casurum esse, periturumq;. Malè enim parta, malè dilabuntur, & imperia nemo diu violenta tenet.

Porro etsi Mahometes ipsemet cum tota exercituum suorum mole, & cum universis Tartarorum hordis expeditionem adversùs nos susciperet, non tamen desperandum nobis, cùm fortitudo nostra sit Dominus, qui nequaquam deerit causæ suæ. An non scriptum est : *In Deo faciemus virtutem*, & ipse ad nihilum deducet inimicos nostros ? Tam facilè est Deo nostro in paucis vincere, quàm in multis. Madianitarum plenissima & munitissima castra cum trecentis viris dissipavit Gedeon. Ammonitarum numerosissimum exercitù cum paucis militibus; superavit Jephthe. Superbissimos Philistæos, solus humiliavit Samson. Nec in manu fœminæ, quando Deus voluit, victoria defuit. Potentes in armis Cananæos exterminavit Debora : Sisaram interfecit Jahel : & Holofernem obtruncavit Judith. Multa sunt hujusmodi in veteri Lege : sed nec nova carent magnificis exemplis. Constantino magno pugnam timenti, signum Crucis in cælo

coelo monstratum est, & vox divinitus  
 audita, quæ diceret : *In hoc Constantine  
 vinces.* De Theodosio pijsimo Impe-  
 ratore extat illud : *O nimium dilecte Deo,  
 cui militat aether, Et conjurati veniunt  
 ad classica venti.* In Britannia, quæ nunc  
 Anglia nuncupatur, ut author est Beda,  
 barbarorum ingentes copias pauci ad-  
 modum Christiani, & inermes, altâ vo-  
 ce canentes, *Halleluja*, deleverunt. Et  
 ante quadringentos viginti duos annos,  
 cum Tartarorum ducenta millia in Sile-  
 siam irruissent, ac devicto occisq; Hen-  
 rico II. Silesiæ Principe, Moraviam ple-  
 nis agminibus locustarum instar invo-  
 lassent, Olomuciúmque acri coronâ cinxis-  
 sent, Jaroslaus à Sternberg, eximiae virtu-  
 tis, & antiquæ in Bohemia Nobilitatis  
 Heros, Urbis Præfectus à Venceslao  
 Ottacaro Bohemorum Rege destinatus,  
 factâ in barbaros nocte quâdam erupti-  
 one, tantum cum octo millibus Bohemo-  
 rum & Moravorum, omnes illas copias,  
 totamque tantæ multitudinis molem dis-  
 jecit, fudit, fugavitque, Petâ Duce eorum  
 coeso, cui ipsemet dextram in ictum fra-  
 mæ libratam uno impetu amputavit,  
 sicque brachio mutilum, & mox à vulnere  
 mor-

mortuum ad Tartara misit. In Hungaria quoq; Patrum nostrorū memoria, quā sēpē exigua Christianorum manus numerosissimos prostravit hostium exercitus. Non est abbreviata manus Domini : & quamvis elongata sit à nobis misericordia sua propter peccata nostra, propitius est tamen Dominus Deus noster, & multus ad ignoscendum ; si redierimus ad eum, & ipse redibit ad nos. Facile per obedientiam placabimus, quem per contumaciam irritavimus : qui ut primū nos viderit humiliato corde, mox odium in nos conceptum vertet in hostes, & nobis victoriam dabit.

Bono ergo estote animo Christiani omnes, & confortati in Domino, accingamini & sumite arma, audacesq; contra impios hostes ite. Cū enim vobis solidæ vires sint, cū & Deum in causa sua propitiū sperare par sit, non est cur tam nobile bellum pro Deo, pro Religione, pro Patria gerendum detrectare, aut de victoria dubitare debeatis.

Agite igitur, pristinam excitate virtutem, generosos recolligite animos, omnium rerum respectum, præterquā victoriæ, vobis abscondentes. Denique  
(ut


( ut cuncta uno verbo absolvam ) morte solâ vinci destinate. Si viceritis, hostémque è finibus suis ejeceritis, omnia imposterum facilia futura vobis credite: fortiter victis & occumbentibus, idem erit malorum & miseriarum finis.

Te autem D E U S Opt: Maxime, Conditor & Stator Imperij Romani, supplex veneror, precórq; , ut sis propitius. Miserere plebis tuæ, & nè des hæreditatem tuam in perditionem, quam propè instare videmus. Surrexerunt enim iniqui & impij adversus nos: venerunt gentes in hæreditatem tuam, polluerunt templum sanctum tuum, posuerunt Hierusalem in pomorum custodiam.

Et nos quamvis ad tuendum honorem nominis tui aspiremus, nihil tamen possumus, nisi ades, & præsidium affers: nihil sine te valet humana fragilitas: tua est potestas, tuum imperium, tua omnis virtus. Idem est tibi velle, quod posse. Adjuva nos ergo in te uno sperantes, & te solum Deum purâ mente colentes: fac nobiscum signum in bonum, & mitte nobis auxilium de loco sancto tuo. Scimus enim, quia non dees tû Domine, Deus, opem tuam suppliciter implorantibus:



tibus : sed nos ipsi desumus nobis. Frigent pectora nostra,ingere calorem,ingere flammæ, ure corda & renes nostros, ut tuo igne succensi, quæ tibi sunt placita faciamus, ac sædam & peccatricem Turcarum gentem (si tua voluntas est) de nostris finibus eijciamus. Adjuva nos Deus salutaris noster, & propter gloriam nominis tui Domine, libera nos, & propitius esto peccatis nostris; propter nomen tuum. Da felicem cursum cœptis nostris : da robur, fer auxilium. Ultio sanguinis fervorum tuorum, qui effusus est ab impijs, introeat in conspectu tuo. Audi gemitus compeditorum, & redde inimicis nostris septuplum in sinu eorum improperium, quod exprobraverunt tibi. Respice super populum tuum benignis oculis. Da victoriam de tuis hostibus, ut tandem ijs repressis, dignas tibi cantemus laudes, tibiq; perpetuò serviamus, & omnis terra te adoret, & nomini tuo psallat  
in secula seculorum,  
Amen.



**M. Thomas Joannes Pessina**  
de Czechorod,

Lectori Salutem & Pacem.



Occasione hâc, quâ horatatu amicorum, Vcalegontem nobis proximum Hungariam flammâ Belli Turcici ardentem, secundò typis produco, insinuare placuit, me nuperâ Moraviæ à Tartaris & Turcis illatâ clade excitatum, ad aliud opus conscribendum, sub Titulo : Mars cruentus Moraviæ : quo continebitur descripta, non tantùm recens illa funestissima tripliciq; incursione barbarorum iterata clades, sed & aliæ, quas unquam Moravia à Marte hostili inflatas tulit, tum sub Morava gente, mille ducentorum annorum

spatio, tum antea, sub Marcomanis,  
& Osis primis eius Terræ incolis.

Quia verò opus istud requirit su-  
stum Volumen, & primò in recen-  
sendis cladibus sub Svatobogio Re-  
gum Moraviæ ultimo, progredi inci-  
pio, prævideo me in prosecutione ejus  
totâ hâc æstate habiturum ad agen-  
dum satis. Interea, amice Lector,  
Synopsis rei, seu Methodum futurî  
operis brevibus hîc suggero, teq; in  
Statu Gratiæ manere perpetuum cu-  
pio. Vale. Litomislj 10. Maij.  
Anno 1664.



**MARS CRVEN-**  
**TUS MORAVIÆ,**

*Sive*

**SERIES PLAGARUM**  
tam veterum quàm recentium  
**Moraviæ**

*ab*

**hostili Marte inflictarum.**



## LIBER I.

**M**oravia, antiquis Marcomania dicta, Regnum aliquando fuit, cum terrarum amplitudine, tum populorum multitudine, opibusq; florentissimum: cuius Reges prisci dignitatem, & à Majoribus acceptam libertatem, longo sanè tempore summa cum laude tenuerunt. Tandem, cum post cladem Svatobogij Regum ultimi Regnum esse desisset, & primo cuiq; occupanti in prædam concessa, partim ab Hungaris, partim à Germanis sub Carolo Magno in Pannoniam superiorem inductis, partim à Bohemis & Polonis discerpta fuisset, portio illa, quam Bohemix Principes in sua iura coegerunt, in præfecturam seu Marchionatum redacta est; & ex eo tempore non alios, quàm Bohemix Principes Dominos agnoscit.

Ejus itaq; clades, ærumnas & calamitates, quas & olim, & nostrâ memoriâ à varijs hostibus crudelem in modum per-

pertulit, referentibus nobis, haud alie-  
 num ab instituto videtur, quando pri-  
 mum habitari cæpta sit, & à quibus po-  
 pulis: item, de posterioris temporis  
 ejus incolis, deq; ijs, qui hætenus eam  
 incolunt: de situ & qualitatibus ejus,  
 de Districtibus, Urbibus, Oppidis, Ca-  
 stellis, & alijs locis potioribus, paucis  
 prius explicare. Sic enim magis plana  
 apertaque erunt omnia, quæ deinceps  
 in enumerandis ejus plagis prodituri  
 sumus.

### CAPUT I.

Moravia quando & à quibus  
 primò habitari cæpta.

### CAPUT II.

De Marcomanis Moraviæ  
 incolis.

### CAPUT III.

De Slavis Moraviæ incolis.

## CAPUT IV.

De Statu & Regimine Politico Moraviæ, postquam defuisset esse Regnum.

## CAPUT V.

De Situ & Qualitatibus Moraviæ.

## CAPUT VI.

De Moraviæ Districtibus, Urbibus, Oppidis & locis potioribus.



## LIBER II.

Syllabus plagarum veterum ac recentium à Marte hostili Moraviæ inflictarum.

**S**eriem cladium calamitatumq; quas à varijs hostibus Moravia pertulit, secundum ordinem descripturus, operæ pretium judico, ut paulò altius



mox à capite rem investigem, quò totum clarius in se sit, & integritate magis adæquatum, & intellectu maximè perspicuum.

Primò igitur vetustissima quæq; discutienda aggrediemur: deinde media, quæ sequuturus aperiet textus, pro virium captu limatiùs examinabimus: tandèmq; ad calcem rei, seu ad ea quæ Avorum Patrùmq; nostrorum, & recenter nostrâ quoque memoriâ acta sunt, descendemus.

### CAPUT I.

Deductio cladium veterum, quas sustinuère primi Moraviæ incolæ, Osi Pannonæ.

### CAPUT II.

Continuatio cladium à Marte hostili Moraviæ inflictarum sub Marcomanis.

### CAPUT III.

Plagarum à Marte hostili Moraviæ

raviæ inflictarum subsecutio,  
translato ad Sarmatas, seu Sla-  
vos Regno.

*CAPUT IV.*


Lerna plagarum à Marte  
hostili Moraviæ inflictarum,  
cùm post cladem Svatobogi Re-  
gum ultimi in Provinciam Re-  
gni Bohemiæ redacta esset, ad  
usq; Venceslaum ejus nominis  
III. Bohemiæ Regem, & ex  
Przæmyslo-Libussæa stirpe ul-  
timum.

*CAPUT V.*

Plagarum Moraviæ à Marte  
hostili inflictarum repullula-  
tio, à tempore Rudolphi I. Bo-  
hemiæ Regis usque ad Ferdi-  
nandum I.

## CAPUT VI.

Protelum plagarum à Marte  
hostili Moraviæ inflictarum,  
à Ferdinando I. ad usq; tempus  
præfens.





LITHOMISSLI,



Excudebat Joannes Arnolt,  
Anno Domini : 1664.



33



le,





